

萬 有 文 庫

第 二 集 七 百 種

王 雲 五 主 編

文 山 先 生 全 集

(二)

文 天 祥 著

商 務 印 書 館 發 行

文山先生全集卷之四

表牋

門謝表

臣某言。伏準省劄。五月二十八日。三省同奉聖旨。文天祥添差簽書寧海軍節度判官廳公事。仍釐務。臣以賜第之初。未經門謝。未敢祇拜劄命。申乞指揮。續準省札。七月十一日。三省同奉聖旨。令朝謝訖之任。臣謹遵奉旨。揮詣闕庭。朝謝者。御大廷而發策。式廣旁招。奉清問以據忠。誤承親擢。尙阻紫宸之謝。遽叨黃紙之除。曠世遭逢。瞻天感激。臣切以賓興下詔。同天地宗祀之彝。科舉取人。代造化爵賢之柄。豈曰利人才之進取。其間實天道之流行。肆萬乘之臨軒。受諸侯之貢士。占小善者。率以錄。咸造在廷。取一人焉。拔其尤。必有名世。豈應庸瑣。可在蒐羅。臣稟質既凡。聞道猶淺。才非洛陽之年少。偶玷薦書。學非廣川之大儒。遽塵舉首。自叨異數。亦既三年。回思臚唱之蒙恩。莫與鳧趨而奉表。有懷就日。無路賤天。方徬徨於丘園。乃寵綏其祿秩。輒請展爲臣之禮。幸許脩詣闕之恭。茲蓋伏遇皇帝陛下。德體乾行。道符常久。世更三紀。遠追成周。式化之風。歲啓後庚。近接藝祖。開基之運。凡際風雲之會。咸依日月之光。遂令一介之姓名。亦被九重之記錄。臣敢不誓堅素守。勉企前修。自授讀書。非爲平生溫飽之計。願言竭節。用副上心。忠

孝之期。臣無任瞻天望聖。激切屏營之至。謹奉表陳謝以聞。

湖南提刑到任謝皇帝表

帝庭敷命。昭關四門。天牧播刑。誤頒一節。申以遄驅之旨。疇茲已試之庸。周隰載馳。漢條具布。伏念臣。本無他技。惟有孤忠。兩朝特達之知。洊塵清要。十載行藏之跡。祇自悔尤。雲雷之義方屯。天地之心已復。當元日達聰之始。在皇華遣使之中。聖恩靡許於祝釐。臣職敢稽於行道。瞻蓋高而下耳。冀用譽於折肱。茲蓋恭遇皇帝陛下。道協重華。仁周四表。崇德廣業。合乾轉坤。翕之功。折獄致刑。得震動離明之用。遂令承乏。復忝司平。臣敢不祇若咨詢。對揚欽恤。陳時臬事。尚弘康乂之圖。受王嘉師。永迪明清之訓。

謝皇太后表

司平楚甸。命出嚴宸。告至周原。恩歸慈極。敢敷睿訓。仰謝徽音。伏念臣。一介寒微。兩朝知遇。傾葵向闕。初無補於使令。啜菽杜門。祇自深於觀省。當元日會同之始。拜公朝。挾拭之仁。言遣使臣。往陳臬事。華省遄頒於趣旨。叢祠竟祕於俞音。勉臣子之驅馳。見吏民而宣布。茲蓋恭遇壽和聖福。皇太后陛下。心起有極。道合無疆。長信怡愉。贊炎圖之昌運。大任肅穆。開蒼籙之隆平。宜擇攸司。俾敬爾獄。臣敢不丕承欽恤。誕布慈仁。又我黎民。尚想無刑之治。于其王母。敢忘介福之元。

謝皇后牋

君子審官道隆儷極。皇華遣使命出治朝。德意具宣。忱辭告至。伏念臣疎庸一介。遭遇兩朝。早綴班行。嘗忝金科之屬。繼乘使傳。復塵繡指之行。曲成每戴於釐明。退食難逃於吏議。不圖元會。復錫恩言。杖拭起家。往陳時臬。驅馳在道。寅奉天威。涖止攸司。欽哉乃職。茲蓋伏遇皇后殿下。德侔坤地位。正家人。關雎之化。既行。用之天下。象魏之法。使布。正自王宮。爰取踐更。載叨詳讞。臣敢不靈承。欽恤。祇若平反。無刑以乂。黎民。誕敷聖化。式敬以長。王國。永誦徽音。

皇太子生日賀皇帝表

大夏長嬴。坤二爻之紀季。千秋似續。震一索之揆初。瑞彩緣車。歡顏丹辰。恭惟皇帝陛下。德流芑水。業茂蘿圖。壽富多男。積善必有餘慶。本支百世。命吉在厥初生。記甲觀之瑞分。占乙禡之祚遠。臣縻身軫墊。戴目心星。誦億子之宜君。首歌周雅。祝萬年之爲父。更續唐詩。

賀皇太后表

福于王母。際南面之昌期。天以神孫。娛東朝之永日。畫堂瑞節。長樂歡聲。恭惟壽和聖福。皇太后。性蘊冲和。仁培靜壽。思齊所以聖也。以御于邦。螽斯宜爾。孫兮克開。厥後。皇皇穆穆。繼繼承承。臣迹滯騏原。心馳鳳闕。本支百世。播緜颺之聲詩。怡愉萬年。衍含飴之福慶。

賀皇后牋

坤后廣生。式協二爻之月。震男揆度。載逢一索之期。慶衍蘿圖。喜充椒掖。恭惟皇后殿下。道柔配地。德厚承天。以御于家。爲今京室之婦。則樂有子。如古周南之風。百世本支。萬年福祿。臣迹糜牲。轡心賀燕。謀占斯干之詩。已符吉夢。美思齊之德。益嗣徽音。

皇子進封左衛上將軍嘉國公賀皇帝表

乾父垂仁。茂積蘿圖之慶。震男鍾美。肇基茅土之邦。百世可知。四方來賀。洪惟昭代。爰立親親。粵有舊章。禮優貴貴。防祥符之七載。侈慶國之初封。綺仗分班。瑑珪疏寵。庸表人倫之厚。遙觀王室之疆。式于今休。監于成憲。恭惟皇帝陛下。福培周厚。和緝堯雍。寶曆無疆。方萬年而受祜。金枝有煒。期億子以宜君。錫以嘉名。渙其大號。地營東井。詔爵五之最穹。天拱北辰。炳心三之相照。克昌厥後。長發其祥。臣有蹇牡。駢阻隨虎。拜祉歌子。施遙陳皇矣之詩。道盡君嚴。願贊家人之易。

賀皇太后表

東朝保艾。方隆堯母之仁。西國分茅。式篤文孫之慶。兩宮喜色。萬宇歡聲。恭惟壽和聖福。皇太后陛下。德厚慈元。神怡長樂。尊之至也。上承視膳之勤。宜爾繩兮。下適含飴之趣。瑤池日永。玉葉春濃。臣遠被繡衣。險瞻綵仗。于其王母。知介壽之來崇。佑我後人。願丕圖之有衍。

賀皇后牋

坤稱乎母。儼家服於椒塗。震索而男。赫龍光於茅土。長秋喜色。方夏歡聲。恭惟皇后殿下。含弘承天。博厚配地。祥鍾長發。熾裔後於有娥。音繼思齊。培文昭於大妣。圭瑒焜煌於綺仗。芾朱輝映於禕衣。臣遠驟華原。險瞻蕊殿。想宜君之穆穆。茂對王休。侈多子之繩繩。載歸后美。

皇女進封同壽公主賀皇帝表

乾見大人。道夙隆於乾體。巽爲長女。命爰寵於巽中。喜溢宮庭。歡騰海宇。竊惟興君之際。必有積善之餘。播在正風。則曰王姬之美。陳于小雅。是爲女子之祥。無非歌福祿之同。于以表國家之盛。恭惟皇帝陛下。和順而理。溫柔以容。苞體深仁。旣歲絲瓜之颺。岡陵厚積。復培穰李之華。始封爰遴於嘉名。遐祉永齊於聖壽。臣跡縻使事。身隔賀班。親愛如家。遙賀人倫之厚。肅雍迪教。遙觀王道之成。

賀皇太后表

周家福祿。積由任姒之仁。堯母聖神。親覩娥英之慶。宮闈盛典。海宇歡聲。恭惟壽和聖福皇太后陛下。南極景光。東朝綦貴。有功寶祚。旣開聖子之傳。流澤銀潢。爰毓天孫之瑞。贊初封於沁水。同上壽於瑤池。臣遠玷皇華。險瞻長樂。怡愉太后。諒承婉婉之娛。雍肅王姬。益表儉慈之教。

賀皇后牋

坤萬物之資生。實蕃慶積。巽一索之謂長。昉對命申。喜氣宮闈。歡聲海宇。恭惟皇后殿下。關雎孝敬。芣苢

和平灼灼宜家。夙範華桃之懿。雍雍成德。茂鍾穰李之英。賁然錫沁水之封。展也同長秋之壽。臣遠靡苞杞。遙睇塗椒。風以周南。仰化原之洵美。觀于堯女。願母道之浚明。

知贛州到任謝皇帝表

九重選牧。錫類天寬。千里承流。奉親地近。防其候度。不戴王休。伏念臣某。才本空疎。分安孤苦。身逢盛代。夙自厲於丹心。家有重親。晚相依於白髮。頃叨漢傳。往卽楚封。何敬非刑。粗殫審克。不遑將母。私切懷歸。嘗懇懇以陳情。冀高高之欲從。遭蒙異渥。特畀近麾。繼盼旨以趣征。已鞠躬而祇上。祿及一門之微賤。恩同大造之生成。茲蓋伏遇皇帝陛下。以堯舜之資。行曾閔之道。嗣寧王之大歷。愆我成功。奉太后之萬年。與天齊壽。遂使忝求芻之寄。亦獲共啜菽之歡。臣敢不老及人。親親爲政。由家達國。期興遜以興仁。以子移臣。寓爲忠於爲孝。

謝皇太后表

東朝鴻慶。介壽無疆。南國虎符。便親有命。荷中宸之渙寵。望慈極以飯忱。伏念臣一介迂疎。兩朝遭遇。昔備殫於駁歷。無以逾人。頃間任於驅馳。不遑將母。惟內懷於烏哺。遂上徹於蟻忱。果分二水之應。爰易三湘之節。惟壤地接。故可以供菽水之職。惟十風習。故可以盡芻牧之心。自省叨隲。若爲報稱。茲蓋恭遇壽和聖福。皇太后陛下。德光堯母。功配周姜。壽錫萬年。享怡愉之福。化流四海。推慈孝之仁。遂令下吏之僥

榮獲以邇封而就養。臣敢不祇承德意。誕布恩言。服膺錫類之詩。益崇美化。拜手牧民之訓。險贊徽音。

謝皇后牋

慈極承天。恩深錫類。廉車易地。職重分符。布聖德之中和。便親闈之溫清。伏念臣起繇孤遠。積有迂疎。骯髒半生。於事君而何補。驅馳近歲。以將母而未能。屬爲養以陳情。荷畀矜而從欲。三湘納節。二水授麾。回刺史之車。庶乎爲子。捧郡守之檄。專以爲親。僥冒實多。糜捐曷稱。茲蓋恭遇皇后殿下。道隆坤厚。德配乾仁。大雅思齊。媚周姜而穆穆。長秋備禮。奉漢母以愉愉。遂令疏遠之微臣。亦效旨甘於便壘。臣敢不恪恭侯度。茂對王休。崇關雎卷耳之風。迪惟懿則。篤南陔白華之行。施及遐萌。

壽崇節本州賀皇帝表

天子有親。備四海九州之奉。封人祝聖。同萬年億載之期。凡屬照臨。舉同呼舞。恭惟皇帝陛下。剛建中正。緝熙光明。燭六合而耀八紘。功參天地。躋三皇而軼五帝。道御家邦。紹巍巍蕩蕩之勳。盡尊尊親親之養。怡愉誕節。光大前聞。臣獲布寬條。幸逢盛際。鸞鷲阻綴。莫旅賀於東朝。螻蟻傾忱。惟仰瞻於南極。

賀皇太后表

於萬斯年。慈宸有慶。誕彌厥月。祖佛同生。旒冕敬共。縉紳舞蹈。恭惟壽和聖福。皇太后陛下。道超太始。德厚重坤。關雎周南之風。夙陶美化。思齊文王之母。懋著徽音。袵衣初奏於薰絃。宮珮畢朝於慈辰。親下袞

龍之拜。載揚韶鳳之音。呼萬歲者三。歡騰朝野。等百世而上。福衍子孫。臣叨守魚符。莫陪鷺序。我百而爾九十。諒喜溢於舉觴。心一而臣三千。第神馳於拱極。

賀皇后賤

太姒之嗣。太任。星重慈極。長秋之朝。長樂。天介壽祺。流慶九霄。比隆千古。恭惟皇后殿下。明章德範。陶冶風。大練厚繒。訓四方之節儉。宵衣旰食。侑五位之勤勞。宵似徽音。婉愉誕序。厚符坤地。吉萃家人。臣逃守遐邦。忻逢華旦。仰瞻帝闕。莫陪振鷺之班。下與邦民。同被關雎之化。

壽崇節兵馬鈐轄司賀皇帝表

天子盡敬事親。丕昭瑞節。臣下歸美報上。同祝脩齡。覆載兩朝。頌歌四洽。恭惟皇帝陛下。克勤克儉。無怠無荒。堯以是傳。道莫高於虞舜。文所以聖。德益顯於大任。有開麗水之祥。適際瑤池之會。臣屬糜戎鍵。阻綴班聯。北面而朝。恍天威之尺五。南山之壽。效臣子之呼三。

賀皇太后表

金闕日長。尊處宸闈之極。王卮春滿。誕膺法駕之朝。凡在式園。率均擊壤。恭惟壽和聖福。皇太后陛下。心遊恬淡。德著慈仁。隆周召之風。人倫既正。養黃老之性。母道獨尊。皇穹申方至之休。壽命衍無疆之算。臣猥分郡組。共貳戎韜。迹遠觚稜。帷幄險瞻於長樂。忱同葵藿。笙璫第想於承華。

賀皇后牋

坐於少廣。慶慈極之誕彌。朝于寢門。助聖人之教愛。宮庭溢喜。宇宙同和。恭惟皇后殿下。瑞應倪天。光照
遡日。正始基化。歌二南。芣苢之詩。視膳問安。備六寢。禕榆之禮。協朱明之律呂。鏘綵仗之珮環。驩奉玉卮。
禮同黼辰。臣濫紆州紱。通領兵符。聆舜樂之九成。遙瞻南面。效堯階之三祝。竊比華封。

乾會節本州賀皇帝表

一人天拱。適符龍御之享。萬國雲從。共慶虹流之瑞。系隆宗社。福被寰瀛。恭惟皇帝陛下。曰睿曰聰。乃文
乃武。金甌有永。紹寧人大寶之休。翠蹕早朝。娛太后萬年之壽。當嵩呼之華旦。繼夢月之佳辰。兩宮同時。
千載盛事。臣猥叨分竹。彌切傾葵。奉玉卮之恭。阻綴班於北闕。通銀臺之奏。但申頌於西崑。

賀皇太后表

六龍御極。增光長發之詩。萬國同心。推本思齊之聖。驩騰宮壺。和塞堪輿。恭惟壽和聖福皇太后陛下。曰
希曰夷。爰清爰靜。以天下養。備百祿之熾昌。與元氣游。葆六根之純粹。海內樂唐虞之化。宮中頌任姒之
音。臣叨預承流。遙伸歸美。冬溫夏清。禮殿東面之朝。日升月常。福等南山之祝。

賀皇后牋

黼辰端臨。交上華封之祝。椒塗內助。仰承京室之規。喜溢六宮。和薰八表。恭惟皇后殿下。靜專成性。徽懿

秉姿珥簪進庭燎之箴。雞鳴有度。弓韞奉高禘之祀。燕翼發祥。際上帝生商之辰。懋塗山興夏之德。仰占七政。日月並明。俯鑒四方。岡陵齊壽。臣分符江右。化被周南。首贊乾亨。體天行之不息。更祈坤載。協地道之無疆。

乾會節鈐司賀皇帝表

龍首庶物。覩天德之照臨。虎拜萬年。對王休而蹈厲。堪輿協氣。海宇頌聲。恭惟皇帝陛下。神聖整齊。武文經緯。諸福畢至。一登再登三登。我武維揚。五伐六伐七伐。虹渚載臨於盛旦。鳳音遙想於明庭。臣通領鈐符。恪共官次。葵傾觀闕。阻陪就日之班。花覆簪紳。隄謝需雲之宴。

賀皇太后表

天下傳歸於子。降寶冊之鴻名。聖人教愛以親。上玉卮之舅壽。非常之慶。嘉頌攸同。恭惟壽和聖福。皇太后陛下。冲澹頤神。儉慈孚化。輔佐先帝。夙殫卷耳之勤。愉佚東朝。允著思齊之聖。昉前殿紀誕彌之旦。正羣方傾就望之忱。肆膺鳳輦之朝。親下龍綃之拜。臣屬糜戎鍵。阻綴班行。現五色之雲。知獻占於太史。舞兩階之羽。諒增喜於慈顏。

賀皇后牋

上萬歲之壽。咸頌聖人。形四方之風。實基王化。凡居持載。罔不矚呼。恭惟皇后殿下。生稟靜柔。安行雍肅。

躬河洲采苻之潔。列聖顧歆。冀寢門視膳之恭。慈顏和懌。合坤其順。遡日而明。欣聆嵩嶽之呼。並受華封之祝。臣俯共武服。仰贊壽觴。星之遠。天之高。陞莫瞻於九級。漢之廣。江之永。詩但誦於二南。

皇子賜名本州賀皇帝表

家有嚴君。托中興之昌歷。天以聖子。作大國之宗藩。喜溢宮闈。慶關宗社。恭惟皇帝陛下。懋昭聖德。厚正人倫。保天命以宜君。四方無侮。貽孫謀而翼子。百世可知。爰錫嘉名。載敷大號。敬載有土。肇基二水之邦。格于皇天。式應三星之曜。俾耆而艾。長發其祥。臣糜跡侯方。傾心魏闕。監王成憲。願垂謨烈之休。啓我後人。益壯本支之盛。

賀皇太后表

東朝介福。式彰母道之尊。南國分封。庸迪孫謀之吉。兩宮交慶。百世彌昌。恭惟壽和聖福。皇太后陛下。長樂怡愉。大庭游衍。養以天下。日永瑤池。正于家人。春生玉葉。贊苴茅於涪水。壯緜瓞於宗藩。臣遯在侯方。阻瞻宸仗。思齊所以聖。遙頌徽音。皇矣莫若周。益隆世德。

賀皇后牋

母資坤德之生。椒塗襲慶。男正家人之吉。茅土分封。宗社延洪。宮闈闡懌。恭惟皇后殿下。承天光大。法地靜專。成美化於周南。言能逮下。嗣徽音於京室。予以御家。屬聖子之勝衣。贊嚴君之錫爵。臣遠縻外服。阻

造內班。正風俗以厚倫。永歌后德。輔皇王之維辟。不俟孫謀。

皇子賜名鈐司賀皇帝表

天佑我家。篤生聖嗣。國有鉅典。肇建宗藩。社稷靈長。神人孚洽。恭惟皇帝陛下。禮行貴貴。愛立親親。撫寶曆之昌期。萬年福祿。演銀潢之慶澤。百世本支。爰重燕謀。載頒鴻號。于疆于理。地營活水之邦。有翼有馮。星拱周廬之衛。克開厥後。俾熾而昌。臣遠繫戎韜。愉瞻文石。施于帝祉。德已動於監觀。保我後生。命更歌於壽考。

賀皇太后表

堯母怡愉。介于景福。湯孫歧嶷。錫以嘉名。慶衍宗枋。歡隆慈極。恭惟壽和聖福。皇太后陛下。爰清爰靜。曰希曰夷。佐先帝之中興。鷄鳴有度。膺嗣王之孝養。燕翼成謀。爰鍾受於綠車。乃分符於赤社。臣恪恭武服。阻造王庭。以御于家。喻贊思齊之德。克開厥後。佇成皇武之功。

賀皇后牋

坤稱乎母。作德配天。震索而男。建邦有土。慶成宗社。喜溢宮庭。恭惟皇后殿下。茅苴和平。關雎孝敬。嗣母徽於京室。在廟在宮。明子道於家人。正內正外。歡動勝衣之拜。光昭燾社之封。臣共武有嚴。稱班云。逖風以周南之化。險質蠡斯。烝哉豐水之謀。遙觀燕翼。

皇帝登寶位本州賀皇帝表

天作之君。表冠倫之大聖。父傳於子。昭立嫡之至公。曆數維新。神人胥慶。恭惟皇帝陛下。以周元子。爲舜重華。大德生知。聰明以臨。齊莊以敬。一人有慶。進退可度。容止可觀。積累厚而孫謀深。謳歌同而神器定。無爲而治。有道之長。臣叨領虎符。險瞻龍御。建皇極而王天下。幸際昌期。開明堂而朝羣臣。聳觀初政。

賀太皇太后表

肇聖德之龍飛。運開昌曆。垂孫謀之燕翼。功出慈宸。九廟尊安。八紘抃蹈。恭惟壽和聖福太皇太后陛下。道光任姒。行邁塗莘。範肅東朝。性適合飴之樂。規重南面。養親視膳之榮。光昭嫡統之傳。丕衍皇家之慶。臣叨紆守紱。阻造賀班。頌皇帝之萬年。永言齊壽。佑寧人之大歷。尙克圖功。

賀皇太后表

震出麗天。重明繼序。伸稱正位。一統蒙休。基祚斯皇。幅員胥慶。恭惟皇太后陛下。輔佐先帝。憂勤王家。思媚周姜。履肅雍於京室。訓貽禹子。服勤勞於塗山。瑞昭南面之符。光疊東朝之矩。臣屬縻侯服。險企慈帷。嫡統無疆。已慶大橫之兆。嗣徽有秩。尙稽小苾之謀。

皇帝登寶位鈐司賀皇帝表

乘時御極。宣日月之重光。居嫡宅尊。大春秋之一統。幅員愛戴。宗社安強。恭惟皇帝陛下。仁孝生知。聰明

時又踐寧王之丕祚。大歷維新。奉文母之徽音。皇天有慶。宜首正飛龍之御。以上承翼燕之貽。無疆維休。有相之道。臣濫巾戎轄。阻造朝班。五百歲而生。幸親見聖。萬億年其永。不替惟王。

賀太皇太后表

兆協大橫。運在當命之聖。謀貽小愆。功歸太上之慈。嫡統延洪。皇圖鞏固。恭惟壽和聖福。太皇太后陛下。躬基美化。教闡徽音。彤管光華。配豐功於祖烈。練衣朴素。示懿訓於孫謀。聿新歷服之傳。式副簾帷之託。臣司戎共貳。望闕呼三。庶民近天子光。忻逢昌曆。太極爲元氣母。永迪初基。

賀皇太后表

震主宅尊。光紹寧王之命。坤元居正。適彰太姒之音。一統親傳。萬邦胥慶。恭惟皇太后陛下。功侔持載。德備含弘。風化二南。衍傳家之忠厚。本支百世。肇繼序之聖明。大春秋正嫡之書。應日月重光之運。臣屬兼鈐紱。阻造軒帷。在天利見大人。已孚文命。介福于其王母。長詠思齊。

謝皇帝登極赦文表

日月重離。開國家之休運。雷雨作解。溥天地之至仁。萬邦咸休。一人有慶。恭惟皇帝陛下。堯文光宅。舜德出寧。神聖爲君。不受皇天之命。春秋立嫡。聿昭正統之宗。爰肆膏於端門。示湛恩於熙代。臣猥分銅虎。除企金雞。大人繼照四方。聳觀初政。皇極敷錫五福。第奉寬書。

太皇太后加尊號本州賀皇帝表

御丕圖於南面。順應天人。崇徽冊於東朝。重增宗社。億年緝典。萬國懽心。恭惟皇帝陛下。皇極之宗。人倫之至。性同符於堯舜。達孝升聞。訓一本於姜任。徽音有秩。紹寧王之明命。彰祖后之尊稱。臣分牧有嚴。承休胥抃。介福于王母。難名太上之功。肖德以神孫。願共無疆之號。

賀太皇太后表

鴻名揚厲。用彰重慶之尊。龍辰繼承。懋舉盡倫之制。明廷孕號。寰宇傾心。恭惟壽和聖福太皇太后陛下。德備儉慈。教脩愛敬。佐我烈祖。成天保之憂勤。訓于神孫。示思齊之雍肅。粹美翟禕之服。增華琬琰之章。臣屬守銅符。欣傳寶冊。同御延和之殿。誕頌前猷。尊居慈福之官。永言至養。

賀皇太后表

統繼堯天。重華協德。位隆文母。太姒嗣音。寰宇休明。內庭肅穆。恭惟皇太后陛下。行高配地。功大補天。輔先帝以重光。憂勤夙至。肇嗣王之丕緒。福祿方來。奉寶冊於重闈。壽皇圖於覆載。臣屬糜郡紱。阻造廷紳。咸曰太皇。已慶元和之壽。願言帝母。永肩長樂之名。

太皇太后加尊號鈐司賀皇帝表

皇圖嗣慶。著母道於重坤。鉅冊稱尊。告王庭而大渙。宮闈增重。宗社蒙休。恭惟皇帝陛下。德爲聖人。孝治

天下侍宣仁之聽斷。元祐同符。稟慈福之起居。紹熙儷美。播無爲之懿號。隆太上之徽音。臣猥介戎鈐。登觀國典。思齊文母。旣彰有德之雍雍。於赫湯孫。願共厥聲之穆穆。

賀太皇太后表

雖日方升。光傳國寶。坤元重慶。肇建鴻名。福萃三宮。歡騰八表。恭惟壽和聖福。太皇太后陛下。佐佑皇祖。怡愉東朝。德配姜任。植丕基於蒼錄。功高馬鄧。扶洪業於炎圖。宜效美於思齊。大歸尊於長樂。臣偶叨戎轄。阻綴朝班。丕哉烈丕哉謨。共僉嗣王之政。得其名。得其壽。載揚太上之休。

賀皇太后表

晉大號於慈闈。位隆長樂。紹丕基於萬世。慶本慈元。命肅治朝。禮行廣內。恭惟皇太后陛下。頤神冲澹。履行靜專。美紹思齊。宜毓文王之聖。訓垂訪落。實開成后之謀。贊重慶於御簾。推有尊於臨制。臣猥分戎轄。險聽恩綸。望少廣之宸居。莫班獸舞。頌長秋之壽曆。同播鴻名。

皇太后加尊號本州賀皇帝表

嗣王受此丕基。光膺明命。文母介以繁祉。祇奉嘉名。典冊流輝。幅員有慶。恭惟皇帝陛下。一人出震。五位乘乾。玉質金相。嗣延洪之大曆。寶緯羽翟。奉雍肅之徽音。光進瑤編。重增鼎祚。臣叨分虎壘。隲望龍墀。保佑恩深。已際大明之運。怡愉樂永。更揚齊壽之休。

賀太皇太后表

毓正神孫。方布應門之詔。位尊祖后。復隆京室之稱。重慶萬年。丕休四海。恭惟壽和聖福。太皇太后陛下。性超太上。德應黃中。元祐太功。法宣仁之鞠育。紹熙新政。燕慈福之起居。宜旌坤極之嘉名。式趾太宸之芳躅。臣屬分侯服。欽誦王綸。天子必有所尊。已光載籍。聖德無加於孝。長戴兩宮。

賀皇太后表

坤稱正位。訓迪嗣王。渙號揚庭。尊歸文母。簾帷介福。社稷垂榮。恭惟皇太后陛下。德著憂勤。躬行慈儉。虞嬪觀于瀉泆。密贊聖謨。后稷生於姜嫄。美鍾神胄。晉長信尊尊之號。嗣思齊秩秩之音。臣忝守藩維。阻趨軒陛。得其名。得其壽。幸同萬國之歡。宜爾子。宜爾孫。永頌兩宮之慶。

皇太后加尊號鈐司賀皇帝表

重明以繼大人。瑤圖垂慶。介福而于王母。玉册有光。瑞溢簾帷。重關宗佑。恭惟皇帝陛下。敬仁成性。曆數在躬。惟后綏猷。蹈堯舜之孝弟。因親教愛。奉任姒之肅雍。宜申慈極之尊。式表聖倫之至。臣叨兼兵轄。隲企陞簾。贊信長之徽稱。已光漢制。頌塗山之丕訓。益大禹功。

賀太皇太后表

嗣皇奉册。尊居長信之名。祖后宣猷。夙迪思齊之訓。萬年集慶。八表蒙休。恭惟壽和聖福。太皇太后陛下。

德邁維莘。道高于汭。金車玉路。備三世之典章。寶翟珍禕。云六宮之法度。美慈宸之疊矩。揚大號以同符。臣兼領戎鈐。竦聆郵紱。德壽早朝之典。已慶淳熙。延和同御之功。益歌元祐。

賀皇太后表

文母克昌厥後。光紹皇圖。大德必得其名。慶隆寶冊。四方來賀。百志惟熙。恭惟皇太后陛下。陰教齊家。慈元正位。推爲美化。邁周召之二南。著在徽音。紹姜任之大雅。宜膺渙號。增重坤稱。臣適貳輶鈐。聳聆綸紱。踐其位。行其禮。莫重尊親。求厥寧。觀厥成。迺追來孝。

大行皇帝升遐本州慰皇帝表

堯父宅尊。春秋鼎盛。祀天告墜。遠邇震驚。降割非常。銜哀罔極。恭以大行皇帝。神聖文武。濟哲溫恭。萬千歲怡愉。恪盡東朝之養。十一年寅畏。遙祗上帝之威。期壽考之惟休。俄憂勤而積疾。詎圖大漸。驟至遐征。望欲斷於遺弓。命忍傳於憑几。恭惟皇帝陛下。有仁有孝。盡制盡倫。克念先猷。根聖人之至性。誕承慈訓。服天下之通喪。願少抑於孝思。以永綏於神器。臣屬糜守紱。哀捧告書。莫伸奔問之恭。徒切攀號之痛。

慰太皇太后表

雞鳴問寢。方慈極之深居。龍去遺弓。忽皇輿之新陟。宮闈震悼。海宇摧傷。恭惟壽和聖福太皇太后陛下。德備周姜。道光堯母。東朝垂訓。曾不改於儉慈。南面積髮。遽忍違於溫清。驟罹國疾。諒切聖懷。少寬憑几。

之思。式副御簾之託。

慰皇太后表

皇靈新陟。變撫遺弓。儷極永懷。悲興捐珎。六宮哀痛。九宇摧傷。恭惟皇太后陛下。坤道宅中。家人位正。脫簪而諫。期共濟於中興。綴衣于庭。忍遽聞于末命。雖委裘之悲。至切而定鼎之託。方新願制。盡傷永綏。敷遺云云。

大行皇帝升遐鈐司慰皇帝表

王宜日中。方慶垂衣之治。父有天下。遽傳憑几之言。宗社憫凶。幅員哀痛。共以大行皇帝。王道正直。帝德簡寬。奉長樂之清溫。丕昭仁孝。聽邇英之勸誦。遙紹文明。方嗣服於萬年。胡委裘於一旦。烏號罔極。龍御何追。共惟皇帝陛下。聖德升聞。孝思永慕。重華協帝。方遏密於八音。冢宰總官。將諒陰於三祀。願少紓於聖抱。以弘濟於皇圖。臣逖領戎昭。哀傳國疚。阻伸奔問。惟重摧傷。云云。

慰太皇太后表

嚴宸居正。痛晏駕之奄聞。慈極宅尊。悵早朝之遽隔。哀傳海宇。悲結簾帷。共惟壽和聖福。太皇太后陛下。德厚承天。恩深與子。夙行恭儉。聖方頌於思齊。晚享怡愉。變忍聞於顧命。諒聖情之結戀。鑒輿志之攀號。願抑慈懷。永謀孫翼。

慰皇太后表

變興梧野。九土烏號。悲結椒塗。六宮縞哭。宅憂罔極。降割何深。臣共惟皇太后陛下。志紹徽音。躬行美化。冬溫夏清。佐孝養於東朝。海潤星暉。演慶源於中壺。驟撫鼎湖之戚。奚堪輿極之哀。願抑慈懷。聿扶新政。云云。

百日慰皇帝表

烏號浸遠。九土同悲。駒隙易流。十旬如隔。撫時哀疚。易月徬徨。恭惟皇帝陛下。曆數有歸。羹牆如對。雖擗踊哭泣。曷勝父子之情。而朝覲謳歌。當慰臣民之望。願節宅憂之制。益成繼志之圖。臣承乏偏城。阻趨嚴陛。云云。

慰太皇太后表

烏號銜恤。悵再隔於月遊。龍寢闕朝。恍十周於日浹。流光何速。哀思欲摧。恭惟壽和聖福太皇太后陛下。宮壺宅尊。簾帷託重。雖道揚王命。不勝慈極之懷。然燕翼孫謀。當念皇圖之本。願體臣民之戴。少寬朝夕之思。云云。

慰皇太后表

雲升梧野。頓隔千秋。日短莫階。駕言十浹。委裘禍迫。捐袂哀深。恭惟皇太后陛下。教盡人倫。慶隆母道。雖

易月以日。難窮伉儷之悲。然薦子於天。正重攜持之託。願俯從於中制。用式副於羣情。云云。

期年慰皇帝表

追玉几之遺言。制嚴易月。服練冠於初祭。哀重感時。霜露深悲。乾坤罔極。恭惟皇帝陛下。孝治天下。統承先王。雖見堯於牆。克篤終身之慕。然纘禹之服。所期大器之安。願從禮制之宜。少副輿情之望。臣屬糜藩屏。阻造闕庭。云云。

慰太皇太后表

訓予命汝。易月有嚴。練而慨然。周星何短。哀承遺制。痛結慈衷。恭惟壽和聖福。太皇太后陛下。德紹宣仁。功侔明肅。天經地義。扶嫡統於方新。日邁月征。悵宸旒之愈遠。願勉從於衆志。姑少抑於至情。云云。

慰皇太后表

悲捐玉玦。痛極呼天。祭服練冠。制嚴易月。乘雲浸遠。濡露何堪。恭惟皇太后陛下。德佐先猷。慶鍾神胄。雖徬徨虞汭。望欲斷於蒼梧。然婉孌周姜。任方隆於京室。願少寬於哀抱。用不贊於鴻圖。云云。

再期慰皇帝表

龍湖未遠。可傷易月之喪。駒隙幾何。已舉再期之制。羹牆如在。霜露孔哀。恭惟皇帝陛下。道盡人倫。位隆世嫡。雖終身慕父。難窮至性之悲。然億載怡親。方疊慈顏之養。願重承休之託。少寬追遠之懷。臣隸綴蕃

宣阻班軒陛。云云。

慰太皇太后表

終天巨覺。降割一朝。易月通喪。寓言再歲。仙遊未遠。慈抱難居。恭惟壽和聖福。太皇太后陛下。功在先朝。志勤內治。雖變生憑几。悵闕問於雞鳴。然寄重垂簾。方稽謀於燕翼。願抑無疆之恤。益昌有大之休。

慰皇太后表

望斷乘雲。悵龍驂之浸邈。制嚴易月。恍鳳曆之再周。几屬幃封。式同追慕。恭惟皇太后陛下。承天功大。與子仁深。雖悼舜陟方。不替蒼梧之望。然開周嗣歷。方隆豐芑之休。願少抑於哀悼。用永綏於神器。

禫祭慰皇帝表

龍御何之。方切綴衣之痛。駒陰未遠。已驚釋禫之期。易月從宜。感時增疚。恭惟皇帝陛下。恭默思道。愛敬事親。天作之君。當周艱而卽命。日致其孝。將舜慕以終身。願寬追遠之至情。丕慰蒼生之顛望。臣濫承郡綬。阻綴朝班。云云。

慰太皇太后表

袞衣萬歲。痛隔終天。禫服一朝。權從易月。感時憂戀。率土靈傷。恭惟壽和聖福。太皇太后陛下。德著寶緯。功藏金匱。撫鼎湖之龍去。子保何追。懷豐水之燕貽。孫將有衍。願副普天之望。式紓慈極之悲。云云。

慰皇太后表

宮車輟駕。浸遠翠華。國典行權。恍終素蹕。託言釋禫。胡忍免喪。恭惟皇太后陛下。夙著脫簪。驟羅捐玦。雖
梧雲不返。永爲緯翟之傷。然芑水方來。共徯簾帷之助。願釋居諸之感。俯從遐邇之情。云云。

賀皇帝聽政表

思皇烈考。誕受寶龜。於穆嗣王。甫攷治象。慈籛保佑。熙政闡明。恭惟皇帝陛下。德實天生。動爲世則。入于
翼室。稱元子以宅宗。出自應門。會諸侯而作誥。欽奉怡愉之訓。爰親兢業之幾。旣兩宮垂拱以無爲。宜四
海謳歌而來覲。臣屬糜郡國。險巖闕庭。御延和殿之正朝。願光祖烈。奉紫雲樓之盟誓。第守藩條。

賀太皇太后同聽政表

綏壽而右文母。高拱慈宸。肖德而有神孫。共臨幾政。徽音洋溢。光訓昭宣。恭惟壽和聖福太皇太后陛下。
功邁塗山。德高媯汭。施于帝社。已深慶錫之源。保我後生。益衍壽寧之福。章憲垂簾於天聖。宣仁稱制於
延和。紹昔大猷。爲今懿範。臣屬糜守紱。欣聽俞綸。太易太始太初。莫測無爲之化。四門四聰四目。共觀有
道之朝。

天瑞節本州賀皇帝表

龍德御天。重華于帝。虹書流渚。長發其祥。萬姓驩呼。三辰擁佑。恭惟皇帝陛下。聖德克肖。天性自成。光北

斗之樞。篤生黃帝。美南山之壽。誕命文王。節屆千秋。時維九月。臣糜身侯度。拜手王休。三千臣同心。永言華壽。五百年生聖。敬贊河清。

賀太皇太后表

聖王垂拱。萬年方開。燕翼太皇。怡愉億載。親見紅流。海宇春輝。宮闈日永。恭惟壽和聖福。太皇太后陛下。身基美化。德著慈元。正位而定家人。功高配祖。介福而來。王母慶積。貽孫律協。素商節書。金籙。臣濫膺藩屏。阻賀簾帷。假樂命之慶。春秋之鼎盛。思齊聖也。同日月之離明。

賀皇太后表

龍德方升。祥書載震。燕謀有慶。福萃重坤。旗翼光華。幅員熙洽。恭惟皇太后陛下。道侔博厚。德備仁明。虞汭來嬪。女子舜帝。周京作配。生此武王。方觀日上於扶桑。隨紀虹流於華渚。臣濫叨一障。隄企千班。大域中王。既祝華封之壽。爲天下母。願齊西極之年。

天瑞節鈐司賀皇帝表

謳歌與子。方開捧日之祥。福祿宜王。初紀流虹之慶。光生宗社。歡溢堪輿。恭惟皇帝陛下。天德生知。乾元首出。載震載夙。膺天地之珍符。繼聖繼明。正春秋之嫡統。當瑤光之瑞節。際金顛之昌辰。臣分虎有嚴。扞驚欲舞。呼玉卮之萬歲。隄贊王休。進金鑑之千秋。嗣殫臣職。

賀太皇太后表

萬壽齊天。思齊以聖。千秋紀日。長發其祥。廣宇休揚。重闈慶洽。恭惟壽和聖福。太皇太后陛下。以女堯舜。爲今嬪任。有典有則之貽。輔于皇祖。立政立事之準。訓乃文孫。當月屆於素商。喜節書於華渚。臣猥塵戎幃。阻賀宸闈。請祝聖人。既效堯封之職。亦右文母。載廣周頌之章。

賀皇太后表

辛歲重光。昔符夢日。乾元首出。今紀流虹。歡溢華封。慶歸長信。恭惟皇太后陛下。徽音大雅。美化二南。德配重華。觀嬪于汭。祥開長發。立子生商。扶暘谷之初升。紀高禩之載誕。臣領鈐偏郡。銜表明廷。五百歲河清。既覩聖人之出。三千年桃實。願同王母之尊。

太行皇帝諡號本州慰皇帝表

祀以配天。致聖人之達孝。廟可觀德。彰烈考之隆名。典冊十年。宗祧九鼎。恭以端文明武景孝皇帝。光宅天下。簡在帝心。敬直義方。煥經天而緯地。事名物應。昭脩政以攘夷。大德大功。立親立愛。自生民而未有。熙鴻號於無窮。恭惟皇帝陛下。離象重光。乾龍首出。聖盡倫。王盡制。始于家邦。宗有德。祖有功。行其典禮。式崇徽譽。昭對皇靈。臣叨領虎符。欽傳駉命。告神明。頌盛德。已觀國典之光。薦郊廟。揚洪休。尙述侯邦之職。

慰太皇太后表

居長樂之宮。興懷鶴駕。瞻顧成之廟。肇錫鴻名。大冊垂榮。慈衷悼往。恭惟壽和聖福。太皇太后陛下。以天下養。與元氣游。明肅臨朝。親立仁皇之策。宣仁在御。永懷神考之思。不對皇靈。昭升熙號。臣屬靡侯。絃阻慰震。簾云云。

慰皇太后表

九疑陟遠。莫返皇靈。七廟升宗。聿彰世德。洪名有赫。哀抱彌深。恭惟皇太后陛下。位正家人。道隆坤母。躬萬覃之節儉。厥配有光。秉清廟之肅雍。于嬪增感。於惟大冊。肆對皇穹。臣跡繫分符。馳神望闕。云云。

大行皇帝諡號鈐司慰皇帝表

翼室宅宗。考先王之制禮。觚壇告帝。爲烈考以易名。大冊遙彰。皇靈昭假。共以端文明武。景孝皇帝。體元居正。持盈守成。端獨化之原文。經天地。明萬幾之理。武定邦家。景行有容。孝思無極。上可以配祖宗之德。下可以垂子孫之休。恭惟皇帝陛下。弼我不基。鑒于成憲。寧王克綏。受命篤業。忱辭嚴父。莫大配天。答揚光訓。奉徽稱於宗祀。昭緝典於明時。臣通領戎昭。竦承帝號。堯萬世如見。莫名巍蕩之功。周諸侯來朝。第贊肅雍之相。

慰太皇太后表

盛德之祀。百世肇建。嘉名。太皇之壽。萬年興懷。縟典。慈宸惻楚。穹覆鑒觀。恭惟壽和聖福。太皇太后陛下。懿範兩朝。仁恩四海。爲元氣母。克篤貽孫。育天下君。忍聞祈禰。哀時大號。對越皇靈。臣身貳戎。鈐心懷國。典。云云。

慰皇太后表

大德得名。尊歸昭考。嗣王謀廟。上奉徽音。宗禰休揚。宮闈愴極。恭惟皇太后陛下。儉昭練服。中協黃裳。嗣任德之肅雍。思齊以聖。名堯功之巍蕩。煥有其章。聿深羽翟之懷。於赫觚壇之告。臣猥兼戎轄。隲贊邦彝。云云。

冬至節本州慰皇帝表

一陽來復。感駒隙之易流。三祀諒陰。悵烏號之浸邈。愴深履屨。悲著羹牆。恭惟皇帝陛下。清明在躬。恭默思道。水有源。木有本。方嚴祭祖之時。霜旣降。露旣濡。不替思親之念。少抑居諸之慟。仰膺付託之隆。臣遯守遐邦。阻班嚴陛。誦先王省方之戒。願謹起居。秉諸侯謀廟之忠。聿懷奔走。

慰太皇太后表

暖律吹噓。感一陽之初復。慈簾擁佑。訓三祀之通喪。痛在宮闈。情均海宇。恭惟壽和聖福。太皇太后陛下。徽音慈福。懿範宣仁。履屨迎長。天休方至。冕旒問寢。子保奚追。願少抑於慈懷。以永綏於孫翼。臣屬糜侯。

服。險企御闈。云云。

慰皇太后表

復陽在地。氣應黃鐘。坤德承天。悲深素蹕。六宮增疚。萬宇永懷。恭惟皇太后陛下。長信宅尊。思齊繼美。手扶宮日。坐占千歲之長。目斷臺雲。尙想九疑之遠。願紆哀於儷極。以永翼於皇圖。臣遯守江城。險瞻禁闕。云云。

啓殯慰皇帝表

三年諒陰不言。悲深翼室。七月同軌畢至。告啓葺塗。遠日戒嚴。終天增慕。恭惟皇帝陛下。外勤謀廟。內奉臨朝。制爰舉於因山。龍輻將駕。情永懷於陟岵。鳳紼奚追。願寬劍鳥之思。益重基圖之託。臣屬糜斗壘。阻慰宸庭。云云。

慰太皇太后表

居長樂之漢宮。永懷鶴駕。卜會稽之禹穴。垂戒龍幡。悲結慈闈。痛均薄海。恭惟壽和聖福太皇太后陛下。憂勤德備。擁佑功高。百世可知。首正貽孫之則。七月而葬。豈勝思子之懷。願東望以節哀。重外朝之同御。臣身糜乘障。跡阻趨班。云云。

慰皇太后表

龍湖言遠。椒掖永懷。鳳翬戒嚴。葢塗載闕。六宮雨泣。萬宇雷哀。恭惟皇太后陛下。儷極勳高。正家化洽。撫軒皇之劍鳥。祔賁橋山。奉舜帝之衣裳。思藏梧野。尙軫乾坤之記。願紆朝夕之思。臣身繫分符。神馳攀紼。云云。

發引慰皇帝表

鸞車既駕。陟岵哀深。龍匣畢塗。崇丘制舉。新宮永闕。翼室增傷。恭惟皇帝陛下。思道諒闇。送終哀戚。居喪讀葬禮。不愆復土之期。因山不起墳。尤切望陵之感。翼少寬於孺慕。以不重於宗祧。臣糜跡侯藩。傾心宸陛。云云。

慰太皇太后表

日淪西極。悵鶴駕之長遊。天拱東朝。痛龍湖之永闕。重闈悲繫。九十慕思。恭惟太皇太后陛下。福備怡愉。功高擁佑。撫綴衣於翼室。億世貽孫。念加斧於畢塗。千秋望子。願抑思齊之感。益昌小愆之謀。臣叨領偏城。阻趨慈陛。云云。

慰皇太后表

國謹重喪。龍棺就殯。禮襄大事。鸞掖興懷。海宇同哀。山陵告備。恭惟皇太后陛下。憂勤孔夙。哀感謹終。媯內居諸。悵虞琴之已遠。會稽咫尺。望禹穴以奚追。願紆既葬之悲。式相維新之治。臣承流有守。仲慰無從。

云云。

祔廟慰皇帝表

先帝之葬衣冠載虞神祐。嗣王之奉宗廟。丕祔皇靈。昭穆用休。典章備舉。恭惟皇帝陛下。以舜大孝。居商諒陰。如慕如疑。既畢因山之禮。以享以祀。聿嚴升禴之恭。勉承翼翼之容。深抑煢煢之感。臣屬糜牧。訓阻奉駿奔。云云。

慰太皇太后表

嗣王宅恤。奉先祐以升宗。聖母思齊。感皇靈而悼往。禮容有赫。祀事孔明。恭惟壽和聖福太皇太后陛下。壽考維祺。儉慈爲寶。佑我烈祖。有典則以貽子孫。保子冲人。脩宗廟以序昭穆。祔既行於永紹。哀少釋於慈元。臣叨綴蕃宣。阻班奔走。云云。

慰皇太后表

地隔丹洲。畢舉九虞之祭。天臨清廟。昭升七世之宗。壓主思皇。椒闈若惕。恭惟皇太后陛下。性鍾慈儉。德備憂勤。嬪虞帝以曰欽。陟方浸逸。對文王之於穆。率祀惟恭。願紓坤極之思。益衍乾符之慶。臣屬糜民。牧莫效侯朝。云云。

正旦慰皇帝表

王正書月。景命維新。靈德在天。孝思罔極。運開曆數。哀動九筵。恭惟皇帝陛下。思道奉先。與時更始。王受同瑄。祭不替於元辰。帝見羹牆。禮益嚴於上日。願抑居諸之感。丕承擁佑之恩。臣屬守偏城。阻趨嚴陛。云。

慰太皇太后表

正月始和。律更太簇。昊天不弔。痛在思齊。曆數維新。官闈孔惻。恭惟壽和聖福太皇太后陛下。爲元氣母。與太極游。孟春而戒逾人。撫時其邁。上日而受文祖。撫治方新。願寬丕子之思。益重神孫之託。臣屬糜宣化。阻慰履端。云云。

慰皇太后表

羲日更新。治開泰象。虞雲浸遠。悲在乾元。駒隙易流。烏號何及。恭惟皇太后陛下。光輔先帝。敬授人時。元會衣冠。尙想熙明之政。月游劍鳥。忍聞永紹之名。願寬悼往之哀。悰益撫履端之昌運。臣屬糜一障。阻慰三朝。云云。

改元賀皇帝表

春王會於三朝。慶開景運。皇天佑于一德。治紀初元。正朔肇新。乾坤有造。恭惟皇帝陛下。春秋正始。曆數在躬。仰則定陵。開三傳之丕祚。近稽哲祖。基七葉之昌期。攸鳳曆以改絃。衍馮圖而卜鼎。臣親逢更化。適

綴承流揚偉蹟鋪闋休恪共侯度撫大平應昌歷謹授人時

賀太皇太后表

天王一統爲元載攷正朔太皇萬年齊壽同御邦家日月重明乾坤更始恭惟壽和聖福太皇太后陛下道符烈祖功擁神孫乾德太平訓實承於昭憲元祐盛際政共聽於宣仁洵開更瑟之休實繫垂簾之盛臣叨承侯服丕奉慈宸基正始之風已新美化播思齊之頌永載徽音

賀皇太后表

春秋以一爲元曆開昌運關雎之化正始本在慈宸正朔更新國家胥慶恭惟皇太后陛下有娥長發太姒思齊齊壽以奉太皇德惟子肖受福而于王母祐自天申宜渙號以繫年示同文而更始臣猥乘一障丕戴三宮當昌歷應休期已供侯服綏眉壽介繁祉益贊母徽

曆日謝皇帝表

乘龍御以紀年一元正始詔虎城而頒朔千里承休敬授人時對揚王命恭惟皇帝陛下明哲作則曆數在躬欽若昊天熙春夏秋冬之績建用皇極協雨暘寒燠之疇乃誕布於成書以昭垂於新治臣蕃宜有恪播告惟恭錫厥庶民順中星而平秩佑于一德歌化日之舒長

謝太皇太后表

歲正孟陬。一元改紀。朝臨長樂。萬國頌正。春朔會同。神人和洽。恭惟壽和聖福太皇太后陛下。怡愉萬歲。擁佑一人。肖德而有神孫。光膺昌歷。受福而于王母。丕輯蕃禧。載頒協律之書。式重垂簾之政。臣欽承鳳紀。誕布侯藩。聽嶰竹之歛。誕敷和氣。獻蟠桃之頌。益贊壽眉。

謝皇太后表

鳳曆頒春。東朝介福。虎城告朔。北面承休。歲定四時。天佑一德。恭惟皇太后陛下。思齊肅穆。少廣怡愉。訓示塗山。曆開禹子。教行渭涘。紀協周王。春朔攸同。乾坤交泰。臣承流下障。奉令孟陬。協和萬邦。第贊定時之績。嚮用五福。益陳曰壽之休。

疏

壽崇節本州淮功德疏

九龍吐水。當摩耶產佛之辰。萬歲呼嵩。上大母延年之請。敬憑二氏。仰贊千齡。壽和聖福皇太后陛下。恭願大安大榮。至愉至佚。慶雲五色。現南極之祥光。壽域八荒。衍西池之長算。

鈐司進功德疏

三寶曰慈。南極衍太皇之福。五兵不試。西江陶聖化之風。仗仙釋之殊因。贊宮闈之丕慶。壽和聖福皇太后陛下。恭願位隆少廣。算等崑丘。仰大慈尊誕節。正同於盛旦。得無量壽。長生永協於先天。

乾會節本州進功德疏

聖瑞虹流。開半千之休運。官聯虎拜。瞻尺五之清光。靄玉翠之祥氛。裒緇黃之妙果。皇帝陛下。恭願駁聲。克廣龍德。方中地久。天長壽命。衍洪源之慶。河清海晏。皇圖鞏磐石之安。

鈐司進功德疏

天臨寶位。夙開繞電之符。地領王鈐。載罄呼嵩之祝。謹率兵戈之屬。處脩道梵之緣。皇帝陛下。恭願玉燭。四時金湯萬里。元龜大貝。梯航來川。岳之珍。歸馬放牛。旗蓋壯東南之運。

天瑞節本州進功德疏

飛龍在天。大橫有兆。流紅貫月。景命維新。演道梵之真詮。嵩聖明之瑞節。皇帝陛下。恭願維天其右。如日之升。五百歲而生。已開昌歷。億萬年其永。益鞏皇圖。

鈐司進功德疏

爲天下君。祥書帝武。祝聖人壽。歡動戎昭。闡二氏之真科。崇千秋之誕節。皇帝陛下。恭願泰元有相。長發申休。在辛歲曰重光。方升如日。以乾元正五位。多歷斯年。

大行皇帝升遐本州進功德疏

帝棄羣臣。忍傳末命。教宗二氏。恭薦殊因。慨極烏號。戀深蟻慕。大行皇帝。伏願游神極樂。觀化太虛。十四

聖之在天。皇靈陟降。億萬年之與子。不祚綿洪。

鈐司進功德疏

出宮駕晚。縞素興哀。望闕臺孤。緇黃嚴薦。恭哀冥福。遙相宸游。大行皇帝。伏願性悟真如。道超無極。成慶而垂萬世。聿齊九廟之靈。後天而彫三光。長作百神之主。

皇帝聖躬違和保安諸廟疏

天子萬壽。詎期無妄之災。臣人一心。共徯有神之相。惟帝齡之悠久。實神貺之扶持。名山大川。尚鑒蘋蘩之意。普天率土。不勝葵藿之私。

本州宮寺保安疏

皇極九五福。合率土以傾心。帝壽千萬年。籲慈尊而請命。皇帝陛下。伏願寅畏享國。清明在躬。王受命無疆。惟休誕迎和氣。天行健自強不息。丕享脩齡。

鈐司宮寺保安僧疏

惟聖宅尊。共祝一人之慶。以臣請命。敬皈三寶之慈。皇帝陛下。伏願歷數在躬。神明其德。九五福曰壽。丕享康寧。億萬載齊天。式臻永久。

道疏

率土傾心。均願聖人之壽。籲天請命。肅殫臣子之忱。同前

大行皇帝遺詔本州成服道疏

道揚末命。忍聞晏駕之音。瞻仰昊天。上訴遺弓之慟。脩崇冥果。攀慕遐征。大行皇帝。伏願返于混元。光我烈祖。洋洋而在上。俯察臣民。剡剡以揚靈。永綏宗社。

僧疏

捧九天之遺誥。帝馭何追。皈三寶之眞乘。臣心欲割。

鈐司成服道疏

吳穹降割。悵宸馭之上賓。率土興悲。望帝庭而哀籲。虔資冥福。遙相仙遊。大行皇帝。伏願靈德昭回。皇明陟降。衣冠雖邈。會烈祖以在天。宗廟如存。朝百神而爲主。

僧疏

吳穹降割。慟玉仗之上賓。率土興哀。望金仙而仰籲。虔資冥福。遙相仙遊。

本州成服滿散疏

制嚴易月。痛君父之通喪。望極乘雲。薦人天之勝果。露香跼踏。釋經悲傷。大行皇帝。伏願堯性常存。舜明不隔。成慶而垂萬世。聿齊九廟之靈。後天而彫三光。長作百神之主。

鈐司成滿服散疏

捧易月之制書。萬邦哀痛。脩升遐之冥果。三寶證明。喪紀有嚴。孝思罔極。大行皇帝。伏願羹牆不遠。劍鳥如生。帝鄉而乘白雲。真游冲漠。係謀之注。豐水遺澤深長。

大行皇帝本州追嚴道場疏

維新陟王。悵皇靈之日遠。演大乘法。資勝果於天游。悼痛深深。薦言有俶。大行皇帝。伏願性超清淨。德邁圓通。生爲帝。沒爲神。豐功不泯。高配天。厚配地。明德無疆。

鈐司追嚴道場疏

皇靈冲舉。莫追汗漫之遊。淨業真如。式薦逍遙之果。終天哀痛。率土慕思。大行皇帝。伏願陟降太虛。超升無極。儼橋山之劍鳥。云云。

申省狀

辭免新除秘書省正字狀

具位文天祥照會。十月二十六日。伏準省劄。十月三日。三省同奉聖旨。文天祥除秘書省正字者。某猥以疏賤。叨被聖恩。望闕瞻天。莫知所措。伏念某。自叨親擢。未歷外庸。以讀書學從政之方。以奉祠爲書考之日。方竊山林之暇。敢圖臺省之登。負乘非宜。循牆無任。伏望公朝。特賜敷奏。令某滿足宮觀。兩考日。祇被

新命。其於出處得宜。庶幾無負聖明拔擢之意。所有省劄。未敢祇受。除寄本州軍資庫外。須至申聞者。

再狀

具位文某照會。於去年十月二十六日。伏準省劄。十月二日。三省同奉聖旨。文某除秘書省正字者。某伏念一介庸賤。叨竊非宜。加以從仕以來。未有庸歷。輒具狀申控。乞候宮觀兩考滿日。祇被新命。十二月二十九日。伏準省劄。十二月九日。三省同奉聖旨。不允。某除已望闕謝恩。擇日前來供職外。須至申聞者。

辭免知寧國府狀

具位文某照會。伏準尚書省劄子。四月十七日。三省同奉聖旨。文某差知寧國府。替朱應元缺者。起家超躡。望闕徘徊。伏念某實無他腸。粗有遠志。昔年憂國。冒當事任之難。數歲杜門。寧悔身謀之拙。屬明良之胥慶。念岳牧之疇庸。曾謂栖遲。遽叨選用。惟是某省愆已至。貶秩猶新。雖公論至久而愈明。而丹書未謂之無過。儻不量於出處。是自速於顛隲。欲望公朝。特賜敷奏。收回成命。改畀叢祠。使某得以讀書養親。安身寡過。他有驅馳之日。無非報效之年。所有省劄。已寄留吉州軍資庫。未敢祇受。須至申聞者。

文山先生全集卷之五

書

回胡僉判請交割

除寧海軍節度判官廳公事日

某仰德襟期。比布之竿牘。顯飭謝言。茲不贅吐。首祈崇炯。某幸甚。區區此來。得忝交代。意者。天將開攀拊之緣。使之拉湊。一至於此。惟是天賦偏於愚戇。親見聖主。懇焉求言。意應詔者。必有中今日之故。側聽逾久。無能爲國家陳大計者。私念上悔悟勇決如此。而某蒙恩至厚。他人旣不言。則雖疎遠。豈容避其責。是以積忱累日。冒死投匭。以冀一感悟天聽。出關席藁以來。首領且不自保。況苟官職乎。高誼不薄。猶以同寮爲情。連屈軒車。復畀翰墨。一吏至。又持公文以來。周旋曲折。無非眷愛。某感激不自勝。惟如前之義。則有不可孤長者之意。不敏謂何。某尙留此待旨。若數日後。威命不下。則是上憐其愚而寬宥之。某當歸且念咎矣。而非所敢望也。所有添差僉判廳公用。某一切不曾祇受。或郡府不以某爲不肖。他有情文。則恐吏輩爲欺。而亦某所不與知也。本須具狀申府。惟身爲罪人。不敢自擬於屬吏之列。得於畫諾之次。叙其衷情。則某之受賜甚厚也。臨風拳拳。

賀吳提舉西林

己未

某自九月赴京師時。請叩門墻。蒙警策備至。妙語天然。式相行色。篋笥間至今耿耿有光氣。第某解舟至豐城。及聞新局肇更。鄰靡茂畀。細讀仕隱不同轍之句。則雲駛月運。舟行岸移。轉瞬之間。已成兩樣。雖然。此非爲明公榮也。纓冠褰裳。世道有賴焉。某來上下以防鄂。故爲之瀕洞。聞諸闔雲集。而敵正不多。以此爲不足慮。獨賜教時。則衡陽之事。明公蓋已及之。而中外未之信。某以十月晦至脩門。則聞聚毒已并流。波浸漫。秣陵荷擔之事。蓋凜凜已兩月。中間新相至。則又得月十日定帖耳。然我之緩急。往往視敵之起息爲之。則定帖者。未可保也。譬如一間屋。前人放火。已燒及旁舍。僅僅得全宅未動。卒急得一曉事人。率衆拯救。雖千百擔水。未足以頃刻沃滅。明公蓋防防一大頭項也。今事莫如袁吉之急。袁以改畀明公。而鄉里又得平林爲重。時有明公。諸人必能一心同力。以障潰堤之衝。藉此無恐。帷內間則病根未去。履翁掣肘尙多。雖言路大開。而奸諛熏注之深。搢紳多不能自拔。徒聞應詔投匭。則學校與布衣而已。世變至此。可爲慨嘆。某不量其愚。輒上書論其事。區區以爲宗社有故。死亡亦在旦夕。不若犯危一言。有及於今日之難。其得禍與否。不計也。今出關待罪已三日。而上猶未見施行。未知後命如何。藉天之靈。祖宗之休。明公之庇。得全首領。而以周旋於義旅之後。不勝願也。而不敢望也。封事藁止於一本。付壁弟全錄以呈。似其疏狂。知執事不笑且憐之否。共惟節鉞交錫。旌旗一新。誼當專狀爲慶。顧世變至此。明公方任大責重。以與上下同憂患。某不敢作平世語也。惟明公亮之。引筆嚮風。拳拳不備。

某比道從鳴珂。幸甚獲下膺龍之拜。蒙眷愛稠渥。侍樽俎間者連夕。感激不自勝。別後。凡百餘日。數千里行役。貿貿於一來一往之間。大可取笑。伏承寶墨。鐫教備至。今天下大勢。所以削弱不支。實坐於文物制度之密。區區直欲割去繚繞。使內外手輕脚便。如此而後。可以立國。中書言規模大槩。所以纖悉上下。其說則未也。朝廷若不鄙而行之。則台諭欲列置一帥。如古方伯連率者。又當再商量也。區區之心。既不足以行於國。退而欲爲一鄉一宗之謀。正將擇險以爲依。集衆以爲安。但事勢浩大。不量其綿力。而欲舉之。善後與否。視無所及何如。某乍歸冗劇。使命日亟返。姑此治報。何當一日會晤。以請所未聞。

賀何尉名時字了翁

某頃揭揭入國時。江皋祖帳。爲意腆甚。感激之私。不自勝。別後。不圖世變沄沄。天下大事幾去。某始而駭。中而疑。繼而憂憤。又繼而大聲疾呼。以至於流涕出血。相去近百日。而展轉變化。以至若此。事變可畏矣哉。某學無涵養。不能謹其所發。倉卒來歸。求爲杜門循省之計。藉慶雲在上。以此月七日。善達鄉國。甫入境。側聞一同桑梓。若君實庇蔭膏澤之。以廉革貪。以明易暗。以神奇變巽懦。大冠縫掖。交以程吳歸焉。方謀奉狀至屏下。而紫氣煌煌。已移照鄰次。交臂相失。懷此悵快。當今事會方殷。人才不競。一杞二杞。國家常病之。今州縣之於執事。亦此類也。凋瘵瀕洞之餘。雖近於不可爲。而開繁被劇。如長才得以自見。可賀。

也。吉水之爲邑。得之朋友見謂。官錢無定額。賦無正籍。是以若此其竭澤也。平林以鄉人爲郡。念此至熟也。執事軍期之暇。爲之定制立數。求爲一定之經。惠幸茲邑。其庶幾乎。

上丞相除秘書省正字。辭免不允。

正月吉日。具位文某。謹再拜奉書于某官。某昨蒙朝廷不以不肖。授祕書省正字職事。某自念非才。未有庸歷。輒具狀辭控。旣而省劄降不允之旨。鈞翰重促行之命。伏惟聖天子之所拔擢。大丞相之所提撕。德至渥也。某一介晚末。跼伏深密。所知不出田里。大丞相勒名鼎彝。紀功太常。坐于廟朝。進退百官。而佐天子出令。下士之人。求望其位貌。聽其警效。不可得也。惟聞弓旌紛於阿澗。東帛徧於巖野。元德碩望。麟游鳳集於省臺之上。想望風采。以爲不圖此生。獲見昇平如此。詎意今者。宸命收錄於草茅。鈞畫照耀於山谷。恩光所被。震悸不自持。僕惟此舉。不見於今世久矣。夫大君宗子。居天位者也。宗子之家相。理天職者也。自一命以上。所以輔贊大君。彌縫家相者。皆將以分奉天之責者也。書曰。天工人其代之。又曰。欽哉惟時。亮天功。又曰。天命有德。天討有罪。天叙有典。天秩有禮。韓愈曰。天付人以賢知才能。豈使自有餘而已。忱畏天命。而悲人窮也。天命人事。常判然不相侔。而前言往傳。勳必以天爲訓者。人雖藐然。萬物備於我。苟爲凡民。則已大之爲聖賢。秀之爲士。天地民物。孰非一己之責。任重致遠。皆性命之當然也。由此觀之。用人者。非私於其人。爲人用者。非私於其用。近臣之得所爲主。皆所以事天也。此意不明。上之人。操其公。

器大柄以自私。曰：吾能以富貴人下之人，失其靈龜，貿貿於勢利之途而不知返。是以上不知以代天理，物爲職，而無復有以貴下賤之風。下不知以畏天，悲人自任，而無復有比之自內之義。天地失位，人極不立。人物悖其性，往往由此者多矣。伏惟大丞相勳在王家，意在人物，方且以不滿假處功，以不驕吝處才。開忱布公，集思廣益，嘉與天下賢士大夫，以爲共理。如僕庸愚，亦得自列於兼收並蓄之下，顧僕不足以稱所舉爲大負，而由先生此心，天命之所流行，國家之幸，斯世之福也。謙之九三，勞謙，君子有終吉。先生之用心以之，泰之九二，包荒，用馮河，不遐遺。先生之用人以之，孟子曰：古之人所以大過人者，無他，善推其所爲而已矣。由是而言，自可比功於隆時，垂號於無窮矣。僕雖崑瑣無足齒，其於明時，不敢自棄，求所以無負上帝之衷，仰承君相之惠，將盡心焉。某已於元日，祇被新命，謹別狀遵稟，惟是屬有私役，造闕之月日，尙此遲之，伏惟大丞相矜憫其情，而原其後至之罪，公爾忘私，國爾忘家，某之補報知遇，將有日也。下情不勝懇惻激切之至，謹奉書，不備。

通廟堂

溥論承
心制事

某仰恃鈞慈，直布心腹。某昨歲四月，遇先人本生母之喪，以服制未定，請之朝廷，遂作假俟伺旨揮。後來此申未及下，而某得劾，某以義起禮，謂先人若存，則於所生母當中心喪，先人既已矣，則某照承重例，遂承心制，自謂仁之至，義之盡，莫如此矣。未幾，龍溪友議板行，天下謂某當有重服，匿而不行，一時聞者爲

之疑惑。後巽齋歐陽祕書守道爲或問。衢州曾添教鳳爲詳目。二先生發此精義。禮意昭然大明。某竊聞龍溪友議。印本以萬本。閩廣遐陬。莫不有之。旣不能家至戶曉。須得朝廷討論墳典禮意。播之邸報。著以爲令。使天下知孝子慈孫之用心。而不至爲謗者所惑。是以拳拳致請。乞下太常討究一番。三月末旬。伏領鈞翰。特蒙先生照見曲折。謂其所遇在禮之變。所循爲禮之正。且如昨者。臬申已下禮寺。某以爲定禮典。正流俗。在此舉矣。四月三日。忽得承受人報。備至寺狀所申。乃引紹興休寧縣尉蔣永吉。與寶元集賢校理薛紳爲證。直指爲某合持齊衰三年。嘻。其誤矣。聖人制禮。自有隆殺。其隆殺本之人情。切詳蔣永吉之祖妾。直下只有蔣永吉。使蔣永吉而不服。則其祖妾爲若敖氏之鬼矣。所以爲孫者。須持齊衰。今先人之本生母。自改適劉氏之家。有劉氏子孫持重服。則主祀固是他姓矣。是以某體先人之心。則只當承心制也。況蔣永吉無祖母。今則某有正祖母在堂。何緣可爲劉母持齊衰乎。劉母之子。旣持齊衰。某又自姓文。何緣兩姓。俱有齊衰之服乎。又詳薛紳之母。旣稱爲祖母。萬壽縣太君王氏。則是嫡祖母也。當時朝廷止給假三日。只從孫之本服。所以薛紳再申。指爲先人所生母。謂服不可絕也。故有三年之制。此正是承重孫。又自與蔣永吉者不同也。禮者。不讀書。不講義。不明先王隆殺之意。往往只據吏人檢至故事。見有父所生母四字。便謂事體一般。鹵莽申上。更不會子細致辨於同異之間。今且未須論某所得服如何。且只論先人之服。先人之母。改適劉氏。旣有劉氏子爲服。且先人係出繼別位。又非本位之比。先人只當有

心制不當有齊衰。明矣。若先人有齊衰。則某當以齊衰。先人有心制。則某只合承心制。豈有先人本等。止有心制。而某乃有齊衰之服乎。朝廷所行。便作萬世不刊之典。毫釐之間。所當致辨。矧禮意粲然。非有嫌疑。又何難辨之有。某承心制。已一年矣。今非畏有齊衰。不願承服。但可惜禮官如此討論。萬一誤朝廷備據行下。恐國朝會要上。又錯添一典。故不免貽將來朝廷無人之誚耳。今看來禮官未必解事。先生揆之本心。若以爲某見行之禮既安。徑乞從都省點對行。萬一已照寺狀施行。亦乞改命。庶不悖於人心天理之正。而古聖人制禮之意。得行於今。其於綱常。豈曰小補之哉。

後朝命下。許令承心制。仍著爲令。道體堂書。

通江參政古心

某卽時甘雨。共惟宮使大參相公先生。芝山清逸。珍館宴超。天相有道。鈞候動止多福。某昨歲獲走一介。詣舍人門下。伏蒙鈞念。勞苦有加。祇服訓辭。至今疊疊。俯仰山林。感慨年歲。又若是其闊疏矣。某官百年幾見。一代共宗。司馬居洛。而相天子活百姓。都人西其首而望。張紫巖杜門白首。而嗣皇嗟嘆。用晚倚之。以向中原。先生今其人也。上方舉元祐故事。勤於夢卜。旦夕爰立言人人同。先生不以此覲於當世。而當世以此祈於先生。惟先生重愛眠食。以幸世道。某屏伏田野。蒙賴鈞天之庇。守先人墳墓。幸無闕狀。追惟兩年間。口語橫出。先生進而廟堂。退而江湖。德於其人。如出一日。傳所謂生死肉骨之情也。報答已知。言

語抑末。傾竭犬馬。尙庶幾於門牆。專人上狀。百拜起居。袞鳥皇皇。未遑納拜。心之沄沄。如此江水。仰乞鈞照。

通潭州安撫大使江丞相

某在門牆諸孫輩行中。而所以蒙鈞天造就。知愛綢繆。獨出乎諸生之右。然號爲登門。垂二十年。而至今庭下。無愈之迹。古人負笈從師。不問道路之遠。某乃不能自拔如此。殆不可對人言也。茲者。誠不自意。先生手提玉鉞。作鎮於重湖以南。而某適以臬事一節。奔走於賜履之內。昔者。詹企台階。坐霄壤隔。今乃得以詣大府。受約束。有一日歛板之便。豈天殆爲小子計乎。某始以親老丐祠。旣趣旨下。再請則瀆。於是姑以單車出門。蓋馳驅數旬。又須乞便郡歸養耳。某四月八日。辭膝下。留廬陵城中。始聞先生拜乾會節於清江。亟亟追逐牙纛。度宜春醴陵間。所蹉跌片雲間耳。茲專布狀。重謝不敏。且致恭先之悃。參謁邇只。迺風距踊。

與李復卿

長弟初赴臨安府司戶日

某比者吉蠲子墨。祇詢涓房。留連踰浹。甫拜答灑。蒙不彼外。感荷感荷。茲專布區區之心。譬弟不穎。竊第奉常。受官京兆。初欲鞭策向上工夫。故多求山林歲月。以自爲地。事不可料。欲緩得速。東行且有日矣。此弟雅欲致一朋友。相此遠役。大冠峨如。大裙襜如。服斯服者。不少也。而流俗薰蒸。靈龜磨蝕。區區所爲。例

指以爲迂。而他求所謂不迂者。抱膝長嘯。寡和奈何。執事氣貌餘子。言根古人。疇昔之日。幸接光塵。論議之末。共爲慨然。其誠有得於同然者。憑恃襟雅。僭欲屈致崇峻。以副前所期。此弟天資。每與義理合。喪本心以求外物。則自保其決無也。惟是閎深博邃之學。汪洋演迤之文。日力方來。正將從事。執事與之處。公餘得商略上下。交關互發。他日此弟。其殆非吳下蒙乎。某敢不知。自交際之道。莫重乎其初。輒拜此紙。以將盟言。聘資不腆。別牋并致。不敏萬萬。控謝不遠。

與孫子載

季弟與從弟從學

某聞古者。家有塾。黨有庠。士生其時。而爲師者。非其家之父兄。則其鄉之所與也。是以不獨屑屑於言語文字之末。而聖賢誠正脩齊之學。蓋皆在所法焉。小弟肩項相齊。學無以大相過。獨其性質之陋。而未有以開通氣習之浮。而未有以檢束。故脩業一事也。進德又一事也。某於古者父兄之教。既不克從事。則鄉評之峻卓。師範之尊嚴。是於執事乎歸焉。區區所以屈致之私。間嘗致稟千金之諾。敬聞命矣。交游之道。莫重乎其初。禮有聘。謹肅將以前。并令二學生。俯伏再拜。以立庭下。俾之有敬也。

與胡觀洲季從

某童而習之。授業解惑。有所自來。惟今父族母族。衿佩而立受道者。七人焉。將同堂合席。以私淑之。輒恃鉗錘之舊。爲此數字。以北面請歲。以緡錢百上之隸人。禮有聘奉芝楮二十千。明有初也。吾未嘗無誨焉。

惠徼福于夫子。謹謹奉狀。伏乞台照。

與楊學錄懋卿

字景堯。太學前廊。

某比僕僕來京師。幸甚。得下膺龍之拜。辱賜之不鄙。軫顧稠厚。關外之別。江皋之餽。所以致繾綣者尤甚。感激不自勝。第恨匆匆聚會。不及爲頃刻之情。以慰滿連年契闊之雅。回首天上。瞻企拳拳。茲有稟事。朋友蕭文。名來新。新參之客也。此丈可人。且身事端正。無復頂冒異同之弊。揭揭而來。欲赴春參鄉同舍。往往望白雲而歸。其巋然爲游學。瞻仰惟執事耳。其所參務本。適在德星躔次之側。特來展先達之敬。不揆適瀆。道其至前。得蒙與進。稍與之溫存。使不致落莫。區區之望也。

回祕書巽齋歐陽先生

某因朱月窗來。伏拜誨帖。辱問壁弟。意極拳拳。近僥倖受縣。一出師門。玉成之造。後生從政。未知嚮風。惟先生終教之耳。金盃在質庫。某處約之。甚恨未能自取之。乃勞先生厚費如此。山林中亦無用此物。先生儻乏支遣。不妨更質錢用。第常使可贖足矣。吉甫一去連旬。頗孤龍頭之約。時且向熱矣。奈何。因便介到城。伸紙行筆。嚮風馳情。

金盃。乃先生爲景獻太子府教授。講經徹章。上賜也。巽齋借而質之。故先生云然。道體堂書。

與前人

某尋常於術者少所許可。而江湖之人登門者日不絕。彼誠求飽暖於吾徒之一言。吾徒誠閱其衣食之皇皇。則來者必譽。是故不暇問其術之真何似也。先生之於應酬也亦然。今是書之作。爲一星士。姓朱。名元炳。字斗南。號月窗。則非前者之謂。是誠有取於其術矣。斗南。吉水文昌鄉人。去吾里三十。起田間。談命高妙精絕。盡奄同袍。試以百十命。應對如流。而人品之大槩。皆不差。異哉。術也。問其所得何書。則嘗汗漫於十數家。而其末也。會歸於李吉甫林開之說。吉甫之書。人多有之。以其深而不能詰。若林開。則人未得。其本者也。斗南會二爲一。而又以所得於數十家者。間出而證之。斯其所以獨步也。某旣與之訂正二書。又詩之以見意。其別也。欲詣門下求品題。某告之曰。先生品題甚易。至之日。爲先生請十數命。某也如此。某也如彼。爲先生鋪陳之。卽先生疊疊。豈惟品題。先生心肯轉相汲引。卽子命通矣。斗南曰諾。探其中欣欣然。殊無憚色。他人泛泛得先生增重多矣。未有如斗南肯以術而取先生之知者也。是書也。某何爲而不作。事出專白。故不他及。

與前人

某前月二十八日。因朱月窗來遠迓。草草一帖。致起居。不知是日。正先生到家日也。後聞稍避訪客。住某寺久之。然恐訪者。卽所在相尋。亦未必能盡避也。某九月十三日。方及門。值鄉榜未揭。此一月。中相過者有數。近數日。漸漸增多。來者必數百里。或百里。不容不少款。閑居寒薄。殊不能支。而妄有干請者。紛然多

不相亮。甚以爲苦。先生昔者於應酬亦苦之。今猶苦此否。嘗蒙見示。每許人作一文。如置一針胸次。今某畏爲文詞。亦類此矣。習嬾亦是病。先生以爲如何。念久闕尊候。亟起援筆。請所以誨朋友以某遠歸。間有以羊麪問勞之者。某不敢私。輒以一控一石。獻之庭下。某昨在宣州。不敢携木瓜。宣州人相忘。近卻有以此爲意者。知先生嘗須此爲藥物。謹并奉四枚。一笑留頓。幸甚。

回劉架閣會孟

某伏蒙專劄。重示先夫人誌銘。伏讀驚愴靡已。古心先生。藻發清言。垂光罔極。慈靈有知。含笑地下。若此。可以無媿人子矣。遠日倏至。柳絮載途。追送傾城。素車銜尾。某於夫人。契家子弟。以故不能攀望。引緋。負負幽明。不勝愧恨。謹成些章。一少紀哀慄。以授挽者。伏想隨車號痛。涕如綆縻。孝在顯揚。願寬毀瘠。臨紙下情。凄切之至。

回衢教會鳳先生

字翰陽
號秀峯

某數月於師門極間闊。顧山水荒唐。不自知年歲之運運。闕禮多矣。尙庶幾先生。索之於形骸之外。別後得二子丙寅戊戌庚戌丙子丁卯壬寅甲午丙寅命。不知孰勝。乍嚮風水。卽得三地。此須巨眼。以爲然則然。向牛肉坑所結砌者。今知其大謬。爲棄屣矣。深之昨所問館成否。何所固必。新正詣清湖行禮。亦不見訪。往往泥哭則不歌之意。非有他也。屋見說漸就緒。先生鼓舞倦矣。宜作意身事。悠悠何爲。行日可得聞。

否。春和景明。其聞一造盤谷。亦可遍觀。先生所謂寶者。更願撥剔而後來。一來須十日。乃可歸爾。悉俟而賦。此不能盡。

回李宮教應革 號肯堂

某頃以附伯昂令姪書後。未悉起居。深之令弟來。聞病目少寬。爲之喜幸。日欲專价。詳問飲食坐臥之節。塵坳因循。心甚愧之。昔人云。身在則有餘。舉天下紛紛藉藉。不如意事。屏置度外。專精神事醫藥。靡有不濟。恐吾目所受病。方將驅除。而又重以吾心之不寧。是滋予疾也。用敢於岐黃忠愛之外。輒奉清心一方爲獻。願於大學第七章。加三思焉。偶壁弟有介歸。就有京書達左右。輒并遣前薄物將忱。徒覺塵瀆。臨風馳泝。

與朱太博埴 號古平

某山中相望。數舍而遠。乃心精微。無往不通。僕十年受用順境過當。天道反覆。咻者旁午。七八月以來。此血肉軀。兀立於砧几之上。蓋粉毒手。直立而俟之耳。僕何所得罪於人。乃知剛介正潔。固取危之道。而僕不能變者。天也。僕誠不自意。乃於寒舍千步外。得一陂陀。溪山泉石。四妙畢具。委曲周遭。可十餘里。蓋其景趣。兼盤谷環滁而有之。而其曠遠縹緲。或謂南樓劣焉。騎馬囊飯。朝夕還。率以爲常。而山外事。一毫不接耳目矣。僕嘗羨君家山水之勝。幾欲作意植杖其間。而未能也。然自以爲旦夕必償所願。不知吾壺

天可以屈公一來乎。烟霞泉石，此不足與俗子說。處知音者自不同。正恐不問主人，徑造竹所。余月心來，拱被寶墨，惡乎而不用吾情。適凝祥觀蕭道士來訪，其別也。曰：吾將造古乎？爲之書以復命。旦道予懷，而假道士爲郵焉。

某比及門，卽拜狀。聞車騎在郊外，正欲嗣訊。韓星忽來，偉然朵雲之贈。故人渠渠，勞苦行役，諸兒那識此意。曉起入山，新流沒岸，棋聲未盡，石骨依然。人生往往如此，盈虛消息，道體流行。仁者謂仁，知者謂知，可超然一笑。承有訪剡之約，上已前後，擬山行數日。須主人在竹所，方可乘輿分沙一席。已戒白鷗退避矣。呼燈走筆，馳意淡寥。某比及門，又一首。極有磊隗，欲從執事傾倒。一日雲山浩渺，渺焉余懷。忽拜羲獻帖，宛然玉

立之參前倚衡也。垂諭前城李氏事，讀之甚駭。近有假爲黃節幹者，騙寫其家田莊鄉廩，旣見之發覺，昭其迹於墻壁間矣。曾鑑何人，又肆無狀，欺愚嚇鬻，一至此耶。某平生所立，謂何豈有退居林麓，省咎敬威。我自爲我，而青蠅紛紛，每使惡聲至耳。莫爲而爲，莫致而致，非命也耶。勢不得不榜，謹納一紙。幸轉之李氏，以破姦猾者之爲，使人日爲此等救過之事，不勝浩歎。某向者因及執事出處，常誦伐木之詩。今書所云，猶若未悟。稟答之次，臨紙惘惘。

回鄧縣尉中甫

某入山愈深，於所尊敬，嘻其闕矣。前年足下以書議禮，得一往復。最後賜誨，迄今不能報。論其形跡，何前之恭而後之倨歟。坡云：人情重往復，不報生禍根。后山云：一詩已經年，知子不我怨。人之度量，固有相遠。

執事知我宜可無前日之事。今通國識其用心。由其未定。而言辭之不可以已也如是。自其定者而觀之。輕重銖兩。固皆當然。言語文字。幾乎閤矣。昨書皆精義所發。卷爲一通。謹而藏諸。後有作者。將爲此興起。客從巽齋來。能言執事日從翁樂甚。因款客坐。亟亟援筆寫此。悃結授客。以轉之左右。學之不加。感慨年歲。山澤雖遠。尙惠一言。臨風拳拳。

與顏縣尉復古

某自春末。得一夕承顏色。接話言。外此皆瞻仰之日。追憶是數年來。書筒無虛月。分袂亦不太久。未有如今之疏者也。然私竊自解。則曰。此其迹爲然。不足深計。知足下得我同然與否。茲者。恭承少迂蓬山之步。暫爲梅屋之游。脂車有嚴。滌篆伊邇。豈勝贊慶。執事自此開張清途。摩拂碧落。固其分也。願徼富貴利達。以自致其身。貴且重者。崇論宏議所鄙者也。不當薦是爲賀。惟邑於民社爲最親。惟少府於邑爲最要。平生學問。藉是得以展布。潘輿康寧。千里迎奉。調熊嗜苦。式慰茲願。是二事深足爲年丈賀也。某雅聞說者。以某日戒途。懷是惓惓。將祖帳道周。杯酒爲壽。屬有牽制。不能來。謹上狀。并致泊禮。以昭區區。惟容頓是幸。川平陸夷。行者有相。惟秋深殘暑未央。更乞頤輔崇重。以前三接九遷之寵。隨軒德輯。伏想喜氣。方來錫羨山。則別後或有鄉邦驅策。敢不下拜。

某歲杪得承便駛。遣以瓊灑。故人千里之情。藹然可掬。感鏤其如之何。茲得嗣書於令弟來歸之便。尤見

崇篤喜審議論於帷幄之親。出入於錢穀之會。蒲腔磊隗。庶其有以自試矣。來教自咎。以爲浸淪汨於俗吏之歸。此意固超人一等。孟子論仁賢。而必望其有政事財用之效。蓋績用聲猷。不可相戾。本末一致。焉得就此以遺彼。自賢者徒以清浮爲高。而無益於實。然後小人得以事功自詭。今日挽回君心。轉移世道。吾輩正不得不自力。尙可以俗爲尤乎。伏惟尊同年。其懋勉之。頃承刊委。比於敬巖之前。亦屢說項。非某私於所親。名德如許。區區欲自默。本心疊疊。自有所不肯。此老亦既有所許矣。坐席未溫。遽爲林麓之歸。一場說話。又付畫餅。雖然。長松在林。利錐處囊。翹翹傑傑。旦夕諸公爭羅致。不暇瑣瑣愛助。何足爲說。某奉祠侍親。頗於讀書。有一日之樂。朝市紛紜。怨謗之府。某雅欲退藏。以遠罪咎。賜教極得同然之真。或政事有足爲庸陋矜式。毋惜刊曉一二。因以具報。情惻非筆。可旣專規。嗣布。

與聶吉甫

某於斯文契闊。數年於此。載酒問奇。豈非夙心。而相望百里。離羣索居。甚負此愧。以其傾嚮。輒私布之。先人季子生二十年矣。號曰學文。實未知方。有從第一人。同堂而習。年相若而學相似也。閣下沛然古作。藉甚時名。所欲北面而從事者衆。區區欲使二子者私造化焉。聞者疑其不可。諗之朋友。固以爲請。不圖閣下不鄙夷而許之。敢專書以聞。閣下屑與之盟。豈惟二子得以受教。僕也不敏。實嘉君子之賜。援筆荒蕪。臨風切切。

回王國智

某歲前作稟字。輒致松栽之請。專夫十餘。虬孫載道。一日寒破吾屋。卽乘天時。遍布滿山矣。異時車馬相過。山神欣然迎拜。必曰。此吾東道主云。擾甚。布答膚率。別作謝狀。

與劉司戶三異號古桂

某自別。不獲奉起居。忽聞小爽調攝。昨見當風輒睡。不禁生冷。嘗憂其必爾。看來衛生之書。誠不可忽也。心遠云。來時及拜問。已幸勿藥。極以爲善。暑天將理。正未易。某欲助數藥。而不知當用何品。謾遣芝楮百千爲意。且宜深自愛護。候其可出。見訪未爲晚也。南史正本。遂可得否。便中謾得介意爲荷。詞候草草。他規嗣布。

與胡端逸

自別後。日在山間。搜奇剔怪。得二所。曰闕微。曰上下四方之宇。幽閑曠逸。超偉軒張。其奇又在中磯兩峯之間之上。君再來。足以抵掌大笑。翠晚又改曰浮嵐暖翠。釣雪改曰六月雪。特立改曰至大至剛以直。我非好怪。地適足以當之。君謂如何。新昌弟一介至門。館穀之議。諧矣。專人導其來庭下。請君蒞盟。江南春小。天和景明。山靈川后。畢獻萬狀。欣然有應。接佳客之意。不遠二百里。杖屨容與乎其間。不亦可乎。凌遽信筆。未究欲言。

與黃主簿景登

名瀨

某輒有所請。鄉州有俊傑士曰胡君。名天驕。端逸其字也。十年前。學校定交。意其旦夕獵獵乘青雲而上。尚遲決科。蓋其命然。心甚敬且念之。來山中。聚首半月。且留度重陽。問其館穀。則未有所嚮也。此君有能賦聲於應用。更高好自脩飭。不爲流俗。足下若與處。日從三益。豈曰小補之哉。其家事自好。而嚴君主之。端逸歲得百千上下。則從人泰然矣。萬一賓廡無虛席。則明年君創員以料理之。多費以取友。美德也。端逸留山中。若蒙雅報見及。相其受幣而歸。是所至願。

與劉正伯

知瑞州日

某江滸分攜。流光如駛。每荒城雲合。笛韻沉沉。吾故人之思。未嘗不往來于懷也。秃筆鉗書。曾無暇晷。東風順翼。乃有飛牋。如之何不喜。執事垂光。虹蜺濯髮。雲漢少須暇之。駕秋濤而湘春錦矣。燒尾光芒。薦靈角尺。山中猿鶴。先侈光榮。某癡事未了。誤渥徵行。三辭弗命。旨且俟代。持其觚落不敏者。如之何而任劇哉。託愛宿昔。不同他人。何以教之。因風馳泝。

某久不交訊。坐積尊仰。忽蒙專价。惠報寇事。桑梓驚動。南望惻然。正具復間。得鄉里信來。乃聞十六日破玉山。次日破新安。吾鄉必不免矣。財物所未論。屋廬所未論。不知一鄉人命。是時得脫與否。未有嗣音。爲之哽咽。已作書控倉使。乞兵剿滅。某即日交臬事。當以滅寇爲第一事。毋慮尊公朝議。近況想安適。謹附

拜一忱。郎君新功日富。次者且聯翩而上矣。可慶可慶。草草修染。愧甚。膚帥。

回鍾叔玉三帖

某杜門避影久矣。出山一事。不到夢寐間。聞命誤節。湘羅笑人。方循墻丐祠。以安半菽。倘拜俞音。春晝花陰。猿鶴飽臥。亦五雲之密蔭也。衰褻渠渠。餽禮郁郁。固不敢當。亦不得不拜。草此稟酬。尙規齋謝。某昨承令嗣子京相過。眉目森秀。真可喜也。承以至德觀牌爲諭。便筆偶已染就。今謹封納。切希視至。伏拜寶翰。寵有臺餽。塗抹無羊之詩。珍重來牟之意。我之懷矣。我之懷矣。親戚往來。本無所不可受。獨其名曰。前日嘗爲某事也。若然。敢不重拜以辭。吾黨相與。誼如一家。緩急相赴。情之所有。而足言謝哉。非曰不恭。其所操挾如此。薄言稟報。未旣由衷。仰幾台亮。

與隆興黎節判立武探花。

某自大名震盪以來。吾江西一佛出世。引領願拜。實不知前此固嘗坐下風而揖餘光也。去年汗漫一出。道過清疊。邂逅捧檄。歸省江皋。草草相見。道舊恍然。驚喜過望。至洪甚恨匆匆。郵亭晤語外。無從嗣集。蹤跡展轉。重見黃花。所思天一方。令人回首。某恃氣類之同。輒以士薦。漕闈新貢元劉君子俊。吾鄉清淑之英也。所居門巷相接。文學卓然。可稱遠器。今年以登仕。得舉士者以爲晚。旦夕詣星臺下。謂一世龍門。以未執鞭爲恥。敢告賓榮。許其漫刺。見所未見。劉君歸可以語人矣。西雨南雲。臨筆馳泝。

與劉民章子俊

某自湘花別後。其人如玉。夜夢見之。名網猶兔。豈然不足。以得橫天之翼。每爲咄咄三嘆。空同上得書。乃知猶爲脩門客。何留滯周南之甚耶。詩云。京洛多風塵。素衣化爲緇。又云。棲鳥戀舊林。池魚思故淵。青山屋上流水屋下。歸來自有樂地。乃欲以外物之盈虛。爲面顏之有無。爲執事者左計也。乘興而返。萬里足下。可以遠道爲諉乎。某昨報舍弟。令贊千騎之歸。爲奉薄贖。想已稟達。歸哉歸哉。臨紙引領。

與梅制幹

自去年滄浪使者歸。米氏真帖又三四。往往多從景明便雁來也。洞門窈深。雲山千里。騎黃鵠。跨白鶴。恨不得一日共君其間。風雅比興。韶鈞交作。長軸大冊。一再寄意而不倦。鬼神闕吾山數千百年。今而後衣被雲錦。草木澤澤。光價益倍。章之三十二詩。四時朝暮之變。皆有其象。獨以一詩當一境。則有不相似者。混萬顆珠璣。作一片圖畫。而江山無異辭矣。謹頓首謝。頓首謝。子秀別三年。漸成六考。通籍金闈。止爭浮圖一穎。近書謂赴吏部銓。將取一闕。人豪如此。猶落骰子選。豈非朋友之責哉。歲月易老。功業宜壯。早改官去。卽伏糜建節無滯礙。男兒事庶幾哉。某當年間。亦大參差。江西代者。激爲波濤。使人彈指剝剝。賴君之庇。天日皦然。今可以適吾山水之陶陶矣。比詩云。日日騎馬來山中。歸時明月長在地。但願山人一百年。一年三百餘番醉。君念我。悉度欲知我近況。不敢不白。某惓惓故人之意。豈一飯而忘。顧數百日內。不

能專一价。附書殷郵。又不敢信。以是契闊詹仰。充塞懷抱。而未有以發也。李彪請假歸。道出琵琶亭下。率然伸紙。意之所至。不擇言語。臨書神爽飛動。

與杜教授抑之

字伯揚。號帶溪。崇仁人。李梅亭高弟。

辱早春第一帖。遠佩意甚真。每一念吾弟。輒思老成。吾弟一出。幸無他。微執事教訓。何以臻此。不知菖蒲前後。書琴得至山中否。近來心思稍清。頗得專意研討。亦時不廢吟。向嘗令吾弟訪問南史正本。與晚唐百家詩。想亦可得。如未也。執事試致意焉。古桂留館中。日得誦習毛詩。因知求選於選。止可爲選之子孫。求選於三百五篇。則選之兄弟可進也。相見當爲執事傾倒之。偶遣一价。信筆布露。馳泝雲表。

回謝教授愛山四帖

雖塊坐深山。於時高人韻士。鼎鑪獨無耳乎。載酒問奇。道之云遠。徒有是心。而未之能也。不圖五鹽道院。屈居仙客。階蘭砌玉。與亭芝相照映。每思吾仲。取友必端。未嘗不自歎獨學之陋。手書寵貽。清揚流動。雖未見。猶旣見矣。何時簪盍。慰此忡悒。臨風馳報。書不盡言。

寒簷積雨。抖擻無悰。得書而讀之。昏眼爲拭。某落落白雲間。一疇春綠。自飯吾犢。淨世榮辱事。付之山外。褒惜所蒙。君言過矣。然醴露濃郁。波及溝斷。企瑞芝而遐眺。佩金蘭之永好也。美人一方。書琴自適。爲誦停雲三過。

日於仲氏便价得書。振衣快讀。恍焉眉宇之迫吾睫。可人不來。蒼苔滿徑。得無忘把酒看山時約耶。西風逼人。桂香浮動。天池鯤化。搏扶搖而上之。捨愛山其誰屬。魁卷紙一幅。納之文房。衣被琳琅。騰翥光景。褚生輩亦將侈其逢矣。薄言占復。掛一漏萬。山中度日如年。落葉蕭蕭。涼月墮砌。起視寥泬。安得知己。握手長吟。寫胸中之耿耿。以相慰藉耶。杪秋餘熱猶壯。二豎者雖相戲。而不吾虐。子亦從其所爲。倉扁輩未嘗屑屑然也。久之。不覺脫然去體。是又不治之治。有勝於劑餌者。寵貽手札。問勞渠渠。故道其所以然。而以復于執事。

與廬陵劉知縣庭薦

采山釣水。飲食於大夫之境。三年于茲。門無公事。得至於百里之室。幾於魚游江湖。而忘江湖矣。伏諗解印。西歸揚舟東下。昔者河陽之李。今茲南國之棠。諸父兄弟。服習長者教訓。恨不留鎮此土。雖然。此一縣之望也。縣私士子。人無所不治。是中都索包。總有相道焉。行矣。僕將大其所觀。某山深閉門。杳無城郭。信風傳令。尹新舊之交。未及馳慶。乃承上書。顯走告別。江頭折柳。奈何不敏爲之。漸對將命。四壁空寒。一無可爲。載月助者。知心天遠。解后何年。詹沂風帆。江空渺渺。

與廬陵李知縣說孫

某邑人也。聞令尹之來。不能隨父兄子弟。迓千騎於郊外。敢自訟以書。惟高明察之。某茲審承命九天。泣

封百里。初條甫下。闔境爭驩。諒爲慶愜。某官氣宇鴻明。風猷駿厲。脩程步武。空萬馬以無前。清水鋒芒。解千牛而不頓。吾廬陵號壯哉縣。詞訟雖繁。而詩書之家衆。版籍雖廣。而期會之事省。約之以清淨。捷之以平易。以公之才。恢乎有餘地矣。會成美錦。適趣溫綸。某骯髒一世之沈浮人也。所占籍處。在治所之南。三舍而遠。雞豚可千戶。民淳俗厚。僕也相忘於漁樵。而今而後。其得一塵之託矣。僕實何者。首辱賤函。以此事當路之尊貴。則有矣。區區何足以當之。輒裁賤賀上。并鍾鼎大名。歸壁涓吏。伏楮卷卷。

與廬陵陳知縣堯舉

昨歲京華。天作解后。每念晏公在陳。歐公在穎。一宋二蘇。千里往訪。竟日從容。以某不才。受知場屋。且二十年。良覲乃僅如此。視子瞻子京諸公。不知何地著愧。匆匆汰去。過荷遠將。一日江空。暮雲如水。渭濱之首。寧爲他人回哉。茲者。伏審肅持鳳檢。出宰螺山。車馬實來。旄倪胥舞。伏惟驩慶先生。聞多而學廣。事熟而心精。筆力千鈞。捕龍蛇而獲虎豹。雲衢萬仞。騎麒麟而翳鳳凰。未秣馬於天津。乃著鞭於雷邑。竹松林裏。不妨簡編之尋。桃李蹊邊。細數枝柯之長。小紆盤錯。便起扶搖。某閉門山中。傳來邸報。忽覩先生。爲吾邦一來。古人重師友。至有塗竄片言隻字。以冀萬分益者。鳴絃千室中。有老門生在焉。知公不能用其恕然矣。惟素性疎嬾。無城市蹤跡。謹避聲利。不沾借於公私。自今以往。陰陽和。風雨時。曉猿夜鶴。左花右竹。吾君吾相之恩。亦吾座主之惠也。剽聞前茅在郊。謹具劄子候迎。臨風馳往。

回樂安唐知縣元齡

深山中俯仰漁釣。久闊時牋。使者忽來。計一往一返。殆幾千里。君之厚我。感無有極。他人作縣。驚喘若不可以一日。先生爲之。優游政聲。洋洋乎盈耳。難易殊絕。蓋必有爲之本者。旦夕細滿。綸綍在道。璧弟以斯文受知。僥倖通政。書來謂注邑當在春季。繼此望洋方新。尙賴教誨。庶幾自淑。刊曉寺記。徵獎予不及此。惟平生於浮屠無所見。非敢有所攘闢。於其家數。全不曾從事耳。恃愛直布。尙寬方命之誅。嘉貺頓拜。薄物非所以爲報。臨風悚仄。

回劉運使應龍 號實齋

比承一介使人。陟我山麓。問外自梅外來。執事惠綬一日之好。其與人也。重以周。則旣感激所蒙。致其多謝之私矣。未數日。從驛吏取近報。伏審升班西閣。移節南昌。提封不隔於故家。父老相誇於盛事。仰惟慶愜。某官楊休山立。玉潤金相。方其爲御史也。風采所撼。聞者凜栗。及其將指於楚越也。滿腔惻隱。人所不滿之處。入羶入細之規模。可以概見。歸來麟閣。還本等地位。已竊遲之。江西涸鮪。延首福星。誰爲朕行。弄印未決。公未至闕下。就道相屬。亦曰。此公鄉里。煩公歲月。又將出少府節。召公歸矣。其嚮者得節。亦曰。鄉部。後來召駕。數月而不休。嘗試思之。近年如宏翁矩翁。未嘗不漕本路。而二老之所以鎮壓羣動者。年德位望。自是過人。而持斧之役。旁午豪譁。又非計使比也。今執事繼二老芳躅。仁聲賢聞之著於人久矣。萬

無不及。惟有過之。此所以宜賀。而僕之所以亟拜此書也。前茅出嶺。聞已多日。勢必馳上巽書。歸鈞山以俟命。上方屬意賢英。亟疾其驅。惠我江國。臨書不勝瞻依之至。宏翁。包宏。齋名恢。矩翁。曾矩堂。名顯。戊。

耕釣山澤。飯疏飲水。不自知歲年之運運也。使者維何云。自南浦。飛雲五朵。居然下之。寒谷陰崖。水霜積。沍。春風不擇地而至。有如此者。某官天和粹穆。地望高。清。夜占天文。福星直斗牛之分。薄蓬萊。厭承明。爲桑梓。此來。鈞山之下。雲露噴薄。油霖甘露。流注乎大江之西。部人歡呼。吾父吾母。帝曰勞止。歸遂相予。僕何幸。身親見之。某山人也。其於當路。厥有等威。不敢屑屑竿牘。致歲時之敬。謙尊而光。禮出倒置。德盛仁熟。悚然稽首。落霞孤鶩。水天茫茫。旣不克偃。僂請拜檠戟之下。心之精微。寄此函尺。永言歸嚮。江流知之。

與袁守雷侍郎宜中

號奮身。

某前年赴宣州。道滕王閣下。望山川英氣。稽首人物。欲擁篲造門。而舟車異趣。僅能拜書。問花竹平安而已。亡何蹤跡展轉。不遑嗣音。歸臥蒼苔。益以疎闊。其戀戀門牆之心。固如水之必東也。某比者。伏閱邸報。竊審小紆紫橐。近擁銀符。吏竦旌旗。人傳襦袴。共惟驩慶。欽以某官抱經濟之祕。稱磊落之豪。青天白日。鳳凰百年。美瑞高山。深林龍虎。一代傑魁。上方寤寐側席。圖致太平。甘泉舊臣。不當越在遠服。名藩歇馬。姑曰起家。徑執事樞。旦夕有詔。某庚午一出。殊與戊辰相似。去住匆匆。取笑當世。杜門深念。益求寡過。未知所以稱塞於知己之道。君子不棄。尙惠教之。某久聞紫馬赴鎮。空山不能專介申賀。適逢過客。輒寫其

私以自附於大廈燕雀之後。相望一方。馳泝切切。

與中書祭酒知贛州翁丹山

名合

晨起冠帶。輸寫積誠。世俗竿牘。曾足爲有道者言。惟高明索之形骸之外。某責原白鷺書生耳。童子何知。乍習句讀。凡先生之精神意氣。粲然於言語文字。公之天下。以淑後學。某皆嘗得以朝斯夕斯焉。衣被遺餘。曾不自意。早以名知於人。有我師焉。生同吾世。驅馳四方。乃不得解后。某日夜興起。謂當何時。而後得免於常人也。流年堂堂。實勞我心。共惟某官。孕光岳之精。參天地之運。大忠大雅。萊公文正之心。不倚不偏。伊洛考亭之學。斯文落落。上帝惠顧。天門夜下。龍虎章授。公以柄轆轤璇璣。經緯星辰。公從兩制。稍發蓄積。然後坐之廟堂。爲天子興建禮樂。洗千載房杜之陋。太平之期。適當今日。某退歸以來。有泉石十里。足以爲適。浮空變態。日過其前。飯疏飲水。自求吾志。竊伏思念。空同鬱孤。如在屋角。平生惜結。云如之何。輒因此時。以姓名通之門下。一言終身。尙庶幾焉。圓丘慶成。上方親事。少府出節。必以公歸。迎拜東帆。螺江之滸。以其時可矣。山斗高明。臨風切切。

某伏自空同玉節。順江而東。獲從中流。迎候鷁首。雄文鉅冊。間。想象變化。如高山深林。龍虎不測。不圖解后。遂拜堂堂。風流雲散。一別如雨。金聲玉色。夢寐以之。自先生振衣登朝。手提文印。以照四海。國家誥令。典冊燁然。先秦西漢之上。學校之士。莫不從風興起。彬彬郁郁。爭自磨濯。以正法眼。作大宗師。世無歐陽。

不當在弟子之列。某知稽首矣。主上尊德樂道。師用賢哲。論思獻納。日聞正言。孔孟不得用於周。光禹竟無益於漢。才與誠合。學與位偶。儒者之遇。未有榮於此時者也。大學之功用。至治之福澤。何幸身親見之。某疏脫之蹤。分安山澤。起家誤渥。忽畀龍藩。聞命彷徨。莫知所自。如聞天上聲光。假借非一意。若可與從事斯文者。自古聖賢之佐。英豪之輔。莫不垂意人物。薦進拔擢。燮天功。經人極。罔不在此。其惟盛心卓犖。度越流俗。而某則非其人也。夜瞻紫微。徒有頓首。脩門懸隔。久曠音題。屬請事祠官。冒馳一介。輒鳴忡悒。未卽趨。願言玉持金護。爲世道自力。臨風切切。

賀翁丹山兼憲

某熟視一世。靡然風塵刀筆。何從縱橫旁午。架漏於士民之上。而世之言人材者。率如是而已。安得結輩落落參錯。布滿天下。使萬物吐氣。僕嘗擊節於斯言。悠悠空山。誰與語此。茲者喜審肅將繡節。通洩銀符。山川不改於空同。風采一新於江右。其惟某官淵源接乎諸老。氣概聞於當時。人物眇然。真中流之巨屏。文章偉甚。稱南渡之當家。輩行諸公。鈞樞十九。夜半一劄。趣歸蓬萊。以其時則晚矣。上方式敬由獄。乃眷西顧。非有志念。不足以洗冤澤物。非有力量。不足以懲暴詰姦。故予環之寧遲。而乘傳之若屑。太平之責正在方來。以公歸兮。政枋焉往。某碌碌不如人。獨有愚戇。不能改其素。追記前年。冒乘君子之器。他不足道。惟姦宄豪橫。稍稍鋤擊。淺之爲日月。雖未得盡行吾志。庶幾無失職之恨。人情卑淺。憚繩檢而樂姑息。

矧猶未免鄉人譁說。朋興以要。其得罪於小人也。果矣。伏惟先生。昨者不賜鄙夷。心聲往來。藹然氣類之意。某誠不知何日。得以執鞭下風。勿覩除綸。心目開朗。我輩從事。俗吏奪氣。豈惟爲一道賀。實足自壯。謹專人上狀。頓稽庭下。少伸門牆燕雀之悃。蘋藻薄羞。別紙惴悚。

賀江東憲方逢辰

號蛟峯

某當公在螭坳時。嘗奉一紙書。至于閣下。書上未幾。而公歸蛟峯矣。譬諸草木。臭味實同。詹望雲山。臨風切切。某茲者。恭審升撰祕丘。宣威直指。西臺與政。蓋嘗識穎濱之文。東路洗冤。亦以行濂溪之志。六絲初駕。一佛歡傳。共惟某官。色正而芒寒。揚休而山立。言語妙天下。材稱一代之奇。出處重本朝。望在諸公之右。自夾侍玉皇香案。等而上之。胡不均弘。俾執事樞。國家重史迭之制。江湖一節。煩公驅馳。式敬由獄。以長我王國。公所學在此。歸哉歸哉。中詔在道。某山林之下。靜觀世故。其於君子進退。安得不致其卷卷。芝山父老。迎擁星輅。以時考之。可矣。輒馳一介。自附於門下燕雀。江水東西。心期天遠。臨紙欲飛。

賀前人除江西漕

某束書歸隱。有釣遊之所。曰盤中。兩山對峙。間以小溪。日步溪上。極目滔滔。輒自以爲晝夜不舍。此溪水會有達鍾陵時。而某愧守漁樵。則曾此水不若耳。昨孟君陸從番易遣介來。嘗爲書附申起居。相望千里。亦不知上徹果何如時也。某茲者。伏審班仍寶殿。節峻冰臺。貫索沉沉。方轉芝山之曉。使星冉冉。又回南

浦之春。一水東西。二天今昔。伏惟歡慶。欽以某官。寒芒五緯。絕岸孤峯。生漢子陵之鄉。雲山一日。派唐處士之譜。風雅百年。雖已跨海而望蓬萊。猶肯濡絲而陬原隰。濂溪道詠。雙井詩香。流馬木牛。旣無媿於千古。落霞孤鶩。應可對於二公。所謂旂常。特吾懷袖。某砭兀抱虛。真無所用於世。曩六轡使江之左。每依餘光。以自映帶。今也一畝之宮。環堵之室。囿德宇而處。自茲以往。夜月如水。猿鶴不驚。田夫芸子。各適所適。則何啻如天之福。郵傳所至。不勝燕雀私情。卽日謹奉書爲賀。臨風馳泝。

回許祕丞自

號果齋

某火龍之歲。從集英門。綴行而出。風流雲散。回首參差。不自意去年待罪闕下。獲接英游。心事流行。日星垂而河漢流也。湖陰送客。風露滿衣。移語崇朝。英槩震疊。歸去來山中。至今夜夢見之。新昌小弟。夙被獎知。嘗察之情。始終一日。倂來遞示五雲。光怪照室。此豈四海九州無情人耶。鄉風九頓首。尊年丈山立時行。日光玉潔。長樂鼓鍾。西清帷幄。終當著身風日不到處。轆轤雲漢。經緯星辰。爲天下開文明太平之運。某被服光潤。實與有焉。某旣還里。閉入山讀書。杳不知山外事。天上故人。重相顧念。適逢便武。輒謝所蒙。餘祈爲斯文珍重。慰此引領。

賀倪提舉普

號警齋

某寄跡提封。某水某丘。童子所釣遊。君侯實照臨之。報政將一年矣。某猶未能以民禮見。自盤谷西南而

望城郭在焉。相對五雲。輒移時不能去。某茲審宸綍鼎來。庾臺肇建。讀皇甫記。已蘇今日之疲民。傳紫陽心。又舉向來之荒政。風行新令。雷動歡聲。欽以某官。神驅五兵。才入八面。作真御史。以直道而事君。稱明監司。行本心而澤物。公來青原。父母其人。屬時常平。弄印六服。牧伯無以踰公者。西江涸轍。久煩公拯活歲月。少府出節。中詔又冉冉出建章矣。某自聽除綸。卽欲自附於門下。燕雀側聞雅志。引卻甚真。上方倚賢者以共理。烏乎能從。臺治一新。境內爲動。某甫及拂紙行墨。以贊東注之盛。嘻其晏矣。世俗所以事尊。責以鱗番從事。公有道人也。某不敢出此。臨風飛動。

與新知太平州趙月山

名日起集英殿脩撰川人

某去年待罪闕下。幸甚得一再交書。幅巾獨樂。近在吳門。入秋。正擬專介。候猿鶴起居。會去國不果。黃強立自竹所來。相見於六和塔下。遠蒙寄聲。多謝故人厚意。自是而入山愈深。杜門掃軌。無復南來雁足矣。壁弟學製新昌。新年見告。二月遣人詣門。嚮通問。輒寄所思。寫之竹筒。旣行。伏觀除目。欣審仍班內撰。領權東藩。一札起家。千乘載道。共惟驩慶。執事青天白日之實。望之知爲正人。千兵萬馬之胸。識者推爲豪傑。六合悠悠。風埃滿目。所謂江左管夷吾。公其人也。偃薄起伏。如神龍天馬。不可羈。牛渚天門。一瞬萬里。亦足以發其中之所存矣。天下事方有賴於公。時來爲之。孰之能禦。某夙昔荷相知。出人一等。以此不敢自菲薄。一別十年。浮雲進退。何足爲達者道。而學不加長。每每自憐。久不見叔度。鄙吝固宜。自今得聞一

言三日後刮目。未知於吳下蒙何如也。偶遇新昌便。意其介尙或未行。輒附賀狀。并寫戀媿萬分之一。相望沈寥。臨紙馳泝。

某風雪殘年中。使者以餽歲至。嘗草草拜狀。竟未知果達籤房與否。過年百二十日。是間何限傾倒。毛穎輩不任事。姑寄一歎。比審放纜長江。休鞍盤谷。執事自宦遊以來。數歷中外。垂三十年。曾無一日得從五畝花竹之樂。金山鷗鷺。甫此尋盟。如負者之息其肩。行者之休于樹。一時瀟灑。比軒冕束縛。瞠乎遠矣。浮雲滿山。任其往來。太虛真體。皦然萬古。某歸來兩年。處積毀震撼之餘。差幸天者之小定。自有溪山。足以遊釣。漫不問其他。有詩云。日日騎馬來山中。歸時明月長在地。但願山人一百年。一年三百餘番醉。欲知近況。此其凡矣。念人間清福。莫如一閑。幸而吾二人。皆可以自適。獨相去遼絕。無從合并。江東暮雲。長長在眼。輒專人奉問。潭府居處之概。卽辰夏氣方深。共惟靜養淳和。坐消熱惱。神明護持。式衍方來。川至之福。臨紙耿耿。

與知吉州江提舉萬頃

號古巖

某兩年乎山中。春猿秋鶴。木食澗飲。蓋頽然世味之外者。五雲繽紛。麾節夾招。搖歷勾陳而下。青原白鷺。浩有生意。某甫與溪倪谷耄。額手蒙幸。乃大化驅之。出東書就道。脩民禮公堂下。俎豆春風。簫韶夜月。藉之以詩書禮樂之光。多矣。明公以洞庭五老之胸。時雨一路。曾未數月。春旗霜艘。風采軒豁。所謂動搖山

岳細事耳。少須暇之。棣萼棠陰。先後濃郁。夢寐五采。衣被八紘。持國弟兄盛事。再見大江以西之父老子弟。豈得以私我公哉。某自解維江潯。風濤回薄。抵昭亭下。是爲子月丙寅。大壞積枵。觸手病敗。雖日夜爬梳。會肯繁然。肯豎浸淫。非非劑可藥。肘後龍靈。公不我斬。則宜殆庶幾乎。惟故山松菊。沐浴瑞露。而隴蜀之望。復切切微疇。昔不至此。某日墮倥傯。神馳檠戟。甫奉陟釐。則已魯臬籍。獨不愧于心乎。歲將新矣。願言滿頰盤椒。對揚緜綠。此豈無委。嚴立下風。

某伏蒙公劄。下問勸分。仰見豈弟父母。救民水火之盛心。實共邦人。額手大賜。某所居里。凡千餘家。常年家中散米一日。不收錢。諸大家以次接續賑糶。可及三十日。隔一日糶。可當兩月。此方儘可無飢。他時不待勸率。自是舉行。明年係緊要年分。或須使榜一申嚴之。至期。卻當取粟。但四境委有可憂。蓋吾州從來。以早稻充民食。以晚稻充官租。今年晚稻半虧。顆粒並是入官之數。早稻不過二三。則是民食十減七八。此其所以皇皇也。近見多有趨龍泉永新運糶者。覺彼二處。米亦有限。縣大夫各私其土。不肯透泄。亦其不得已者。此須使司示以意嚮。使之斟酌放行。庶彼此可以均濟。最急莫如通贛州之米。近同年李守惠書。自謂年穀中熟。米價日低。某嘗答書云。廬陵一歉。異於常年。田里憔悴。不堪舉目。惟章貢素無糶事。而得歲又偏。鄉人顛頓者。往往相率而趨治國。民食關係。苟可通融。兼愛秦晉。公之惠也。蓋贛浮橋。泄米之令素嚴。田吉號產米。而贛多山少田。故爲贛計。不容旁及鄰邦。今歲事既相反。又當通變。此須古崖

一書與李守通情。俟得其要領。然後大榜境內。許人赴贛收糴。此亦權宜之一策也。區區管見。姑復仁明。後有利便。又須陸續申控。

某自聞琴鶴言歸。卽戒筓車。擬送別於吉水新淦間。初十日始得。初八日申時寶翰。則知去期甚速。始意不可得。遂卽抖擻作詩。馳詣使館。意必可相及。僕自城還。則知解維已三日。臨風悵惋如失。廬陵四竟皇。流離入贛。過吾鄉者無虛日。豈弟父母。又拂衣去之。細民嗷嗷。皆謂曷不留我公。撫我妻兒婦女。一無異辭。此卽公論在人心。不可磨滅處。吾輩仕宦得如此。卽無愧漢循吏傳。浮雲得喪。何足較也。某念受廩兩年。當使君之行。不得往送。詩又不達。歉負爲何如。亟亟元詩。并拜此紙。從新昌璧弟處。借一兵走詣潭府。不知紫燕在芝山。或在廬山邪。引筆馳泝之。至大丞相古心老師。某不敢容易上問鈞履。丐爲轉道。詹依卷卷。

賀知吉州黃提舉器之名鋪。

某密依使天冰雪深山。與猿鶴臥送流年。緜故牘於左泉右石間。非賜邪。每飯牛頃。必矯首畫戟下。玆審郡揚帝璽。節畀天因。千里光華。一道鼓舞。伏惟驩忭。歛惟某官。眼空四海。胸著千年。振代直聲。鼓雷霆而潤風雨。鎮浮定力。載華岳而繫星辰。衣冠紫囊之神仙。氣類青原之忠節。旌麾一頓。草木交輝。地私二千石之陽和。天溥十一州之福澤。璀璨六絲之遺。礪碩五袴之歌。卽賜召環。遂高聽履。某受廩幸矣。公朝念

其久廢。誤節湘行。顛倒繡衣。不堪重著。陳情丐祠。以反菽水之奉。尙微均弘。俞音旦夕。下俾得醉泉飽蕨。水之北。山之南。地主之賜也。於馳賀之次。仰布其私。干瀆峻清。臨楮悚悚。

與前人

某日者。釋耒山中。僕僕湘役。走公堂。脩民禮。具申假道之敬。蒙主進吏。位之堂上。再三。祖帳殷勤。臺餽絡繹。視塵氓且絕等。至於開心見誠。憂愛疊疊。一洗世俗崖岸。某鄙吝久矣。微大雅無以發此意。殆未許諸兒覺也。小隊出郊。追送作遠。自違森戟。雲樹渺然。連日欲作書。道歸戀之概。征塵在衣。筆硯爲廢。偶宿分宜七里。殘日入戶。輒寫綢繆。風濤滔滔。婺緯忘食。金護玉持。世道將有嘉賴。歸雁草草。尙謀裔駸。

賀楊提刑允恭 號高峯

某昔者。望七十二峯於洞庭之南。以爲嵩恆岱華。類不可易見。五峯三市之近。皇華臨之。遂得以相望。下風未見。猶旣見矣。迺今使帆凌空。沂贛石而上。僕家去大江濱。可四十里。天其予之。以一日迎見之便。慰此平生。云胡不喜。某茲者。伏審庾政告功。刑臺建節。褰帷而問風俗。猶昔四封。持斧而行東南。于今三命。旌旗初動。約束一新。仰惟某官。識透萬微。才當八面。陽道州撫字之政。所謂吏師。元刺史參錯之奇。可布天下。天子以公篤於倫紀。使得以便綵衣堂上之奉。乃眷西顧。如此江水。一節常平。二節繡斧。式敬由獄。以長我王國。平反一笑。庶其在此。公歸廟朝。卽典風化。一家仁。一國興仁。尙觀大學之顯效。某杜門掃軌。

知事常後。忽里巷父老。驢傳明使者將至。伏櫪之驚。躍躍鉦鼓。往事如夢。不足細陳。某所深自幸賀者。三間風雨。託諸提封。小人有母。繼自今得安於其子之養。是則君子錫類之賜。服之無斃。堂堂在目。卽聽匪伊。輒以書先。精神孤往。

與吉州繆知府元德

某昔侍同朝。自詭相好。茲不得。又以繁縟爲疎遠。惟公勿深訝。某行吟孤嶼。回首吳山烟雨中。書郵往來。時從泓穎叙尊仰。汰歸深密。姓字不到。雲霞外分。正如此。非於名門有所簡也。階符在望。徒有稽首。某茲者。伏審朱幡春動。紫馬星移。民樂耕桑。簡靜方安於晉國。州稱富庶。勤強更屬於張公。兩地送迎。二天今昔。恭惟懽慶。欽以某官。霜明月湛。玉潔冰清。端嚴有大。臣風澄不清。而撓不濁。循良入漢。吏傳寬有斷。而愛有威。小停權於天津。頻合符於江國。歲之不易。民胡以生。將甦青社之飢。遂易淮陽之臥。竟上爭杜衍。雖去住之良難。席前問賈生。恐傳呼之已迅。自天子所以我公歸。某茅屋三間。在萬山深處。借書沽酒外。一毫不以爲公私撓。獨蒔松百畝。日騎牛叩角其間。天惠仁侯。自此吏不打門。犬不夜吠。猿嘯鶴嘯。各適其適。則某受賜侈矣。候迎之初。不勝依倚。謹具劄子。自陳燕雀之私。何當嗣狀。

某屏居一廛。耳目塗塞。忽蒙公牘。錄示省札。竊諗朝廷。爲李祕丞諸公有請。待發諸項椿積。賑我廬陵。而賢太守敬共其事。日夜講行之。仰惟施仁發政。朝廷甚盛惠也。救災恤患。鄉曲諸公甚盛舉也。承流宣化。

切切然惟恐一夫不被其澤。君侯甚盛心也。某嘉與鄉邦父老人士同一贊歎。伏承不鄙。特有下問。以某之庸愚不足及此。細玩諸公所陳。如隨縣闔狹分撥米數。如發糶之直。只依元糶價錢。皆旨揮之所已許。而使府已遵而行之甚善。至於戶口之多寡。編排之虛實。此則各都各保之事。所在都保。委有奸欺。然物之不齊。物之情也。若以太守屑屑爲此計較。恐末流必至多事。此惟當嚴責之。八縣宰。宰若親民。若其以實惠及人爲意。必能周思熟慮。以求稱塞。明指傳所謂心誠求之。雖不中不遠是也。一縣各有一縣風俗。一鄉各有一鄉事體。諸宰申請。惟各從其便。不患寡而患不均。彼必自能斟酌通融。而爲之說。惟吾行所無事。自然所濟不細。但縣之於郡。往往勢分隔絕。若專靠公文行移。必有展轉遲滯之患。若使府明諭諸宰。此事今作一項措置。不比公事常程。每縣各給以數紫袋。置循環曆其中。使諸宰有所申明。只於曆中絡繹稟請。從書表司。往達君侯。隨手應答。如回朋友書信。使爲宰者得依時稟承。其中便減吏奸八九分。且閭里細微。得嘗達於黃堂之前。物來事至。無不曲當。是則布宣德意之一大捷法也。某不當出位僭越。承問不敢不對。或者千慮一得。惟君侯矜其愚而勿罪之。某繼此若有管見。馮特寬贖。又得稟陳。

回吉州西倅寶檢閱全器

某昨歲待罪闕下。明公騎鸞驂鳳。下我青原。相望寥廓。不能以時。刷翎振喙。從燕雀來。不圖天孫雲錦。飛墮几格。金聲玉色。參前倚衡。固不以旣見未見爲間然也。某官歛岳翠以爲神氣。卷湘水以爲波瀾。駕蓮

棄而味玉書。仙芳纏纏。擧芙蓉而弄斗柄。道運堂堂。長樂鼓鍾。西清帷幄。轆轤星辰。經緯雲漢。固其分也。風月神螺。小此盤礴。綠綈方底。王曰。遄歸。某且。且爲斯文屬目。昨承使者之來。卽從脩門。作意馳謝。會匆匆去國。出處殊科。歸臥悠悠。書尺盡廢。光陰不堪把玩。歲年如許。念厚意久不報。矍然薰沐。祇對主書。耕釣一塵。五雲在上。臨風詹沂之至。

回江州李都承與

號南窗
關四人

某頃風颿回薄。自湖人江。目穿高牙。恨臂不羽。一棹從濫浦來。五雲絢爛。照映清越。對桑落而飲古人之酒。擊中流而聞夜覺之雞。至今使人意氣激昂。借力下風。飽我滿腹。乃以丙寅視篆。菱舍下塵埃抖擻。未繇面謝。軍將扣門。斜封三道。突入眼角。臺餽使蕃。綈袍之私。何以持報。共惟某官。關洛蒼俊。韓范聲名。參并鉞旗。聯寶奎之錯落。江淮草木。被玉節之昭回。吟嘯庾樓。梅花噴薄。老熊當道。貉子不敢越一步。夷猶岸幘。蠡管莫涯。方面。誅不敢辭。圭錫以須。勒此堂堂。燕然石在。某漫浪出山。落身枵瓠。問官官靡。問吏吏荒。而民氣則憤憤未醒。絲棼莫理。如之何其淑後也。明公惠念疇昔。肘後丹訣。其肯爲某愛邪。臨風切切。亟拂吏盆。具酬潦約。歲晚寒驕。願言金玉體府。壽此宗廟社稷之身。宜豈無飢餓者。三肅以請。

某去年在宣州。一江上下。幸甚數數相聞。然所甚恨者。過湖口時。不能轉江西四十里。拜屏下。共登琵琶亭。以庶幾英豪之下風也。未幾召去。又未幾汰歸。一出一處。爲天下笑。知心千里外。當亦謂何。某比者。伏

審晉承密旨。升直淵圖。詔璽申褒。鋒車交趣。共惟驩慶。某官關西遺老。江表偉人。崎嶇諸葛之兵間。氣吞河渭。偃蹇元規之坐處。目盡江淮。天方祚宋。襄戍解嚴。公歸本朝。坐帷幄。老成謀國。處置得宜。使姦雄伐謀。兵端不開。將社稷實受其福。某嫠緯小心。一飯三禱。屏伏深山。幸不見棄於君子。專使遠來。持書問勞。將意孔厚。猿鶴爲驚。區區拜高誼。而杜門齷齪。未知所以爲報也。九江未除人。想當寧急賢。應不俟代。某嘉與海內。延頸大用。倘得衣被餘光。遂爲太平安民。公賜大矣。江空如許。執筆茫然。相望一方。精神馳往。

回潘檢閱

某伏以歲華晚晚。春事權輿。共惟某官。鏤玉晶瑩。凝旒簡注。神之相之。台侯動止。萬福。某濃薰鵲尾。酬敬腆施。曩從集英殿門。吾榜得人。以執事重。海臺沙合。雲月相輝。至今斗牛。猶有光氣。顧山林僻左。繫雁悠悠。天際碧雲。明發不寐。千里眉目。忽照宛陵。爲之蹙然以喜。欽以某官。斂崑崙以爲神氣。捲溟渤以爲波濤。玉質金相。宛乎無自眩之色。泉清松茂。浩然有難進之風。乃今紬石室之祕藏。爲籀書而出色。視周六典。作宋一經。南豐以史學稱。進裁大典。安定非他人比。宜在經筵。某鶴夢正臞。起廢出坎。循墻弗獲。被命于征。郡枵然虛。真山澗水。瘵處也。敏手爬梳。猶懼不斲。況不穎之尤者乎。不規而頌。非所敢望於同年也。稟酬崖經。寧不嗣音。願言努力明德。對揚王休。有昭亭委戒。其敢不肅。

某曉汲凍清。以贄萬一之謝。首于穹勺。某兩年山中。風月晃朗。望太乙光氣九霄。吾書無翰。不能時一飛到。梅花月影。忽疑是君。而米家第二帖至矣。施稠報眇。自省欲如。尊執事以黼黻雲漢之胸。試金玉典墳之手。駕輕就重。拾級升高。此逢掖之至榮。而搢紳之交羨。曾子固晉裁大典。爲史學優。胡康侯宜在經筵。非他人比。某鶴夢正寒。大化驅之出。自湖涉江。風帆回薄。四十程乃抵宣山。凋水瘳。眇兮愁予。敏手爬梳。猶懼不旤。況不穎之尤者乎。高明局外之見。何以教之。滿硯冰澌。濡毫如帚。尙規嗣音。以寫繾綣。

回吳制帥革號恕齋

某林慚澗愧。貿貿此來。幸甚。在玉節照臨之末。九華山下。蹉跌望塵。拜手雙魚。分隔雲漢。敢圖下士盛心。超越昭代。襄報鄭重。闕位貌於不有。方驚喜未定間。五雲寵靈。自玉麟堂翩然賁之。所施所蒙。非敵己以下所可得。道德之味。流注翰墨。使人之意也消。恕齋先生。允文允武之才。有體有用之學。以王謝之衣冠。而接風流於江左。以朱程之講貫。而窺閫奧於魯東。顧今吏道便熟。袂帷成雲。崇詩書而抑刀筆。坐俎豆而行甲兵。鐵壁東南。公其天人也耶。經制西事。當在朝廷。錫命師中。不如歸袞。某敢誦所聞。某生也。晚於一世。封胡羯末之勝。幸甚。皆得下拜。而於恕齋。識獨早。眷尤厚。癸亥之望。神臯。戊辰之陪。紫橐。又其後來事也。今則以列郡而事崇垣。何敢仰綴宿昔食芹之美。豈無是心。非所得僭。詎謂臺餽。駢羅。光照下國。自上而施之。足以爲德。某敢不三肅使人。恭承嘉貺。若夫以往復爲禮。則誼之所不敢出也。謹三熏三沐。祇

酬主書于瀆清嚴臨風愧悚。

回宣州洪倅

某馳想芝山屹立如鸞坡鳳閣代有英妙不自意天惠宛陵朱紱斯皇乃肯共堂下探梅清致亭亭雲月邀我敬山不後不先未有如斯之巧者也伏惟執事日光玉潔之襟繩直準平之度車堅御良之材真所謂喬木百圍秀色干霄望清都太微之垣維尺有咫課丹覲緹屏之最當階而升胡尙綰於緋魚來同看於黃鶴意者康沂之歌愈出愈偉有相之道實畀之以藥石愕然郡政之闕者乎思昔潁水霄立其間而正獻以賢行佐理至今談者猶橋舌不下某於鄉之典刑無能爲役而吾執事則真其人也前茅在道旄旄舒舒願疾其驅降此未見至於乘珠委貺鄭甚於先施覺光氣炯炯衝貫斗牛矣懼弗敢當亟鍾鼎而歸於瑤華之側區區甫此滌篆排冗占酬崖略是慙

回吳直閣

履齋之子

某少之時聞東南二石筍玉立九霄陵陽蒼實爲綠野午橋佳處鸞鶴神清縹緲何許老成遠矣尙有典刑仰惟某官揚休山立之韻日光玉潔之襟文獻堂堂代有英妙未旣見只神爽一方某臥青原山中驅馳良倦上恩俾郡越在鳴珂循走彷徨連符趣赴不量此來未知所以淑後喬木婆娑五雲絢畫尙祈薤蕝俾就玉成某遠奉瑤音緘貺駢錦先施倒置曾是爲容旣什襲巾衍輒鍾鼎以歸太乙之府望履非遙

臨風翫琴

與游滄州汶

某以良月之望。舉棹東下。江空見底。乃章貢源頭。諸水怒長。未幾。光燄五朵。與空同雲俱。來往飄順。風航波瀾之澎湃。灑石鍾之清越。寵靈張王。迄抵雙溪。子月丙寅。俯抵賤役。瓣香西望。敬謝所蒙。明公卷其十二峯之神氣。軒軒磊磊。昭耀東南。以宰相才。學宰相事。天下久望其爲家。擅出色轡。絲周道肯復倭遲。惠露瀼瀼。江之民幸矣。如溥寰何。會有溫綸四輩。馳下。某不善爲斲。得郡復枵。至之日。視官官靡。視吏吏荒。民氣憤憤如也。爬剔婪絲。願氣力所至。終覺五技易窮。肘後神奇。不敢以望之他人。惟故山松菊。衣被綵雲。亦已過數。矧茲隴蜀。微惠未涯。微疇昔不及此。相望二千里外。明月此心。懇懇側簷。掛一漏萬。惟青陽時動。絳綠光華。式金式玉。以副前禱。此豈無骭。辱戒爲榮。

與趙知郡孟適

號菊山

某頃從南浦亭邊。抖擻殷函。道所蒙荷。且矯首于太乙之府。穹林冥坐。縹緲絳霄。江塗漫漫。勞我宵榻。執事以玉雪界之精神。臨睨八極。朝闔風夕。玄圃識者。猶竊遲之。錦衣照道。紫淦橫舟。蕩漾柳風。噓吸竹露。澗阿樂矣。如顯顯望歲者何。建章夜半尺一堂。堂畫省紅雲。著公高處。惟日望之。某不善爲斲。得郡復枵。以子月丙寅。視篆昭亭下。視官官靡。視吏吏荒。洗垢爬痒。亦曰視吾氣力所至。然山凋水瘵。非刀圭可瘵。

肘後神奇。惠徼大福。某不敢以望他人也。焚蕤淪雪。西鄉奉書。以謝以祈。鼎珍履絢。願言金護玉持。對揚王休。臨風悵結。

賀前人得盱守

某昨在宣州拜書。亡何。客攜琳琅來京師。欣浣如對。匆匆去國。不成報襄。歸里以來。杜門深念。又無從嗣音。爲謝。徒有清夢。夜遶金峯。忽讀邸狀。欣審丹鳳揚綸。銀菟擁鎮。八百國封爵。莫如同姓之親。二千石起家。共讚惟良之牧。先聲載道。闔境爲春。伏深歡忭。欽以某官。景緯光華。仙潢清潤。淮南桂樹。了無貴介之風。李白桃園。綽有神仙之韻。軒陞宜當於三錫。轅和肯涖於十同。睠惟東盱。實介南服。紅泉碧澗。髣髴丹丘。白玉紫烟。參差繡陌。聊商羊於朱紱。供衍燕於青香。大宗維翰。价人維藩。丕動袴襦之喜。九卿執羔。三公執璧。言觀衮鳥之歸。某辱在眷知。助喜百倍。旣不能振翎刷喙。從燕雀來。謹奉書寄。便申慶迓。兵當已在道。不知開藩。涓卜何日。某尙當屢賀。不一。臨風馳泝。

與趙監丞淇 號平遠

某乃歲之秋。緹騎來山中。嶽翠蒼寒。琳琅照映。章不成報。內有欲然。寧不嗣音。僻左之以世道如許。風起雲飛。中夜人物之思。爲此耿耿。上念井絡。丹詔起家。峽月棧雲。先聲浩蕩。蓋有望木牛流馬。再立武侯之事業。又壁窺萬一意。必與南山。泊子秀諸公。上下雲龍。共此光明俊偉之舉。縮手袖間。臨睨天半。此其大

本領大經綸。政不易涯之。野水橫舟。蒼虬縹緲。山君川后。日有疏附。卽日恭惟台候萬福。某漁隈半席。自分小休。誤渥自天。俾尋庾謝舊盟。意此是挾拭笞箠之陋耳。三辟弗可。乃以陽月之望。束書出山。涉重湖。越大江。整整四十日抵戍。以是月丙寅抵賤事。凋城敗屋。枵然大瓠耳。搔首踟躕。望洋氣縮。維宣距鄰。僅隔一雲。東望熏香。奉尺書候起處。惠徽藥石。立我沈痼。梅花晴昊。拄笏神馳。

慰前人

某昔讀檀弓。文子之喪。旣除喪而後。越人來弔。其居使之然也。伏惟先太傅大丞相冀國公之喪。旣有日矣。地不千里。不能往弔。一介奉禮。今也而後能來。死罪死罪。嗚呼。皇天祚宋。國有元老。數百年宗社之靈長。千萬里風寒之險要。蛟龍在淵。虎豹在山。屹然長城。爲此突兀。天乎不使愆遺。遽奪之去。主上震悼。傾動朝野。伏想生平翹館之英俊。舊日麾下之將士。與夫三邊之百姓。四塞之英豪。見碑而淚。望城而悲者。不能已已。矧夫家門之奇禍。父子之至情。攀擗奈何。嗚呼痛哉。某生也晚。當公佩天下安危。分不得勇往。執鞭。今而追恨。則已無及。獨念袖有瓣香。歸依平生。亦旣不克爲公壽。惟有爲天下慟哭。敢西望靈輜。揮淚百拜而獻之。公而可作。向其找許。嗚呼。悲哉。親喪所目。盡也。抑先王制禮之意。是有節文。士君子爲孝之道。在於顯揚。伏惟執事。重致意焉。卽日孝履支持。某頓首奉狀起居。臨紙哽塞。

回安福趙宰與塔號勿齋

某追記疇昔同到蓬萊。慈恩之題。杏園之宴。吾以故不與焉。然同年之情。豈以四海九州爲藐然哉。王孫乃龍鍾世有。籀雲鱗。今不遯紫清。上岩嶠。顧得百里之地而君之。簾陰晝寂。千室鳴絃。實鄰吾父母國人。誦子產。今其時乎。某私獨念。今天下豈有可爲之縣。縣不可爲。而可爲者人。如君者。以可而臨不可。於是知材具之超常流百倍矣。長書下貽。燁然春華。溜若清風。與我之厚。昭切至情。多言不足以殫謝意也。某守郡無補。誤渥爲郎。縮縮循墻。行且歸里。當觀棠陰。以與邦人共談政化之微。亟推吏塵。具報記室。揆諸來施。不敏流汗。

此一馬二僮。日在泉石深處。聞山外塵埃。亦頗作惡。坐對浮雲。亦開口笑不自己耳。君解墨綬去。意紅光紫氣。冉冉帝側。乃猶廬陵客。琅晝至前。矍然起仰。黃柑紅袖。二美并覲。杏苑論情。我之懷矣。冬江雪澗。萬里安流。目送征鴻。知有順帆。天際如駛。伏楮拳拳。中書不中書。復字蕪類。併希錫察。

回寧國交代孟兵部之縉

某去國之前一二日。宣州弛征之命下。某旣爲桐鄉百姓頓足起舞。卽拜書望雙溪疊嶂。爲賢主人賀。吾輩讀書臨民。正爲今日行志。凡此者各盡其分。固非相與爲賜也。旣汰斥歸里。卽閉門不與人事。山巔水涯。脩然獨往。而使者忽持五雲來。君子之有情於人也。卽勞問之。將以厚禮。復申其綢繆焉。某誠不自知其何以得此也。宣人歌舞賢侯之德。教冠冕像。設祝廣成。千二百年。令公二十四考。蓋人心之天也。某何

人斯。偶以一日出位言語。乃得因見大夫。以自附於去思之義。某微德以堪。回首碧落山川。鬼神猶有餘愧。宣敗壞至矣。弛之則期會散。繩之則撫字虧。公折回蟻封。從容不迫。期年而變。古語不誣。方今論選表。無出潁川右者。曷不均弘。俾執事樞。某一飯三禱。使者之歸也。謹東望熏祓。身心致敬。陵峯堂下。有日延見父老。尙願道山林不忘之私。與其所以不敢當之意。進之惟命。退之惟命。某臨書不勝拳拳。

文山先生全集卷之六

書

回寧國陳節推容

去年闕下拜書。稍得數數。未幾聞捧檄校文。不知陶鑄何處人物。某自是卽汰斥去。閉門深山。遂無復鱗鴻一日之便。忽使者來山中。欣得妙帖。見示小錄。方知昨者。衡鑑所嚮。近思想歸舟。蕩漾彭蠡。吾知心正在香爐峯白雲下耳。宜之弛征。執事首從吏之。幸而集事。僅足了吾輩之責。非相與爲賜也。書來。乃知宜人以此爲多。祠之以識其不忘之意。忱惕於孺子之入井。豈爲內交要譽設。抑桐鄉父老此意。亦能使人感激耳。宜爲郡凋劇。極力扶持。幕畫間。想見勞苦。盤錯糾結。以試利器。天下事正有賴於方來耳。某前冬一出。去秋一歸。進退行藏。惟其所遇。而無心焉。則今奉親課子。彈琴讀書。流水青山。悠然獨往。不煩故人江雲渭樹之思也。史記見貺。家藏本皆不及。尙當朝夕以稱所蒙。明善錄一部。謾侑歸牋。臨墨馳泝之至。

與吳提刑觀

某頃待罪闕下。薄奉函書。僕被來歸。嗣音杳邈。上下人物。感念世道。未嘗不與門牆拳拳也。某比者。伏讀邸報。欣審玉陛出綸。繡衣移節。夜醉長沙。曉行湘水。已著平反。風酣章貢。日麗崆峒。更煩輕熟。江湖相望。

原隰增輝。某官宣慈而惠和。高明而正直。義豐授受。孔孟氏之淵源。江左聲名。王謝家之門第。蚤立登於闔閭。邁坐厭於蓬萊。竹馬相呼。春生襦袴。星輅所至。雨叶桁楊。茲洊捧於英函。乃肯臨於梓部。刺史故人。按事飲酒。情法相當。忠臣孝子。畏道驅車。君親交盡。靡需席暖。已趣詔溫。某杜門深山。去城郭甚遠。而於太和差近。初謂旦夕使輶。泝贛石而前。可於快閣上下。迎候一拜。忽傳英籟。小駐青原。某揆之始望。則蹉跌矣。瞻睇行臺。輒易奉狀。代敘燕雀之萬一。若夫揚清激濁。洗冤澤物。閭閻欣欣。無所患苦。使屏退之蹤。亦得從猷畝以自放適。是則某之所自賀者也。臨楮切切。

與湖南陳提舉合號中山

某猶記乙丑之夏。從江西提幹。得往來行書。江闊雲空。斗光如水。每懷世道。上下人物。未嘗不中夜耿耿。某茲者。恭審奉少府節。駕常平車。衡嶽連雲。遠挹海山之秀。天因麗漢。近垂楚分之光。原隰春深。旌旗風動。伏惟歡慶。某前年與公同除郎。去年與公同除節。不才安得追附名勝。自分卻立下風。猶幸時論不磨。得公輩落落參錯。使民物吐氣。國庶幾耳。相望千里。北斗在天。何時執鞭。寫此冲懷。

回林學士希逸號竹溪

某夙有幸。獲與介弟爲寅恭。因之有以詢居處著作之萬一。不戚戚得喪。而言語文章。足以詔今傳後。竹溪先生何憾哉。一日之赫赫者多矣。千載而赫赫者。幾人爲一日計者。無千載也。決矣。

回贛守李宗丞雷應號妙峯

某偃薄林阿。不虞使者之涉吾境也。迺自空同來。顧我猿鶴。米家書畫。光怪滿山。此豈四海九州同年無情者邪。僕家青原深處。實與君侯黃童白叟接眇而處。自下車以來。但見年穀獨登。鼯鼯屏息。不需數月。報政赫然。茲豈千里能事。環君侯四境。鷄鳴犬吠。晝夜相聞。實其受賜。僕也彈琴讀書於其間。其賜多矣。敢圖高誼。厚鎮撫之。委貺盈箱。非所當得。睇瞻霄立。頓首知歸。吾鄉幸邑於使天之下者。三人焉。其一爲陳行夫。若羅子遠。蔡濟甫。皆曲江齊盟者。奉令承教。必有可觀。廬陵一歉。異於常年。田里憔悴。不堪舉目。惟章貢素無糴事。而得歲又偏。鄉人顛頓者。往往相率而趨治國。民食關繫。苟可通融兼愛。秦晉公之惠也。謹復書。空山白雲。無足持報。薄言采藻。臨風如馳。

回交代湖南憲新除湖北漕李宗丞

某旣專鱗幅。奉起居。猶有腹心。不嫌齟孽。某屏肘寬閑。無復山外想。公朝念其流落。昇節起家。使之繼明。公印綬之後。聞命慙然。不知所爲。堂有重綬。蓋年耄矣。湘行且千里。舟車迎侍。不堪顛頓。是以懇悃丐祠。冀使私養。天高聽邈。促旨且頒。叱馭回車。進退維谷。將從鶴髮而來耶。則非養志。將又以香火請耶。是何爲者。而爲是瀆也。謀之乃心。稟之親老。旦夕姑以旨甘屬弟輩。單車將指。以明不敢自棄於明時。而復以不得將母。重告之造命。俟驅馳數旬。卽乞身以歸。爲臣子稍盡幾分耳。某於門牆知己。論交非一日。天又

開之以奉令承教之機。是其與四海九州之同年。其有情益倍倫等。誠不圖解后及此。古之君子。其爲人也。謀之必忠。愛其人也。惟恐其不入於德。故敢疊疊陳出處之槩。惟執事啓誨而圖利之言不盡意。臨風如馳。

與江西黃提刑震

某幸托年盟。夙依塵部。竊跡萬山底。衣被末光。飲墜露。餐落英。粗安半菽。公之餘也。久疎晤寫。滿目春雲。一水盈盈。遡詹河漢。某茲者。共審出綸鳳闕。移節虎城。春信初傳。立變桁楊之舊。天光下照。重瞻禮樂之新。依然故部之江山。籍甚先庚之號令。伏惟驩慶某官。剛不吐而柔不茹。寬有斷而愛有威。發爲文章。正諧韶濩。勁沮金石。凜然節槩。光垂虹霓。聲揚紫微。早分潁川二千石之符。就乘天困十三星之節。據案叱吏。笑比黃河清。開門賑飢。功過中書考。上久簡孟博登車之志。公遂爲勝之持斧之行。春風遍地。而狴犴虛。夜月當天。而鼯鼯伏。載馳載驅。維驥維駉。靡憚周咨。來游來歌。如圭如璋。言觀肆覲。某避影杜門久矣。不作山外想。不圖元會之日。上恩覃及流落。畀相識於珠玉之側。虎鼠同器。猿鶴笑人。云云。

回林司業應炎

某夢想巍巍堂堂。於朝花院柳間。追隨猶作日事也。玉烟劍氣。轆轤崢嶸。杳然在碧雲崔嵬之外。江月流水。實照沄沄。某官以冰輪金井之心胸。發黼黻火龍之光燄。而又慥慥乎言行。皦皦乎進退。若汲長孺。若

陸敬輿若慶曆元祐諸賢充公之爲表裏庶幾其無愧領袖斯文旗翼元命天下以此望公者殆人人同願玉立以需之某自歸來乎山中俯仰半菽不復得與四方書牘從事比從戶曹黃文得誨函草木同味玉雪照心欣懌之餘感慨係之某蹉跎之蹤何可爲者大化驅之一節誤落湘雲避走陳情俞音竟闕單車徊徨且此首涂行復求返吾屠羊而已渺渺天一方重此懸泝專容陸續貢敬

回信豐羅宰子遠名椅號調谷

某去年聞雙鳧南上落落空山不如燕雀之爲有情也大化驅人作江東客數月爬梳枵瓠未見端倪會誤恩召環滂班過當亡何狼狽而去蓋疎闊以來居多道路之日出處乖方滋可爲笑杜門息影中高情厚鎮撫之專介持書勞苦臨風馳感可人天一方信豐山水邑見謂讀書松竹晝影滿簾著吟人其中所謂予方有公事此豈錢穀吏比耶勿需終更西清有詔璧弟何爲者赴新昌且百日商鉅馳河未知攸濟惠徼如天之福寡過多取數矣贛瑞皆佳邑藹藹吉人鼎立空同眞一時之盛當路或令舉所知某幸甚有以藉手薄言修布小附芹心非敢謂報倚筆詹泝

與前人

某臘前函書往來庶幾契闊之意年光冉冉驚見雙壁蓋曾兄季困專紀綱實來仰惟同年長者所以惠綏荒寒皆可感也某雲臥深山世意落落一起一仆非人爲之上天蓋高匪怒伊教敬威念咎安得不力

執事昔爲之助喜。今亦有以救其不逮乎。敢請季困值儒者之窮。執事以氣類遇合。所以位置之者。寵甚。萬間寒士。公將溥其施於一時。所謂兆足以行矣。某爲之歛衽。新年喜雨。燈前報命。馳想一方。臨紙悃悃。

回羅子遠就賀除京權

某俯仰歲年。甚知閒問。頃知捲旆來歸。衣錦有爛。且趣舍人裝。于于然東矣。亟欲擘牋所思。雲頰鶴倦。不可拈拾。竟墮夢寐外。時一動寥廓。想江邊鷗鷺爲之悵然。忽得手書。賁我空谷。華袞流離。辟易久之。共審帝闕出綸。天京司轄。姑養籛鴛之望。佇博峨豸之音。伏惟驩慶。明公契古胸襟。吞雲夢者八九。外物瑣瑣。遲速何心。積之厚。發之弘。宇宙間華軌清貫。將次第而取之。以其時考之。則過矣。某風雨深山。避影卻走。乃元會之日。公朝以一節起其流落。回首三湘。驚心蕉夢。請隸香火。旨更趣行。慈親以遠役爲憚。進退維谷。莫甚此時。旦夕黽勉拜命。姑單騎之戍。驅馳數旬。乞身歸臥綿上。同年有情。不隔四海九州之遠。毋金玉爾音。冀一語以自壯。拂拭過情。非所敢當也。占對梗槩。尙猷嗣牋。

某一之日。旣端拜敬謝芳題。并報信豐薄攝等之槩。二之日。謹遣介馳諸席間。寅奉起居。不敢繁敘。首祈委鑒。某臨歲入湘後。墮身徽纒中。詹汭宇下。闔焉嗣音。繼聞趣戒朝裝。榮司京權。某念欲牋忱賀慶。以甲風雲發軔之慶。一春屑屑行路。浸墮因循。旣抵空同後。潼川趙同年來爲縣。實在河陽。舊桃李處。鴻沙指瓜。猶記東西。所以告新者甚厚。因得切諗。修門近况。大帶深衣。長身玉立。道德福澤。方來而未艾也。吾鄉

諸老行輩落落。歸然靈光。惟今澗谷先生。依星辰傍。日月一日。騎麟翳鳳。朝闈風夕。玄圃勢正。順耳某祕。陰杏集。素辱心期。慕王陽之回車。學毛義之捧檄。得郡山深。俯仰半菽。君師天地之造。知已錫類之餘也。惟是求牧力綿。未知攸淑。回首蔽芾。我愛桐鄉。豈無一言。益其故人。并寄父老。因風東向。頓首以請。

與汪安撫立信號紫源

某仰惟曠度絕人。不作邊幅。僕安得以書生刀尺從事。高明幸察之。某昨者爲高安受容。受察於玉斧之下。公不以衆人畜我。我實德公。未幾公去之。而僕亦以憂患。連年臥山中。蹤跡跋扈。不足爲知。心道也。撫念江流人物如此。未嘗不中夜耿耿。某茲者。伏審揚綸九陸。建纛三湘。人無異辭。國有生氣。共惟慶愜。欽以某官名高九牧。氣蓋羣公。江左管夷吾。足係英雄之望。軍中范老子。能寒寇賊之心。往者金湯中流。忠績簡在上方。以南事爲慮。詔公方面。隱然長城。一代數人。百年幾見。公不得不力。紀勳旂常。歸袞廊廟。自此等而上之。某退在漁樵。未忘婺緯。聞公此來。爲世道擊節。偶逢黃君強立。長沙便介。率然上狀。仰闕賀床。強立名至道。某昨嘗薦至館下。強立每謂公以意氣動人。能使人不愛其軀。其感激知己可見。今茲適在冀府。從諸公遊。公不以生客視強立。強立奉筆墨以佐大闢。豈直一日之長而已。憑筆僭越。向風如馳。

回前人

某望五雲多處。以鷲劣下乘。幸甚自託於禮樂之下風。旣奉儷函。布親牘。修大闢府之敬。迺不我後先。使

者銜命。卽之於深山中。翰墨陸離。光動葑屋。拜而後敢讀。讀已而亟拜。居今天下論人物。一方一曲之士。隨世以就功名。謂之無益於成敗之數可也。當大方面。建大將旗鼓。使國有龍虎。馬不敢南向。其周公瑾。祖士雅之流乎。天子召拜。樞近脩勞。還故事少府。且出節付以西北。煩公辦此。金戈凱馳。歸袞廟堂。作太平六典。四海以此望公。亦公志也。某少也驅馳。嘗有意事功。鷄鳴奮發。壯懷固在。然而亦少衰矣。被旨行湘。顛倒繡衣。豈堪重著。惟宿昔於門牆。辱知己厚惠。微宇下。恃此敢求適三月。移卜先塋。有山間之役。受印之期。尚在夏五。竊聞四輩在道。車馬有行色。天殆嗇其一見之機乎。何爲屢得之而屢失之也。退憶前年。自直廬汰歸。公以書存問。推許不薄。海內時流。得此於名公者。正恐無幾。今承獎翰。益佩卷卷。江濤渺然。事會何極。何時執鞭。寫此傾蓋。某臨風無任馳泝之至。

與胡都丞穎號石壁

某已端具儷。候敬籤房。心之精微。敢嗣陳之。某於當代知名。夙有取履結韉之願。寄書梅外。嘗寫我心。遠道報襄。如見顏色。伏自牙纛卷零雨而還。雁闊湘深。馳泝寥廓。伏惟以任重道遠爲心。以難進易退爲節。巍巍堂堂。卓然佩安。危而繫輕重。乃今聖哲。馳驚上下。焦然金城。圖出師表。徵公孰與於斯。追鋒在道。不俟駕行矣。某家畏壘山下。麋鹿之與羣。而猿狖之爲曹也。公朝起其流落。山衣易繡。舊夢恍然。一節走趨。幸在通德里。九轉寵靈。疊疊肘後。某行當掃門以請。拜狀。擘臨風卷卷。

某一節出山指碧雲崔嵬。入風吹不動處。知爲神龍臥洛所也。前者幸甚。脫屣堂下。進瞻芒寒。適子之館。授子之粲。胸中經綸之奇。傾倒敷露。中夜慷慨。音落九霄。使人驚且喜。今而後知宇宙間。未嘗無劉玄德輩。某持以去。胸襟袖尙有萬丈光。此殆未可與俗人言也。某以疎決。故一簞下長沙。初約先拜見。而後往帥垣下。偶有牽制。稍違息壤之舊。今茲回棹潭濱。將由便道單車。負荆門屏之外。輒遣一介。先道其私。幸豫戒猿鶴。勿以俗駕爲拒。率然馳控。倚卜而敝。

慰饒州胡通判石壁之姪。

某茲者不圖先令叔某官石壁先生。遽捐里館。風馳上征。哲人云亡。邦國殄瘁。執事者。骨肉至慟。爲國受弔。撫孤大誼。定力如山。足可以對岳雲之崔嵬矣。顧惟某落落後出。辱二阮之知。乃在一日之間。老仙用意慷慨。與之上下古今。撫念人物。袖中瓣香。僅僅拈出一再。老仙所以命之者。更在度外。爨桐之音。方希而化人之裾。已不可追矣。出聲慟哭。悲不自持。謹哀綴壹鬱。洩爲奠詞。往者如生。尙爲我惻。惟一賜宣燎。豈勝感涕之至。

與安撫李大卿芾號肯齋。

某已專具僮僕。申敬記室。私心梗槩。不嫌裔襞。某辱知愛門牆。非一日之故。風流雲散。一別如雨。每一念此。神爽飛馳。江湖一雲。本不甚相隔。彼此出處。解后參差。至闊絕乃爾。僕之罪多矣。明公當世人物。卷韜

山林四方顛顛。望其一出。方時多艱。婺緯忘食。然見王茂弘者。固以爲江左有管夷吾。某有計日以俟。錄車耳。某避影深山。久不作馳騫想。公朝念其流落。畀節起家。釋繇上未而于征。未知所以淑後。幸甚。區區走趨。實在中台之里。十年契闊。一旦逢迎。豈命物者。開其親炙之機。而惠顧之乎。如聞閉門謝客。雅意絕塵。然待故人。固自有情。猿鶴必不我拒。相望寢近。凝泝如馳。

回永州楊守履順巨源之後。

某嘗論一世人物。紫朱其綬。唱呵車塵。若是者駢肩矣。求其忠義貫日月。處漢賊危疑之間。臨大節而不可奪。至於殺賊奴。取纍纍金印。此事付度外。豈不凜凜大丈夫哉。父母講傳。百年間。吾見先太師一人而已。某官鍾岷峨之秀。嗣彝鼎之勳。忠臣之門。天人之所共祐。國士之器。君相之所柬知。石崖齊天。唐中興頌功處也。公來其間。寧不感慨。今蜀道難。蜀道難。公收拾羣人。手揮天戈。一節之還。從甘棠刻第二頌。旂常濯濯。光于前聞。人某何幸。身親見之。歸隱空山。望湘雲千里。不圖使者遽涉吾竟。仰惟明公。張主斯文。經始棘院。以相龍飛。興賢之盛。大張門顏。使某也得執事從君侯。所以厚我。不同他人。小人雖無能爲役。烏乎敢辭。貢院二字。僭易奉上。進之退之。惟命未諧。握手往來。心聲庶幾。古道之槩。臨紙拳拳。

回林侍郎卿孫號雲屋。在臺時。

某從望闕山。矯首五雲多處。寢疎起居。長沙少府傅仙書惠。并繳。貺琳琅之翰。仰惟緇衣宛變。古道顏色。

爲之歆拜。傳仙不肯望然而來。以書先訂出處。此意亦頗謹重。已遣禮聘之。且告以初筮如九層臺。基須令堅壯可耐。靜以待次。不失雅道。未知傳仙何所嚮。若其來訪。敢不惟命戒之共。

回前知衡州楊秘監文仲

某已端飭儷。致敬心之精微。不嫌裔孽。首祈垂炯。某於足下。非敢以氣類詭流俗之縱。尙想疇昔。載色載笑。相遇不同他人。至今歷歷在夢。時方孔艱。荆吳多壘。坐廟朝。籌帷幄。折衝俎豆。正張趙韓范之事業。湘水以西。勤勞一障。天子曰歸。借徑斯文本色。俾執事樞。歎見之晚。某閉關念咎。不復作馳騫想。公朝出節。誤及荒濱。回顧黔驢。曷對湘雁。趣命且斂。單車于役。稍盡君親之誼。卽尋香火之緣。衡雲照人。垂執鞭弭。乃天上笙鶴。不復顧鷄犬矣。所恃襟期有素。且未忘甘棠。則其居中庇之誨之。某與蒸湘之人。均利賴焉。昂首慶雲。伏楮耿切。

與劉尙書黻

某夜拜文昌。朝馳函敬。感激疊疊。不嫌裔孽。首祈穹采。某庚午待罪底班。望英躔萬丈於絲綸閣。天章潤色。衣被青黃。雋永味言。稱於天下。曰知己。歸伏山阿。分霄壤絕。不敢以世俗書尺。候主進吏。熏香宣夜。北斗以南。共惟某官。文章稷言而皋謨。器度商彝而周鼎。陶鎔帝皇。轆轤造化。燭六合。蕩八垠。吾道之福。布濩流行。翠幄青瑣之從容。文劍紫荷之凌厲。由八座而閭兩社。使天下再見希文稚圭之風流。某嘉與人

士旦旦稽首。某瓠落之蹤。一意返哺。夢寐不到山外。公朝未忍捐棄。捩拭而起之。復令效湘節牛馬走。烟霄流眄。不進不止。蓋疇昔之盛心未愆也。某始以私養丐閑廩。天高聽邈。且趣之。再奉明命以趨。一之日。甫履回雁。布宣德意。唯謹。湘人尙力抵氣。末俗輕生。蘇息而調服之。旣竭吾力焉。垂天之雲。覆燾其上。訖濟我後。某爲之夙夜願言。因謝有祈。臨風悃結。

與陳察院文龍號如心

某夙在眷知。屢賤契闊。杓粲奎明。經緯碧落。曉夕詹馳。伏惟執事。以光明俊偉之胸。負法家拂士之望。鳳鳴朝陽。萬物吐氣。穗廬密勿。熙明日新。陸贄處中。汲黯居禁。精神強而本根充。外難不足平也。上方屬以經濟。俾執事樞。某歷落之蹤。豈堪使事。公朝不忍終棄。盡出嘘揚。始以私計。不使迎侍。冒干閑廩。趣旨日斂。單車于役。以五月一日。受印司存。旣見父老。具宣上德意。然兇猾相挺。山澗水療。扶持調習。庶幾一日非晚。且再陳情。爲歸養計。侯誰在矣。張仲孝友。儂語循比。藉手不足。以當劍首之一映。臨楮無任悃結。某輒有稟瀆。某昔者以臬敗。由書生本色。只當在斯文一邊。不應以刑獄爲職。故凡寬厚惻怛處。人皆由之而不知。其有不可以詘令甲者。則譁然以爲過當。所處非其位故也。自後諸公。速有論列。皆不實知其人。不過以前疏潤色而爲之辭。某嘗願一日。有以自見於天下。使知吾所謂衡氣機者。而未易遂也。今年復除憲。實不願就。丐祠不遂。銳欲再請。又念起自廢閑。豈當重瀆已甚。故且黽勉驅馳。亦謂姑以平平處

之可也。既入竟，乃知湖南風俗大不然。某若以身事懲創靡然風采，懼無以肅一路觀聽。又坐失職，故初至不免見之榜揭。謹錄本以達台覽。夫如此，初未嘗有嚴厲之事。特示之以警戒之意。蓋於職分不得不然。然才作此差遺，便是惡滋味。兩日刷具一路獄案，數目甚多，莫非劫掠嘯聚等事。他時審覆既圓，皆不容付之輕典。某且獨奈何哉。某此來不及侍親，處此亦大不安。俟疎決後，惟有乞身歸養。所恃知己肝膽相照，臨書不憚傾倒，念其久要，其必有以教之。嚮風卷卷之至。

與鄧校勘林

某頃繇春中走赫蹏闔輦下。知上徹五雲閣久矣。一節奔行走行役，曠焉嗣音。矯首河漢，盈盈一水。某蒙賴如天之庇，以孟夏八日辭膝下。五月朔吉，受印於衡陽。初見吏民，既宣上德意，退坐棘木廬中，與徽纒相爾汝。爲之弊弊焉。江去湖不甚相遠，始者殊不念其風氣之悉。至此始知尚力抵氣，以血人爲嬉。九城一波，莫障其瀾。某以爲怒之而不教，非古祥刑意也。見諸榜揭，嚴而不爲殘。楚人亦頗爲動悟，其肯綮中也。然某以書生爲之，非其本色。不諒者衆。此十年所以有申韓之謗。以至於今日，是安得而忘吹蠶之想乎。且重闈以老，不得就養。單車彷徨，雲舍切切。旦夕疎決後，且卽丐還屠羊，使叱馭回車。於君親兩不爲失。此其所以謝夙昔君子之教，而庶幾乎年盟之盛心也。厚德錫類，某惠徼福于宇下。蓋方新焉。偶逢便武，亟詢起居。且敍其所以跋躄馳驅者，遙對清切，臨楮泝詹。

與陳直院維善名合號中山

某踰睥紫霄。寅致儷櫝。心之精微。敢嗣陳之。某昨承鵠袍出使。驛騎歸班。嘗領廬山下所賜手書。光氣垂虹。下照空谷。撫歲年而如雨。恍河漢之一色也。中山先生文。運斤而成風。氣振山而奔電。元龍湖海。突兀宇宙。支架明堂。曲摺萬丈。光芒緯國。典華帝制。天下固以爲未也。大明奎壁。晉執事樞。使士者顛顛歌仲淹弼。一夔一鹵。某落落青山。自返吾哺。公朝未忍捐棄。畀之一節。使與衡雁相周。遭草木吾味。一引手馮翼之。端出緇好。某始以私計求閑廩。聖恩闕命。且趣之載道。遂以朔日。見吏民宣德意。然楚俗尙力。抵氣殺人爲嬉。撫存而調習之。未易爲力。明公夙昔褰帷。棠陰如屋。五雲緯霄。影落衡杜。某爲之夙夜願言。因謝有祈。臨風依遡。

某頃侍親抵郡。輒持尺素。專貢紫清。懷今雨之綢繆。望下風而慷慨也。璧弟來京師。拜夫子之門。黃河秦華。天下鉅麗之觀。璧也。所遇多矣。今天下稱文章大手筆。落落可數。平園西山諸老之風流。散在三光五岳間。日月磅礴。河漢經緯。吾紫微公實當之。南州之士。僕將帥以聽。某讀書涉獵。筆墨空疎。方青山蕭然。水上之風。猶吾意會。一行作吏。此事便廢。問於故牘中。掇拾親親長長之說。見於行事。邇來千里民氣。覺稍洽和。書生不知向方。能終不迂闕於事否。昔人云。未識意先感。水火流燥。記吾味久矣。教思無窮。勿替引之。某豈勝倦倦。

某自前拜書後。回首雁峯。不勝拳拳。水口吳權寨來。及承手書。備見繾綣故舊之意。百單二歲之姥。孟參發揚之。安序表章之。真足以爲衡陽一段佳話。某六月朔日。祖母初度。亦及與一城老者相周旋。人生七十古來稀。是以自七十爲始。千數百名中。其最高者。爲九十六。延此母於堂。進趨語言。殊覺不衰。惜未有過百者。鄉間有羅提幹存叟。祖母去歲滿一百歲。某嘗偕朋友十餘人往拜之。當時有詩歌成軸。今年又百單一矣。此母大家。諸孫皆儒者。提幹登科。有福有壽。又非衡嫗比。劉守卻未知。某旦夕亦當爲文以白之。贛斗絕。與湘問久相隔。適有自建昌來者云。五月二日。廖恕齋過建昌。知五月末。主人到臺觀上矣。司存事。首尾關繫。無如孟參。在恕齋必不能相舍。安序權事半年。添此繁劇。想一旦釋重負。甚以爲喜。某於賀恕齋書中。已備道孟參一段。人將爭出我門下。此自無說。但願足下斂以靜鈍。守以廉朴。一如平日。則天下之奇材。青雲之遠業也。贛事稍簡。親老以下俱安平。賣出雲底。但有疲於竿櫓。以一人之寡。應四方之多。覺甚苦之。鄉人相過者。隨分處之。亦不至甚相炒。中間只一榜禁假託。大者歸之臺。小者聽之縣。或以爲得體。贛只有出甲一項。未易杜絕。今春此輩在廣。聞某新上。皆急於歸。就保五。乘其畏向之機。近日未免先事諭曉。度今冬可得安靖。湘中旣獲諸渠魁。後想道州一帶已無事。湘鄉諸處寇攘之風。當是久已帖息。茲因專介。信筆傾倒。薄芹并瀆。向風如馳。

與曾架閣

某曠不奉狀者累月。杜門山居。無由四方上下。以相從於顧盼咳唾之末。馳仰中。得會李文復卿。廉知起居之詳。甚慰。子曰。苟患失之。無所不至。百千年間。天地不位。萬物不育。推尋其咎。常於患失之私基之閣。下出其浩然之蓄積。與當世之大人論成敗。爭曲尺。言不合。輒然竟去。榮途引於前。禍機恍於後。而毅然不變。由閣下自處。則本心內事也。自惴惴持固者觀之。則豈不患此失哉。歐公所謂我輩中人。敬歎敬歎。因復卿歸。并介以有請。先通判託孤與先侍郎。先侍郎以其責歸之架閣。事至重也。執事不以某弟爲不類。使昏名門。講好以來。涉四年矣。中間歲月雖多。機會甚少。以故告成吉禮。猶切遲之。獨至今日。則造物若有巧於其間者。執事當驅馳江淮。而某赴闕就道。執事卷風雲。藏林壑。而某恰亦骯髒來歸。兩家初意。誠不期有此暇也。某方尋香火之緣。自分閑散。而執事氣宇槩諸公。名聲動中朝。扶搖九霄。匪蚤伊莫。則川駛月流。舟飛岸奔。非復有此之暇。執事終先子之託。而某了同氣之責。今其時乎。區區肺肝。已具告之。復卿并疏其事。冀以闢徹。幸執事終惠之。

回吉守王提舉秘號敬岩

某僻居林薄間。望旌麾所洩。遠在霄漢。道德朝望。蔚乎輝光。可仰而不可親。是其分也。乃蒙寵戒令。有聞教之便。忻快何如。入冬暄寒相泊。適有采薪之憂。莫酬隆厚。滋負皇恐。謹具狀謝。他容參謁。并敘區區。

與廬陵龔知縣日昇號竹鄉

自螺水而東望西山廬阜與三江五湖如拱揖。知蜿蜒扶輿有名勝宅其間。相去蓬弱良觀差池。北斗芒耀徒耿耿心目爾。不自意桑梓幸會。牛刀大手姑爲此試。共惟明和介潔之譽。此邑不占已孚。跂予望之。艱難之秋。得君子之政。與拜燾覆之貺。滌篆云俶。未能躬闡賀庭。謹具劄子。代布忱悃。非晚當圖稟謝不敏。

與贛縣許權縣

惟廬陵與安成爲比郡。山川同在吉志。今茲遂得自附於鄉黨之末。幸甚。休甚。某往者。於諸公間。得聞政事一二。有司敬謹。莫重於獄。後世苟簡。幾以民命爲戲。濂溪爲小官。不肯殺人以奉其上。東坡謂今人爭減半年磨勘。雖殺人亦爲之。聖賢愚不肖之用心。其異如此。頗傳廉明與同州推官事。前後照映。辱在同里。與切增氣。銅章墨綬。賁止空同。一同風化。姑此相屬。奏最匪伊。騰太清。凌扶搖。錢公之步武也。某疇昔學校。曾於名門子姪。略有相知者。獨絢履末光。未有下拜之日。其如傾企何。適陳文成甫來。以爲託身桃李之國。輒拜此以識惓惓。陳文并乞公庇也。率文上狀。末繇參侍。仍冀自愛不貲之寶。以須遠至。

賀劉敬德補入太學名欽號絜矩

茲審捷來南渚。聲振西雍。才名三十年。說屠龍之老手。冠帶億萬計。快走馬之脩程。儒榮有開。士論稱服。

共惟驩慶。某相期半生。聞榜折屐。無絲造慶。謹奉顯函。芝楮二百千。敬爲犒捷之助。不腆惶恐。臨風馳泝。

賀鍾有謙補入太學名山甫

茲審冰闈獻藝。璧水蜚聲。月旦評中。說八叉之老手。朝雲飛處。艷三合之修名。下同。

與周德甫爲季弟從弟聘

某比者。牽率朝從。一相過。兩日夜陪接議論之末。極慰翹企。獨恨去之匆匆。未遑屬鑿耳。中間妄欲以二弟。相累陶冶。荷不鄙棄。許之以相周旋。甚幸甚休。鄰敵相交。則有盟市。道相質。則有券。吾徒相與。一諾已足。政不在要約區區也。然君子義以爲質。禮以行之。幸郊之幣。際可而幡。然雖虞人之微。非其招不往。非義無以將禮。非禮無以昭義。交際之道。不以節文將之。終必有弊。况爲弟子擇師乎。此書之所以不敢廢也。歲禮之數。息壤在前。無俟贅述。官楮一百貫。顛人送上。以少將聘致之敬。告幸麾頓。小弟差劣。不可大脫鈴束。燈前後早賜垂訪。乃所願望。觀德聽教。行有日矣。尙及傾倒其餘。

與文侍郎及翁號本心川人後參政

某久曠起居。遞申連得誨帖。仰佩至愛。邸狀間屢見丐祠。尊性樂在簡淡。急流勇退。仙風道骨人也。但老文學爲諸儒典刑。眞侍從爲朝路風采。上必不聽去耳。舍弟璧來拜侍。辱以家人進之。得與教誨。玉成實受尊賜。某向在湘。承命問一路書籍。後某去之匆匆。諸州來者不齊。今約見存。可二百冊。贛書爲一萬九

千三百餘版。亦已陸續印背。別容一日專兵贖申。某治郡以來。書生迂闊之說。頗有效驗。祖母六月生日。集城中內外老人。自七十一至九十六。爲男女一千三百九十名。犒恤有差。老者旣踴躍。而少者始皆知以老爲貴。禮遜興行。詞訟希省。又風雨以時。早禾甚稔。晚稻亦可望。諸縣民皆樂業。無持挺爲盜如宿昔者。稍道曠瘼。皆尊誨所逮。宗老去國後。今寄居何處。想甚清健。恥堂先生居雪川。近況如何。批示幸甚。遇郵拜書。不宣備。

高恥堂名斯得。川人。參政本心。癸丑榜眼。後來廬陵。省其叔可則。先生時年十八。邑校簾試。全篇論題。曰中道狂狷鄉原如何。冠榜遂通譜焉。道體堂謹書。

與楊大卿文仲

某頃繇岫巒。申敬羣玉之府。爾後僕僕西還。爲空同之役。一息半晷。海山一碧。秋風凌凌。翹企不勝。五雲紛紛。比審疏榮文石。晉武頌臺。制作一新。縉紳交慶。伏深歡忭。某官貞元朝士。西學宗師。玉雪照天。寒露清冰之操。璧奎行世。懸黎垂棘之光。屬時訪落。朝有老成。真天聖之蒼龜。元祐之麟鳳也。入告辰猷。條天章十事。冥之兩社。以福溥寰。某顛顛延睫。烏哺萬山間。於芻牧何補。亦惟召父杜母之政。是則是傲。蒙被吾味。至於今茲。璧弟來修門。得親炙典型。以濯去舊意。浸潤新雨。愛其兄施及其弟。此感殆未易名言也。念間起居。輒此馳泝空明。並候所以教。尙祈金玉式副前禱。

與趙戶部平遠

某孀孀秋風中。若有天人噓新雨而沐之者。眄搖落之繽紛。把鉅麗而舒卷。則夏六月錦闌蛟龍字也。西平有子。惟我有臣。春秋書曰。季子來歸。國人貴之。麒麟游秦時。鳳凰集阿閣之候乎。朝廷清明。再天聖元祐。對揚訪落。爲東諸侯先。洗耳琅琅。爲天下誦之。某爲養承乏於此。何補芻牧。所以朝夕其民。亦惟親親長長之推。庶幾萬一云耳。諸邑大夫之相承通融。一家痛痒。一體緇衣之宜兮。若田君尤所謂用吾情者。執事惠以所知。於此見田君益奇。而某得納交。幸也。結幽蘭兮延佇。此意襲積。專猷嗣篋。某繇空同。起睨海山。虹氣緯霄。靡罅不照。吾石樓大地一粟也。輒倚空明來詞起處。惟偉人照以度外。某惟明世。雜選英賢。以綱紀生人。金玉新政。豈弟君子。來游來歌。經緯乎文武。轆轤乎風雲。伯塤仲篋。叔出季處。無非吉日車攻。間真實經濟。臂指西北。本在中書。植之風聲。旂常世世。某拭目延和殿新綸之下。烏哺且半期。餐素祇益愧耳。旦夕歸命香火。奉輕車歸。卽所安居中。引重允然。終惠之望。泚筆廉泉。馳訊碧落。豈不嗣音。更僕以請。臨風無任悃結。

與陳侍郎伯大號篤齋

某熏沐薇露。闡敬高寒。惠徼五行俱下之矚。某玉峽撐空。水沙一碧。神仙人弭節其間。春花秋竹。鍾鼓餘閑。真神龍深臥處也。咫尺五雲。不得時候猿鶴。則吏鞅實丹黝之。夜瞻明河。自訟不置。仰惟一代翔鸞神。

駿騰踔凌厲。駕廖廓而振汗漫也。舒爲慶雲。卷爲清飈。其磅礴帝所。則福在海宇。其夷猶山澤。則望在廟朝。六合一握。天地一瞬也。厥今訪落廟謀。雲漢爲章。詔書出延和。公且兩社。某嘉與顛顛額手。某區區烏鳥之情。俯仰半菽。粉陰蔽芾。實持燾之宿昔。拊摩凋疲。曾微芒忽而髮皤。間亦念家。旦夕皈命香火。奉輕車卽所安。玻瓈一江。光氣上下。某服媚之無斃。蕝禮寄之九霄。間忘其蒙瀆。倘沐涵茹。幸甚。

與宋衡州

某介倚心知。不敢徒豐豐西曹。道邊幅首。祈紆省。某自抵空同。兩廡蜚翰。忽殷勤以寫心。折芳菲其寄遠。春風千里。著人如醉。至如骖馱之作。不足乎揚纜藉。而琮璜之大好大慚。退卻三舍。顧區區定交才數月。宇宙意氣。不啻平生。忽飄風其相離。不勝回首。明河一方。如耿耿何。某官冰輪金井。雪柏霜松。西岷太白之精。九霄經緯。南平莫邪之氣。萬丈光芒。馳玉軼而坐朱陵。轡華絲而當銀漢。洗颺颺之窟穴。飽鴻雁之稻粱。已收暴公子之威名。小燕汲淮陽之清淨。綠綈方底。竚垂响。嘯之雲。絳幘曉籌。催傍觚稜之月。某視郡印已十旬。初至如人家。風雨四壁。逐處經理。久之方成綸緒。日來甘霽。應期。粗慰農望。想福星所次。時雨膏之。早熟必已可卜。恕齋新上。以同里而講交。承解后非偶然者。遠想楚觀五雲。衣冠玉立。不任馳羨。采采澗芹。薄旌一髮不足當莞頓。欲往從之。湘水深。三復是詩。神爽飛越。

與知江州錢運使

某日戴五雲。苟且爲治。自省其私。則統部中一支壘也。等威有截。不得以杏園宿昔自詭。乃者辱不彼賜之書。草木吾味。篤實嘔喻。略分際之崇卑。申度外之繾綣。言念君子。終不可諉兮。某惟湓浦。控上下流。古用武之國。陶士行庾元規諸公。藉此以鷹揚江表。虎視河洛。乃今天移福星。作鎮此土。激西江。蘇鮒轍。屹長淮。而斷鯨波。作宋長城。真北平變化傑魁人也。東南金湯。施及虹翠。隸也受賜多矣。某私竊自念。贛山長谷荒。赤子龍蛇。雜襲而處。芻牧之責。大恨不任。而欲以詩書揉強暴。衣冠化刀劍。書生迂闊。而不至敗缺者。幾希。明公回首曲江。風誼一世。果不以九川四海之人例視之。則鞭辟其不迨。包蓄其未閑。如天之福也。某頓首下風。以請。馳一詞介上起居。薄采空青。以自附於潢汙。有敬之誼。犯嚴忤然。控露潦略。某撫搖落之繽紛。泝空明而延佇。龍光射牛斗。福星出虛危。殆一夕九起也。某之爲郡。實隸照臨。月詔有典。當不懈益處。寧不嗣音。童瀆是懼。五雲九霄。凌倒景而下空同。歛爲清冰。溥爲膏雨。地雖辟絕。而天人顧復之益深。豈無他人。不如我同味。足下墳簾五老之嶙峋。襟帶九河之汗漫。要其胸中磊磊落落。倬彼雲漢。爲章于天者。曾未究也。忽而身作長城。手提半壁。嘉與一道桑麻。而菽粟之。西人之子。幸則幸矣。然六轡如濡。王事一方。孰與入坐中書。經制天下。聞延和殿議。召公矣。某強顏芻牧。何補毫分。目前四境無虞。年穀粗豐。皆澄清餘潤所覃也。區區素餐。是愧。倘使者猶以故人未卽舉法。旦夕丐香火。奉輕軒。歸卽所安。徼福年盟。尙終惠之。遠道寵賚。雜選充庭。翠玉春暉。緹襲無斃。謹具劄申聞。伏覩新綸。專容郵賀。

與廣東曹提刑

某曉挹微露。注之赫蹠。上之東壁府。昭有敬也。某惟紫微雲煙。衣被炎海。若經若緯。紛郁輪困。施及虹翠。間山媚川暉。浩蕩何極。隸也。且旦稽首。欽以某官才足以截蛟刺犀。文足以鏗鯨躍鳳。力量足以扶巨鰲之最屬。東都韓呂家聲。猷奕奕。江濤如許。更當坐玉關。爲天子當一面。繡衣霄漢。尙逶迤五嶺間邪。袖青冥之鈇鉞。行黃道之星辰。方底綠綈。已落天半。某不戴五雲。奉重諼空同小院。烏烏私情。自揣逾分。起視四境。山長谷荒。赤子龍蛇。未易帖服。越雞伏鵠卵。何以克濟。邇只臺容。如面鐵壁。某特此無恐。郡中舊例。以八九月間。申嚴編氓出甲之禁。往往此時。兇儔陳脚已動。履霜不戒。堅冰奈何。近者妄意預行曉揭。使家至戶曉。人人知所避就。今年僥倖梅關以南。無一草一木之驚。僕之責始塞。榜檢求教。吏師尙不彼發藥之。某比爲五羊羅僉判。拜書強聒。持寸莛。撞巨鍾。多見其不知量。飛剡公車。不俟終日。明公有意天下士如此。感拜盛心。謹馳一价。脩詞節下。謝已往而祈方來。齊聲如也。東望芙蓉。玉立萬仞。伏諸神馳。

回汀州陳守

某惟自古民流爲盜。有受病淺者。有受病深者。淺者調其血氣。時其餒飼。不待針艾。而病已除。昔之人有行之者。龔少卿施於漢之渤海是已。深者參苓之所不能可。湯熨之所不能瘳。則大承氣湯證矣。昔之人有行之者。子太叔用於鄭之萑苻是已。今者使部弭盜一事。鰲峯先生豈弟之心。高明之識。見諸已行者。

其成效固班班著矣。賞一人而勸者百。罰一人而戒者亦百。春風之和。秋霜之栗。施及鄰境。胥有嘉賴。特在更酌其受病之淺深。而斷以行之。是殆非浮想懸度者所敢與知也。贛之爲州。雖曰以五城兵馬鈐轄繫之。銜顧建立。司存本意。不過爲贛民出他境。使郡將得行通制之權。要其實。則依然一列城也。若有所徵調。下郡稟承。實視朝命。謹布腹心。以謝委戒之辱。膏結恐悚。

與趙大卿孟傅號松壑前知贛州。

某汲廉泉。澡栗尾。通恣恣主書吏。昭初好也。某昨從湘花間。奉盈尺牘。一舒泄其宿昔雲龍之私。明河七襄。流麗空碧。地中之山謙。水上之風渙。十襲九緹。至今耿耿。光氣蓬萊。水清淺。縹緲環佩。渴心湧泉。一日千里。某茲者。共審玉宸渙寵。金掌升班。維城維翰。維藩。磐石大宗之續。厥貢厥包。厥篚。綱維六府之司。禁籓雲開。神塗風動。伏惟慶忭。欽以某官。祥源異稟。若木殊輝。綺繡揮揚。汝陽天人之相。龍虎變化。北平魁傑之風。勞侍從而厭承明。經駘溢而出馭娑。公不淮海之薄。上爲宣室之思。玉珂金鑰之玲瓏。花綬藻衣之鳥奕。徑摩馳道。渙周卿六命之頒。不出都門。竚唐相九人之拜。某頃單車。馳岫屨下。鶴髮重重。一夕九起。效贖洗馬。歷歷陳情。君師天地之造。爲擇便州。夫子奔逸絕塵。乃使隸也。曠若乎其後。雖鴻燕差池。不克面拜。龜組。然天開百世之好。山川其忘諸。惟是求牧力綿。未知攸淑。一規一隨。賴有柯則。在我愛桐鄉。不隔風雨。肘後寵靈。不彼而惠綏之。此固憩棠中父老之所共望賜者也。謹具劄子。申詞起居。未諧良晤。

願言金護玉持。式副前禱。應舊治要來。敢請其凡。

與前江西趙倉與樞號端齋。

某澤露焚蕤。闔敬五畝花竹下。盡脫櫛鬣。惟高明垂簷。某沐膝塵舊雨。今十六七年。立冀部下風。則又六年。僕以荒落之資。踰伏於青原山中。如商鉅馳河。遠莫致之。先生如驚雲游龍。舒卷九霄。其步武不可俄度。宜乎其欲往之。而瞻望不可及也。區區九十之親。就養空同。今繡衣洛社中輩行也。間得訪問。獨樂起處。先生玩心神明之表。游目日月之上。蓄爲清氛。蒸爲非霖。一日舉而措之。沛然江河。孰能禦之。我有宗老。爲國之幹。訪于落止。以公歸兮。某半生出處。無足爲明公道。宿昔受教。所以護持其元龜者。至今不敢渝。世人自有一種毀譽。道眼自有一等高下。先生度外大觀。謂其人竟何如也。某因諗趙令君居中台之里。又出門下。值其良使。亟哀此墨。少敘戀思。臨楮馳泝。

與吉州劉守漢傳

某澤穎拔蕤。寫恣恣銅壺閣下。昭鄰好也。某日從郵置。得澣我私。盈盈一水間。鼓宮宮動。鼓角角動。精神流注。絕出翰墨町畦。芳菲菲兮。浩蕩何極。欽以某官。吐吞玉櫃之風烟。披拂青藜之光燄。卿雲甘雨。含天地之至和。古柏蒼松。炯雪霜而獨立。小駐星河之棹。頻分江國之符。春鷺袴襦。神螺黼黻。雨籠絃誦。振鷺漣漪。鈍爲銛而頑爲廉。痿者膏而憤者醒。兵衛森畫戟。小宴清香。衣冠拜紫宸。佇班黃道。某宿盟園杏。又

尾朝花。蒙霧一塵。稽首錫類。竭來空同。密倚五雲多處。楚波之及。晉魯柝之聞。荆川媚山暉。沐浴今雨。則所以講信修睦者。奈何以簡陋廢。采采澗蘋。以明有敬。玻璃一碧。此心俱東。

某日摩挲空翠。端飭側厘。以進之集古主書之側。蓋於門牆辱好有三焉。園杏之齊盟也。朝花之未至也。三問風雨。託於君侯之土地也。而豈但曰小國之於大國也。有交鄰之道焉。謙齋先生。不以小人之美芹者爲僭。而察其明有敬之私。是能容之。其弘多矣。介使踵來。辭曰。報聘庭實。維旅芳菲。彌章。是何君子施禮之周。執德之信。而僕何以當之。抑傳有云。長者賜。不敢辭。取數之多。亦祇以媿。贛去吉。一水三百里。而氣候風土習俗。事事不同。未春已花。才晴即熱。山川之綢繆。人物之伉健。大槩去南漸近。得天地陽氣之偏。看來反不可以刑威懼。而可以義理動。書生出其迂闊之說。嘗試一二。觀聽之間。稍覺丕變。奉令承教於君子。尚願維今有聞。以淑厥後。廬陵之政。識與不識。皆云一佛出世。山川出雲。時雨流動。此爲霖之善者。机也。民歌路謠。徹聞京師。天子明聖。恩光言遠。某雖不敏。尚能取皇甫公韻歌和之。占謝之次。寫其輪困。寧不嗣音。如此江水。

回吉州趙倅

某首春携便符歸省。道五臺下。華裾葱蒨。照我征衣。雪跨冰懸。灑灑清味。至今彷彿。霄榻間。投膠沸糜。不克闌屏。星西來。以修賀上之禮。琳琅金薤。忽落虹翠。三過趫然以喜。某茲者伏審緹軾行春。畫堂開曉。袖

槐雲之五色。組樓月之千峯。共惟歡慶某官。瑤簾簫鍾。秋濤瑞錦。駕玉虹。垂蒼兕。凌紫清而上之。固其所也。鞞鞞珮璣。乃翱翔石泉松雪間邪。輿籐簾繡。小燕屏題。方底綠緹。又看環召。某視郡印十旬。云云皆喬巖之賜也。自省於涓曹。正負不敏。圓械鄭重。此禮奚宜至哉。鯨錦卷還。猶有餘媿。折寄芳菲。今雨何厚。頓首拜嘉。謹謝將命。尙容專致。廈成之慶。

回袁州鄒倅

朱明逾半。南薰之時。共惟襦袴行春。旌旗麗曉。有燕有翼。某對廉泉。飭側厘。東嚮以謝主書吏。某頃叨節南馳。得符歸省。三峽烟雨中。一再獲拜瑤林瓊樹之側。暨暨吾味。我心寫兮。執祛幾何時。明月千里。惠而好我。錯落華音。下照虹翠。赤脚踏層冰。忘其執熱也。共審龜臺借重。鳳岳凝清。時雨誦絃。和風條教。伏惟歡慶某官。東山芝蘭之韻。北斗梧竹之標。朝發輒兮扶桑。夕攬轡兮玄圃。識者已竊遲之。兩樓山水。能久著神仙人邪。竚文組之卽眞。以介圭而入覲。某禊前一日。奉重闈抵空同下。旣三閱月。公事稍清。得小遂半菽。歡錫類之餘也。實篋勤斯。芳菲襲予。新雨洒濯。感在下風。采采一芹。效贖隴寄。非所以報也。馳迺一方。

回臨江婁倅

夏鳴仲瑄。良苗懷新。共惟風月滿樓。江山入目。百神僕价。某焚蕤淪露。專謝中涓。若兩廡翫飀。五鼎芍藥。

無庸爲仙人瀆。某於東都韓呂家。鼎鑪獨無耳乎。頃一節湘行。獲從衡陽廣文君。暨簾簷花。情味甚春容也。清江之上。頽頽飛霞。獨不得四方爲雲。追軼清絕。琳琅金薤。光墮玉虹。執熱以溜。我心寫兮。欽以某官。冰壺玉露之泠泠。瑤林瓊樹之英英。黃琮蒼璧之熒熒。上之清都。盛之紫微。便當還家。種本色。石泉松雪。可久爲麒麟。係耶。方底綠綈。自天子所。某將指罔功。叨恩便養。空同小院。粗可從容。半菽歡皆。喬齋之賜。惟芻牧之才。單龍蛇之俗險。凜乎未知攸濟。渠渠遠道。頌不以規。旣謝下風。尙沐新雨。畫堂高處。槐桂成行。春蚓秋蛇。覺我形穢。明公不以覆瓿而顯設之。鍾軸爛然。一見頽發。謹復將命。不勝馳泝。

回隆興熊倅震龍

某撫今雨。懷清風。其契闊未有甚於此時者也。挹色絲於浦碧。追流水於鱣魚。其慰浣有甚於斯今乎。澹圃先生。以冰懸雪跨爲風骨。以鸞漂鳳泊爲文章。以規圓矩折爲政事。挈其堂堂。著之高處。以經緯河漢。舟楫江濤。萬夫一喙也。陳仲舉千載風流。乃獨與歲寒結印。倏靈轟颺。怒而起。有不磊磊落落者乎。時來則爲。當仁無遜。某雨別十年。無非俯仰林鳥之日。祖母行年八十有七。切切便養。承乏此來。公朝篤業。人紀之造。而諸君子錫類之餘也。第五閱朔于此。塵而入鞅。而出於民。無絲分補行矣。丐一縷香火緣。奉輕軒以歸。暨臺襟期。明月千里。折寄芳菲。厚意不敢不拜。薄將石間一髮。非所以爲美芹也。廬陵廣文。玉憂金鏗。長沙識衡山簿。猶昂昂鷄羣之鶴。中峯有以服乎兩峯。觀者爲此膽慄。何當簪盍。上下慷慨。目送征

翰臨染馳去。

與楊縣尉如圭

某他日上下紫淦間。草木吾味。未必無解后之雅者也。廬陵少仙之庭。數有英游發軔其間。而君年不可及。當官風采。東西行者。聲聲誦言。知爲清修。知爲纘粟。培風怒飛。霄漢一碧。跂予望之。某誤恩便疊。夢繞松楸間。伏戎于莽。有乘虛而干法犯禁者。霜臺遽以煩執事。知敏手爲可託也。寒泉白骨。蒙賴方新。惟牽師從者。重愧重愧。草草持願。高明臨染無任。

回唐書記

某一節湘行。得挹寶烟玉氣於芙蓉池淥間。聲聲吾味。歡如平生。岸花催路。吹絮滿衣。憐其五雲。落我店月。厚意久不報。所思遠道。回首懔然。執事以瓊琚玉佩。照映東西。鸞鳳先驅。朝闈風夕。玄圃可也。赤雲瑞氣。黃花歸期。當仁勿遜。某花朝前四日。抵雲舍。又十日。奉重闈。泝灘而上。禊前一日。抵空同。郡事稍簡。俯仰半菽。皆喬簫賜也。江湖寥落。鴻影參差。安得素心人。相與數晨夕。每誦此詩。明發不寐。輒持只赤。小澣我私。采采澗芹。臨風如結。

回黃強立

某薄游空同。繾綣半菽。故人知心。千里寄瑤華。昔以纘藉之讀之。宛然促膝接語也。強立以排淮決漢之

胸行鷲風鞭霆之氣。鑄爲雄辭。能使京師紙貴。新豐舍中。誦天下事。一日騰上。風聲千載。某來此。訟簡事稀。餘力可及。故讀四境倍稔。絕南剽之跡。皆五雲所照映也。久缺報襄。輒郵專筒。薄將聊奉一笑。

回文教名寶

某久後亢宗。無從通譜。璧弟幸托年盟。雲杏集中。不知曾得納拜否。己巳之歲。千騎過廬陵。有意來山中。時某適赴鶴書。取愧薜荔。失此交情。悵然一方之感。書來空同。陳誼天出。欲往從之。湘水深。令人聲聲。柳子厚謂南方之靈。鍾而爲石。故有多石少人之論。某常以爲未也。地氣自北而南。古有斯語。意者人物之數。斯文之運。亦莫不然。玉簪羅帶之勝。中州山川。所未有也。磅礴鬱積。而振發之。以其時。可矣。吾宗文實當之乎。令業方來。雲湧川至。樹之風聲。快觀燄燄。某半生落魄。無足爲宗盟道。去年單車馳岫。樓下堂有重慈。白雲間之陳情。至於一再。遂授今壘。闔門就祿。賣出過數。力綿求牧。未知何方。宗丈宦遊海外。坐隔一關。一介相先。是不以他人待同姓者。委貺所及。拜而受之。薄物非所以報。何當嗣音。

與胡節推幼黃

某他日盤之中。辱玉山朗然照之。舉帆凌斗牛。掛席拾海月。已占吾成玉堂堂於此時矣。空同落葉間。快讀千佛。喜見榜花。雙峯巽山。嶙峋蒼翠。布濩膠轄。何盛大如之。國家三百年。代有英傑。樹之風聲。五緯聚奎之符。彪炳未已。滅沒草根者。固復何限。吾成玉一大振起之。青原劓空。忠節生氣。是則草木同味也。隲

計畫繡娛雙親時。某當以奉祠歸里。尙從鄉稚耄。候馬首遮慶。玆褻赫蹠。寫此茂悅。疊疊薄將祗瀆。

繳奏藁上中書札子時吳履齋常國。

某惟軍國萬微。日至黃閣。不敢爲竿櫓。區區懼瀆威峻。惟鈞宥是祈。某頃罹人子之厄。曾拜仁人親親之恩。感激榮光。永矢無斃。不自意今春伏遇先生。袞繡來歸。爲國柱石。遂得密邇陶鈞。以庶幾一日履屐之役。幸甚莫大。先生當國以來。上迎聖主悔悟之機。下慰蒼生蘇息之望。所謂垂紳不動聲色。而措天下於泰山之安。先生有焉。乃一日伏讀明詔。許中外臣庶得實封言事。皇心光明。言路軒豁。恭惟啓沃至深也。某私念今事變至此。衝決橫潰。使宗社有不測之憂者。誰實爲之。病根在內。膠結不去。終不可以爲國。是以積忱具書。先陳其愚慮之一。而痛哭流涕終之人。非不知愛身。何苦如此冒死。今日之事急矣。懼其至於一旦。則亦不免於死也。惟是言輜如毛。懼不足以感悟天聽。尙賴先生狗通國之心。出回天之力。以措世道於清夷光晏之域。某九殞無悔。謹繳奏藁具申。伏惟鈞慈。俯賜鑒察。

賀簽書樞密江端明古心

某夏五之月。伏從下土。切聽朝命。共惟天子。蒐選洪儒。布滿侍從。而先生以海內達尊。居然冠文昌之首。僕自惟念。正人登崇。天下誠幸。誠賀。不敢以草野自疎。輒奉狀以爲斯人之慶。記史登錄。及徹巖視。私心欣喜。莫可涯涘。山澤深遠。與廊廟本不相接。一日。閭巷風傳。歡吹。則謂先生以某日踐政地。參樞筦。主上

聖明君子終爲大用。莫不舉手加額。以爲共相天子。活百姓。遂在旦夕。以一方權而放諸。知權欣交通。人情莫不皆然。人望有所宗。而斯民之譽。猶出於直道。僕爲之舞之蹈之。中夜以思。不能成寐。夫以穹壤之大人。倫之衆。而先生之進。大夫士庶民。皆欣欣然相告。如其父兄親屬之得用。將有所利賴於己者。此其心豈千金之所得。而家至戶曉。所能同哉。我朝先正。得此氣象。惟前有范文正。後有司馬公。范自諫府以來。以言事傾動中外。後來出帥西邊。入班兩地。岩穴之士。慕下風而望餘光。蓋皆延頸企踵。以庶幾其一日之爲相。司馬居洛中十餘年。當時兒童婦女。識與不識。競曰。司馬相公。元祐初。衛士之感泣。都人之遮留。其所由來者漸矣。非一朝一夕之故也。范公得經世之望。司馬公得救民之望。嘗恨士大夫所以積望於平日。得望於當時。蓋幾世幾年而後得此。二公有以厭服天下之心口。聳動時人之耳目。而范公不及用。司馬公不及盡用。天之未欲平治天下。其如之何哉。今先生早以言語妙天下。中以政事動中朝。後以氣槩風度。上結人主之知。而下爲四海所傾慕。則先生都范馬之望於一身。蓋二公之後。又凡幾世幾年。而後得此。天下之所以責望於先生者。豈與佞僂覲笑與秩終。而甘同草木俱腐者。同日而語哉。方今西有叛將。東有逆離。而江淮與強敵爲鄰。強兵富財之道。無所於講。主上不得怡。宰相以爲憂。其顯證莫過於此。而學士大夫。私相擬議。痛心疾首。以爲方來無窮之變。伏於不足慮之中。而發於不測而不可禁者。其幾尤切凜凜。天下無事。則代天理物之地。猶可從事於牽補架漏。以庶幾不至於敗缺。不幸槍攘

憂危之間。倘非碩德重名。積孚於人心。一日舉之。以從民望。則鎮服危疑。收拾渙散。精神氣勢。未能一旦動天下之聽也。今當揆身定大亂。奠安方極。不敢自以爲功。而方嘉與天下之賢者。共圖久安長治之策。先生從容於廟朝。訐謨於帷幄。則當揆所以隆體貌。敷腹心。未能或之先也。鄧侯所以舉代於平陽。茂弘所以深器於安石。其爲天下國家計者甚悉。豈曰身爲功業而已哉。則夫先生之一身。其關繫於方來之世道。誠重且大。而閭閻之內。父子骨肉。私憂過計。以爲脫有倉卒。則所以寄命而幸全者。非先生疇依。然則先生之望。近世以來。絕無而僅有者。將范馬不及爲之事。先生將來。雖欲逃之而不爲。其亦何辭以謝天地神人之所期哉。僕鄙野無足道。又執方不通於世。修門之書。每視以爲甚重。而未敢輒發。其於先生。獨塵塵不倦。自天下之公爲言。則僕之喜談樂道。與人情若不相遠。自一身之私而言。則僕誠何人。而辱先生特達之知。此其所以伸紙行墨。樂爲四海誦其情。而不自覺其僭且瀆也。伏惟先生少垂察焉。某仰惟三台煢煌之精。藐在雲漢。下土之人。夜詹頌頌。曾無羽翰。可飛達於經天光耀之側。問者不揆。雖荒繆之筆墨。時得以上登涓史。而觀道德。聽教誨。自謂未有疇昔。則左右亦以其人爲何如。先生度越常情。嘉惠後學。采於窮約之素。以爲可進而教之。廬陵之士。凡來謁先生者。未嘗不深念其姓名。至於造化人物之地。先生所以提撕薦進。使之得以齒下士於朝。則既有日矣。乃者秘府之命。從天而下。空山不穎之蹤跡。一日有聞於人。自宰相鈞陶而言。曾無所偏私。而某心口相謂。山澤之人。何以及此。是蓋有所從。

來而不敢忘也。當秦之世，必有均調皇極之輔，深思遠計，周及人物，雖遐遠僻陋，如不肖，亦使之無所曠棄。九二曰：不遐遺，得尙于中行。今當揆以之，秦之未成也，必有一陽爲之先，而後衆陽之氣類隨其汲引以進。今正人滿朝，大抵以先生爲朋來之倡。至於晚陋，亦得依乘以前。初九曰：拔茅茹，以其彙。征，先生當之。屯之六二曰：匪寇婚媾，女子貞不字，十年乃字。二嫌於初，不願爲應，徘徊不字。至於十年，某雖不足語此，顧惟刼而從之者衆矣。蓋至今日，得先生爲之宗主，奉命驅馳，惟此時爲然。某他無能爲役，至於守其本心，不與流俗爲軒輊，以求上不負知己，下不負嵬瑣之所存，則或可無愧怍於此。尙惟先生終毀之，某欽惟新命，亟應祗赴，顧以未服外庸，不敢卽造朝班，區區欲俟宮觀兩考批滿日，徐拜恩渥，蓋已顯狀控於朝矣。諒先生當許可之，遙睇清崇，未卽詹侍，輒奉狀臨拜懇悃。

與前人時以前宰相帥湖南回

某半生出門下，幸甚。乃從湖南，以一節奔走閩部。去年此時，拜長沙壽星，甫償分願，潭衡相望，郵置信宿，奉令承教王事一家，以父兄師弟子之情，而行於連率方伯之際。湘人或云：前未見此比，而某也。受賜爲不貲矣。先生之入湘也，某後三數日而來。先生之出湘也，某後三數日而去。何其步亦步，而趨亦趨也。璧弟於臨江候迓使舡，獨蒙一再予進，所以愛之誨之，不令兄弟無間然者，曾不自意。先生及豐城以下，乃有門內之戚，盛德大業，如山如河，存神過化之學，先生其講之也孰矣。某所得郡，去家一篲，而近奉八十

七之祖母與老母俱闔門長幼無慮二百指悉從官居糜費俸粟是皆公朝錫類之造郡事頗簡四方無竊發之告日來風雨亦似調順使苟祿之日得免曠療非大播之賜而誰賜秦孟四者久焉逋誅湖湘未了公事殊切介介比日來連得舊同官書閱計議駐兵永明誘孟四而生獲之爲廣兵所奪尋且告斃經司取其屍寸斬以謝兩路先是田定二據平原秦小九據鹽田爲秦孟四聲援引孟四以屠永明正田定二之爲也柯倅權全州首禽二兇磔於市自二兇死而孟四遂不能免先生一番出師其終條理如此孟四不死非但遺患南方其於根本關繫甚不細且得竣事功之在彼在此無足計也蕭獻可失其令嗣如墳廬陵生此士有數可爲痛惜詹望秦階中夕九起薄言傾寫有懷忡忡伏乞鈞照

與吉守李寺丞苦號肯齋

某居廬陵南陬蓋受塵之最遠者也其於當世人物無所交際惟從田間側聽輿論則天下伯淳雖隔在僻遠烏得不聞風稽首吾州自前守去後無主宰幾一年舞鱗號狐郡政泥濁斯人無辜亦云甚矣執事不鄙下士惠然此來天開日明是在今日某實爲鄉國稱慶仰藉喬雲在上區區非才叨恩入館極知負乘月朔嘗造州關印申免時聞千騎且入關某遂止旅問伺候攀迓前茅繼聞少展適頭目受病旋暈不可耐不得已載舟兼輿以歸相距兩月交臂失之不敏之咎其當何如方僥倖平復造謁以敘悃悞顯駛及門寵授翰墨山林疎賤之人乃得殊禮郡大夫之德爲不可及而某缺典之愧益加多矣祇誦來辱避

席再拜。有懷輪囷。具嚴初櫝。謹具劄子。繳申職事之記。所有台翰。謹謹歸璧。示不敢當也。修有草率。顯圖侍見以謝。

回廣東曹提刑

伏以炎日正夏。薰風自南。共惟某官。玉節霄明。華絲雲度。穆清簡炷。交壤萊扶。台候動止。曼福某淪。穎廉清通。箋奎碧。惠徼書月。卻立下風。某遙企芙蓉。上插牛斗。儼繡衣之持斧。而瑯靡以爲糧。弘鋪太和。勿問元吉。某欽以某官。簫鍾鏗夏。玉尺端方。庶阜青蒼。毓白石清泉之勝。北斗魁傑。挺碧梧翠竹之標。或弭節於人間。或影纓於帝所。既盤礴而鬱積。復周遊以逍遙。流水青山。奪司馬尋春之志。荒崖絕島。行濂溪流物之心。欽哉。刑之恤哉。使也。言有先也。樓臺映白日。絲轡小馳。衣冠拜紫宸。綸音遄下。某起觀宣夜。跂敬明河。方闕焉北樹之題。乃贈以南金之寵。茫然三復。愧此七襄。某頃綴楚軺。每懷綿未。賤天從欲。回叩坂之車。便地養親。得江南之舍。永惟錫類。不隔善鄰。曩積阻心。熒煌在目。某袖分蕤露。才劣錦雲。雜下俚於九成。發宗工之一莞。險瞻蓬翠。工輯蕊珠。冰桃碧藕之清涼。福英祿華之郁穆。臺容所戒。鞭影是趨。

回陳侍郎

某伏以回車叩坂。請自效於林鳥。得郡江南。取已捐之竹馬。綢繆錦覆。緹襲袞華。共惟某官。麾斥八極之風雷。卷懷九天之星斗。古靈袖中之簑。屢薦時賢。溫公洛下之評。不遺人物。遂使忝求芻之寄。從而諧覲。

菽之私。某半竹奚堪。儷花甚寵。想五畝青山之樂。願請訂金。懷四愁明月之詩。曷酬贈璧。謹具劄子申謝。伏乞台照。

與湖南交代廖提刑

某汲瀛香。裊側厘。裔恣恣于主進吏。昭交好也。首祈紆省。茲者。伏審濡絲星轡。弭節霜臺。紫蓋撐空。開雲烟之五色。繡衣立漢。灑冰雪於九州。號令一新。江山胥動。共惟某官。金井玉淵之丰度。簫鍾瑤簾之聲名。老氣崢嶸。吐鰲頭之山碧。清文流灑。貫龍影之潭星。凡踐敷中外以來。皆推行忠恕之學。惟刀劍狃楚氛之惡。賴旌旗指漢坂而驅于疆。于理于南。來宣王命。其刑其罰。其審曰。惟民中。汲湘水而滌瘡。痍豁衡雲。而燭幽枉。禮樂遣使臣也。於昭原隰之光。衰綉歸我公兮。遄任朝廷之重。某頃從岫。下一拜狀。後繼得旨。以臬事屬之宋使君。某遂於正月末。解維而西。先花朝之四日。抵雲舍。禊前。奉重闈。至空同上。俯仰半菽。皆喬霽賜也。第念夙緣結習。實開衣冠百世之好。乃不克迎拜馬前。面奉龜組。江海契闊。有足念者。近得之東西行人。始知歎節前。玉節道盱境。以時考之。此際久建牙楚觀。上矣。某不勝爲湖南一道賀。舞後木人。蕭然音節。納之錦覆。過者化之。亦以自賀也。某春杪得府第所遣答書。仰佩篤敍。數月念念。嗣音相望。次寥。遽坐不敏。茲想築臺有俶。謹跽下風。傾此裝積。臨拜無任馳泝之至。伏乞台照。

與前浙西安撫李大卿號肯齋

某頃從湘花間解維而西也。故人意厚。棹酒壺三十里而飲餞之。風飄飄兮吹衣。芳菲菲兮襲予。咄噓篤綴。一何勤也。回首江空。明月千里。因念向留楚觀。望午橋鍾鼓。不隔簷陰。從容玉塵。曾不能以數數。矧今去之。汀洲杜若。間蓬弱三萬。不翅明河在天。瞻仰夙夜。如此相結。何某共以某官懸黎垂棘。瑤簫簫鍾。崢冰雪。走雷霆。精神麾乎八極。潤金石。諧韶濩。文采被乎五音。維今江濤正須人物。外之而北門筦鑰。內之而西府樞機。宜惟老成。具有經濟。青山五畝。未容寄傲之深。黃道九天。佇看傳呼之近。某丕承喬燾。先花朝之四日。抵雲舍。又十日。奉重闈。泝灘而上。禊前抵郡邸。賤事乍入沸糜。不免轆轤。既三閱月。遂就簡平。親老安健如常。半菽俯仰。皆錫類之及。惟起視四境。長山谷荒。赤子龍蛇。未易帖服。商鉅馳河。凜乎其未濟。教思無窮。惟勿替宿昔。重訓飭之。秦寇一段。某未了事而去。日夜念此。半年師旅。數州杼柚爲空。疽根仍存。憂曷有極。今聞罪人斯得。黨類悉就殲夷。我愛桐鄉。屐齒爲折。顧撫凋瘵。鎮定危疑。湖嶺間方來正欠工夫耳。洛中花竹平安。悠然長思。當必及之。某數月念念。專嬖上起居。及今方走一介。不敏甚矣。未繇佳晤。暑氣方殷。願言金護玉持。以副蒼生之望。孤臺有委。一唯鞭影所向。某臨風馳泝之至。

與劉吉州漢傳

某介恃薄雲之誼。忘其爲瀆。僭有願陳。吾鄉歐陽巽齋先生。講學天出。從游滿門。登科三十年。獨處環堵。晚見召擢。一再登朝。先生居之淡如也。其修於家。終日清言。接引後進。未嘗爲擔石謀。捐館之日。橐無贏。

實諸生爲集喪事。悠悠人生。惟死乃見真實。嗚呼。先生之風。可使懦夫立也。其子浚。字資深。世先生之學。頽然布衣。禁路諸公。每以鄉先生歿而無澤爲闕典。有欲從化地言者。人情好德。信不相遠。先生不以貨財遺其子。而資深亦復能守拙甘貧。酷與乃翁相似。區區謂文獻所屬。吾輩當相與輔成之。大監樂善若不及。又於巽齋爲庚年同朝。儻念其孤。時分廩俸。月實送之。使先生有子。不至乏絕。非惟使爲善者知勸。而名公念舊下士之盛心。所風厲遠矣。某旦夕亦謀具辭幣。聘資深至郡齋。庶幾前輩之典刑。斯文之宿昔。念同志孰有如門牆者。故輒以書至焉。當暑素聽。慚汗瀋流。伏乞台照。

回兩淮制使李端明庭芝

伏惟龍虎魁傑。手提鐵鉞。重鎮東郊。淮山崇崇。江水不波。施於南土。隸也。跽敬階符。等威有截。不圖親灑。袞翰。賁之榮光。下士伏讀感激。某仰承寵戒。信豐趙宰。真古大臣勤小之威心。趙於某同年。宿相厚。今又得以郡邑。聯好人事。結習非偶然。矧知出自晉公門下。他日稱吾榜得人。有所受之矣。謹具劄子。百拜控謝。藁稽萬罪。伏乞鈞照。

回岳縣尉

惟中興之初。先武穆王。手扶天戈。忠義與日月爭光。名在旂常。功在社稷。天報勳勞。克昌厥後。雖百世可知也。縣尉生北平龍虎家。而又偉然植立。誰不知敬。幸出結習。乃託一日之嘗僚。判諭批曆。亦旣欽承。遠

昇鱗緘爲禮過矣。

與洪端明雲巖名壽

去歲在湘中。專人詣越拜起居。過沐報教。以門牆一介之舊。撫問所及。勿替引之。相望廓寥。感戴不可言。喻繼閱邸狀。欣審端殿陞班。安車就第。于疆于理。旣了旬宣。某水某丘。逕歸遊釣。共惟驩慶。欽以某官。中朝耆舊。前輩典刑。早歲驅馳。持國子華之並出。晚年脫灑。盤洲野處之所無。今世浮沉畏途。不知止足者。勿論。固有掛冠請老。欲一日婆娑里門而不可得者。先生袖手版。還丞相。天目山中。逍遙野服。獨立於得喪寵辱之表。真天人哉。左轄頻虛。上方側席。只恐禁中。朝出傳宣。天使夕至。未容公久作碧山學士耳。某常有重絃。今年八十有七。昨者將指而出。牽於行路。鶴髮不容迎養。歲晚力扣化地。乃昇麾章貢家園。相去三百里。一箬可杭。闔門二百指。皆仰祿焉。此先生喬雲所覃。某到郡後。頗與郡人相安。日來四境無虞。早收中熟。覺風雨如期。晚稻亦可望。惟是力綿求牧。來日方長。凜乎淑後。先生襦袴舊譜。出其一二以惠綏之。蒙戴而行。敢不知賜。某於左右。缺禮久矣。謹寅奉赤紙。申綠野平安之問。采采澗芹。犯嚴悚仄。未卜聞侍。願言觀頤。視履益扶神明。以慰中外屬望。臨風拳拳。

與贛州屬縣宰

額有公稟。保伍本領在於隅團。比者郡家稟使者之命。欲於十縣從新整刷一番。見之公文。固已詳盡。所

謂差過隅團。蓋所在積弊。有公差者。有買充者。正在賢令尹用其明焉。可因者。因可革者。革按之舊籍。參之僉言。一日而可決也。使者屢問及此。卻望辦以敏手。月未如期。申來隅團。定則保伍。周保伍。周則盜賊。須郡之所以蒙成也。而縣亦職有利焉。申嚴出甲榜。比想皆已家至。今有賞罰。鏤榜。煩更徧揭。

回袁永州

某引首三吾。環清匯碧。神仙人居之。坐隔千里。方嘆衡雁之參差。緹騎秋風。落我虹翠。覺然瑤華音之在耳也。共惟某官。以羔羊素絲爲節槩。以清霜紫電爲精神。以布帛菽粟爲政事。自擁千車。來照二水。發舒家學。一二便足以破奸膽。甦民氣。期月而可。百廢具興。萬石山中。遂爲古潁川。渤海郡。真刺史敏手也。清廟訪落。諸侯來朝。風聲堂堂。歸植千載。某承乏使州。僥倖娛恃。庭空無事。年穀粗登。凡前此龍蛇之淵。皆屏跡絕影。要是奉教宿昔。陰有以惠利之。然親意亦復念家。旦夕飯命香火。歸哺山之南。水之北矣。遠道寄將。有實其庭。吾味之厚。不翅懷連城而佩明月也。臨風慷慨。亟此馳謝。尙猷緝繭。申候起居。伏乞台照。

賀京尹曾尙書

某茲者共審露綸。渙渥星履。陸華東澗。西瀍冠十連之元帥。南昌北斗。表六典之地官。丹屏雲開。紅牙日麗。共惟某官。依乘日月。吞吐江湖。直氣摩空。金天晶之錯落。清規照世。玉井水之紺寒。自噦噦於鸞聲。遄峨峨乎豸角。文章大手。南豐先生。政事十條。小范老子。出袖摩霜之鉞。坐吟卷雨之簾。真侍從。歸拜於甘

泉慈父母來臨於京兆。乃由太一徑陟文昌。冰懸雪夸而朝望兮。日暖潮平而民氣悅。儼衣冠於建禮。益鎮千筦。籌帷幄於延和。邁歸兩地。某喜傳除綽。阻趁賀綦。五緯明霄。望龍泉之秋色。九河流潤。懷虹翠之春暉。謹具劄子申賀。伏乞台照。

回曾知縣晞顏號東軒後除御史

某去秋知紫氣飛度雁峯。法不得相候。西風徹棘。新雨來車。知必不我遐棄也。未幾喜開玉垣。飛檄榮甚。錦歸交臂參差。殊重回首。今年出湘之日。乃千騎載入湘之時。又不得相隨。雞豚社中。一數契闊相隔。耿耿心知。不圖帳屨。遠持五雲。下賁虹翠。筆墨淋漓。起敬英妙。而縹藉所及。不敢當。不敢當。某堂有重慈。自高安歸後。十年不克迎侍。昨歲叨節。本不能出。請祠不獲命。姑以單騎驅馳。非其欲也。轆轤白雲。情表連上。君師天地之造。界之便州。非徼福隸遺。端不及此。千里遠將。折寄何厚。衣被重襲。其宏多矣。乍理糜沸。稟對皋宴。薄附芹心。非所以爲報也。蓬萊玉雪。小置之松竹間。會有新綸。倚布叟賀。

回曾連推宗甫名尹

某淪穎廉清。起而謝所蒙。東嚮壘壘。一拜幾何年。西方美人。豈不夙夜。飛鴻踏雪。閭其廓寥。去年漫浪行湘。於東軒公甚相厚。竭來八境。又日從巖山先生遊。獨於吾泰宇。何其闊如也。春榜旣開。聞謝家鳳毛。世科盛事。芙渠勝處。僅隔庾梅。每念擘牋。寫此襞積。乍入沸蘗中。墮此不敏。而琳琅金薤。卷五仙雲氣下之。

言念知心喜而不寐。吾泰宇以乾坤清氣。晶晶銀河。朝發輒兮咸池。曛曝鱗於沃焦。以其時可矣。河陽幕中。雲飛川泳。老子倚胡床。誇有此客。佇由黃金臺。徑上清瑣闥。某單車馳响。嚙下十閱月。太行白雲。繚繞清夢。陳情一再。天高聽下。畀以便符。奉重闈抵空同。三見萸莢矣。郡稍簡靜。得遂半菽歡。皆錫類所及也。渠渠然頌不以規。望塵辟易。芳菲遠道。第懷我私。聞車馬行色。且旦夕出領。某倘未以罪去。得握手道舊。豈不快哉。占謝絕如。馳遡一碧。

回李本中

某一節稍疎。聞問千里相望。方賦所思。得手書讀之。展轉情話。慰此契闊。某數年以兒女講授。爲琴書累。發初啓蔽。作成方來。三世交遊。此意不敢忘去。區區出山。親老不任行役。雲龍隔絕。不得日奉從容。本中獨處寒齋。覺戶外屢不至。靜中倍有方冊工夫。然門可張羅。庖隸自放。所以奉師者。必甚鹵缺。負愧奈何。諭及小子年漸長。當學聲律。尤認真至。第此兒自以爲得師。甚欲從師學而學焉。又念吾先人以賦起門。重於改作。貪賢且奈何。今姑尊來教。擇賦師爲代。但未知來年有意他出否。倘有圖回。某雖江湖懸隔。豈無可效綿者。拳拳此衷。亦以屬之新昌弟。唯命東西矣。敬憑使稟控。別賤薄物。少寄芹私。令祖困學老先。生尊候多福。侍邊乞道起居。

回長沙傅縣尉合

某他日接玉泉於涓涓中。去之十年。君且撫汗漫。神變化而爲龍已。高言軋霄。自當向上位置。需雲岳翠。不淹騰蹕乎。豸府知心。貽書道君出處之槩。廣文又緹襲琳琅以來。目中將快見緇之好也。敢不預戒行窩。汎掃以候。雖然。落木荒涼之境。飄風瀟蕩之蹤。以君堂堂發軔。而肯相從於庖俎間。此意携持琬琰者。不屑也。吾意不薄。惟君熟裁之。持對不敏。切惟照寬。

